

# TULA-TULANO NEHABUNDO RASULU

## Kaatono Wamba

Kitabi aini nobuhie dua Lukas, kanggetumo katudumino Bhihita Metaa nebhuhino. Ne ini Lukas nofofohato'ao o ae nehabundo anaguhu'ino Yesus nopalusi kawanu'ano mai'ao ne mate bhe katisangke'ano te surugaa. Rasulu hoduoano nefekopuuni weo tula-tulano, ndo Petrus (psl 1 - 12) bhe Paulus (psl 13 - 28).

Kitabi aini nembali dofetolu dawue. We kotolu dawu'ae notiwoha kadhuluno ka'ewano folele'ano Bhihita Metaa bhe dhulu kabhahino tombudo umati marasaeano. Dawu kabhao-bhaono sadaa-daa we Yerusalem palusi kawanu'ano Yesus (psl 1-7). Weo dawu kahaa iseno, Bhihita Metaa doowaemo we liwu sigao'ano we witenno Israel, nopesuamo dua kadieno Samaria (psl 8-12). Weo dawu katolu iseno Bhihita Metaa dofolelee we liwu sigao'ano we sembalino witenno Israel, peda adhono kadieno Asia bhe Makedonia sampe panda-pandano nohato dua we kotano Roma (psl 13-28).

Ne kitabi aini nentalea dua sepali'a putae kahadhaando rasuluno Yesus kotu-kotu'u nopobhaianda Rohino Lahata'ala peda nedhandi'aono Yesus wakutuuno namonimo te surugaa (1:8).

Nentalea dua notibuhi ne kitabi aini putae marasaeano ne Yesus kabhao-bhaono sanea kaowu miendo Yahudi, tamaka dobhahi miendo Yahudi kumiidono Bhihita Metaa bhe tumahimae. Katifolele'anomo dua ne mie suano Yahudi sampe dobhahi mie marasaeano mai'ao ne bansano liwu sigao'ano. Kanandoo'anomo nandoo dua seendai posala-sala ma'ana ne olotando mie marasaeano pokai'ano bhe tubhono agama Yahudi. Panda-pandano rasulu'ino Yesus bhe kamungkula'i dopohompu-hompumo we Yerusalem (psl 15). Weo hompu'a aini dohotusiemo putae mie suano Yahudi marasaeano ne Yesus miina namaraluuu damangkafi sabhaha tubhono agama Yahudi.

I'ino kitabi aini doangkafi tulu-tulungano peda aini:

1. Kahadhaando rasulu'ino Yesus we Yerusalem (psl 1 - 7).
2. Bhihita Metaa dofolelee dua we kadieno Samaria bhe Yudea (psl 8 - 12).
3. Kala-kalano Paulus kabhao-bhaono (psl 13 - 14).
4. Hompu'a Bhalano we Yerusalem (psl 15).

5. Kala-kalano Paulus kahaa pakuno (15:36 - 18:22).
6. Kala-kalano Paulus katolu pakuno (18:23 - 21:16).
7. Paulus dotohongkue we Yerusalem bhe we Kaisarea (21:17 - 26:32).
8. Kala-kalano Paulus nohope we Roma (psl 27 - 28).

### Yesus nodhandianda Rohino Lahata'ala

1:1-5

**1** Teofilus nefosibhalaku, weo kitabi kabhao-bhaono<sup>a</sup> aebuhi sabhaha nehabuno bhe nefoina'u'aono Yesus notanda kabhao-bhaono,<sup>2</sup> ampa ne oleono katisangke'ano te surugaa. Miina'o natisangke te surugaa, weo kuasano Rohino Lahata'ala padamo nohunsu pahintano ne rasulu nepilino.<sup>3</sup> Nopalusi kakadee-dee bhe mateno, Yesus nentuhu nofotiwoha Wutono ne rasulu'ino peda tandano kotu-kotu'u nodadi. Fato fulu'a kaomponano nobhahi pakuno dowohae, nofohatoanda Kafopahinta'ano Lahata'ala.

<sup>4</sup>Sepaku tangasano nohumaa bhe andoa, nopugauandamo ambano, “Koe hunsaomu Yerusalem ini, meateomu ne ini. Antagiomu dhandino Amaku, dhandino nepulao'aoku endefi'ini.<sup>5</sup> Kapa'amo Yohanes nofokadiu'ao oe, tamaka paemo naomponaa hintimiu dakumadiuangkoomu Rohino Lahata'ala.”

### Yesus notisangke te surugaa

1:6-11

<sup>6</sup>Wakutuuno rasulu dopohompu-hompu toha bhe Yesus, dofeenaemo ambado, “Ompu, naefie sumuli mowanue gaha'a Kafopahinta'ano Israel? Ha'oleomo ini bhahaa?”<sup>7</sup> Notobhoosimo Yesus, “Hintimiu miina namaraluaa mande'aaneomua oleo bhe tempo nefotantuno Amaku, kapa'amo ana'a kuasano Wutono.<sup>8</sup> Ampamo kaowu, nahumato nasumampu Rohino Lahata'ala, hintimiu me'awao-mu kuasa, maka membaliomu sakusiiku we Yerusalem, we kadieno Yudea, we kadieno Samaria ampa we tompano dhunia.”

<sup>9</sup>Pada nopugau peda na'a, notisangkemo ne wisendo; sampe no'ontomie olu maka miina damohaea.<sup>10</sup> Tangasano dototohana te lani do'ondo-ondo Yesus tisangkeno na'a, tadosihato'amo mie

<sup>a</sup> 1:1 Kitabi kabhao-bhaono nepulao'aono ini Bhihita Metaa nebhino Lukas.

dohodua. Dohato deehe-ehe ne sohihindo; pakeando sakapu-kapute, maka dopugau ambado, <sup>11</sup>“Miendo Galilea, noafa gaha'a mentoha-ntoha'ao'omu te lani? Yesus, newohamiu notisangke sa'ituini, namada kaowu nasumuli toha we dhunia ini, napototo hatono bhe kalano newohamiu sa'ituini.”

### Rasulu domantaa-ntaa

1:12-14

<sup>12</sup>Palusi ana'a rasulu dosulimo we Yerusalem domai'ao te kabhawo nekonando kabhawono Zaitun. Kakodo'ono bhe Yerusalem napesekilo. <sup>13</sup>Sahatondo we kota, dokalamo se lambu kabutu'ando maka dofoni te boloku te wawo. Andoa ini ndo Petrus bhe Yohanes, Yakobus bhe Andreas, Filipus bhe Tomas, Bartolomeus bhe Matius, Yakobus anano Alfeus, bhe Simon miendo Zelot bhe Yudas anano Yakobus. <sup>14</sup>Andoa ini sadhia dosekakolalo dosambahe. Dosabhangkada dua hobhine'i, bhe Maria inano Yesus bhe bhahitie'ino Yesus.

### Matias dopilie mbali kabhoosino Yudas

1:15-26

<sup>15</sup>Sewakutuu mie marasaeano dopohompu-hompu, dapemo'ono haa fulu kabhahindo. Noehemo Petrus ne wunta-wuntando maka nopugau ambano, <sup>16</sup>“Bhahitie'iku, teteweimo noko'ula tibuhi'ano weo Kitabi. Ma'anano, kafohatono Rohino Lahata'ala ne anabii Daud wawo-wawo, mulao'aono Yudas, noko'ulamo. Yudas ini ne-ang-kando mie humakono Yesus. <sup>17</sup>Endefi'ini, o sabhangkantomu, dopilie dua mbali rasulu, nopototo kahadhaano bhe intaodiomu. <sup>18</sup>(Yudas na'a padamo ne'oli wite. Wite aitu no'oliane dhoi ponambono nopokanagau'ao Yesus. Anoa nondawu kalongko-longko nosengka bhe handano, kahehewuno nopuli nosihuhu. <sup>19</sup>Kadhadhia amaitu dopande'aane kosasawindo mie we Yerusalem, sampe wite ana'a dokonae 'Hakeldama' weo wambado, ma'anano 'Witeno hea'.) <sup>20</sup>Notibuhi weo Kitabino Laguno Daud,  
     'Heruane ae lambuno naolinomoa,  
     hunsanomoa koe bhe meatefiea.'<sup>a</sup>  
 Notibuhi dua peda aini,  
     'Heruane ae sodano damalae sigao'ano.'<sup>b</sup>

<sup>a</sup> 1:20 Mzm 69:25

<sup>b</sup> 1:20 Mzm 109:8

<sup>21</sup>Dadi'anomo tabeano bhe kabhoosino, so posabhangka'a mani tasumakusii'ao Yesus kotu-kotu'u nodadimo toha. O mie so kabhoosino tetewei namai'ao ne olotando mangkafino Yesus nopowa-owa bhe insaodi, <sup>22</sup>notanda nofokadiu Yohanes ampa nohunsu kainsami Yesus ne oleo katisangke'ano te surugaa."

<sup>23</sup>Maka mie humatono maitu dekonamo dohodua, seemiea Yusuf konea'ano dua Barsabas (siga'a dokonae dua Yustus) bhe seemieno Matias. <sup>24</sup>Pada ana'a dosambaheamo ambado, "O Ompu Hintumo mande'aono totono lalondo seemie-seemie! Fosusu kainsamie bhaha'i la'ae ne olotando hoduanu ini nepilimu, <sup>25</sup>so mintahano sodano rasulu nehunsano Yudas. Kapa'amo Yudas nopesuamo ne kaeate'a mantasi'ano so wutono." <sup>26</sup>Pada ana'a neando hoduanu ini dopodaduanemo. Gaha'a nondawu ne Matias. Dadi'anomo Matias nokapotimo rasulu ompulu seemieno.


### Pentakosta, oleono kasampu'ano Rohino Lahata'ala

2:1-13

**2** Nohato hohaea'ano Pentakosta, kosasawindo mie marasaeano dopohompu-hompu ne se'onu lambu. <sup>2</sup>Gaha'a tamba'omo dofetingke huhu nomai'ao te lani pasae kawea mo'osa, kose'onu'ae lambu kapohompu-hompu'ando tanehuhu-huhumo. <sup>3</sup>Tadowohamo dua hendeno efi peda katuno lela nopogaa-gaa nopee te wawondo seemie-seemie. <sup>4</sup>Kosasawindo nokabhintidamo Rohino Lahata'ala maka dotanda dopugau depake wambado koliwuno [tapa'o nepande'aondo,] seemie-seemie ampa kadawu'aono ne Rohino Lahata'ala.

<sup>5</sup>Wakutuu ana'a dobhahi miendo Yahudi lumebeno mai'aono ne sabhaha liwu te dhunia ini dohato we Yerusalem. <sup>6</sup>Dofetingke huhu amaitu mie bhahi ini dosipumpumo, andoa tadotongo, hampano dofetingke rasulu maitu dopugau'ao wamba nepakendo ne liwu kamai'ao'ando seemie-seemie. <sup>7</sup>Tadotonto bhe nopuli mentendo. Ambado, "O mie mugauno ini ingka sanea miendo Galilea! <sup>8</sup>Peda amai bhahaa inia? Ingka dofetingkedaomu dopugau depake wamba we liwu kamai'ao'antoomu seemie-seemie? <sup>9</sup>Intaodiomu ini miendo Parsia, Media, Elam, miendo Mesopotamia, Yudea, Kapadokia, Pontus bhe Asia, <sup>10</sup>Frigia bhe Pamfilia, miendo Mesir bhe kadieno Libia poma'oti'ano bhe kotano Kirene, mie humato mai'aono we Roma, <sup>11</sup>miendo Yahudi bhe sigao'ano mangkafino agama Yahudi, miendo Kreta bhe miendo Arabu. Ingka dofetingkedaomu depake

wamba we liwu kamai'ao'antoomu seemie-seemie, detula-tula'ao giu timente'aono nehabuno Lahata'ala.”<sup>12</sup> Kosasawindo tadentongongomo bhe tadopofee-feenam, “O ae bhahaa inia?”<sup>13</sup> Tamaka nandoo dua bihidhingida ambado, “Andoa ini dololanu'ao angguru momeko.”



*Liwu-liwu kamai'ao'ando miendo Yahudi humatono we Yerusalem*

### Kapedatono Petrus

2:14-40

<sup>14</sup>Tamaka Petrus nohemo bhe rasulu ompulu seemieno maka nopugau nofekabhala-bhala'ie ne mie bhahi, ambano, “Miendo Yahudi bhe kosasawimiu meateno we Yerusalem ini, fetingkee'omu bhe tandai'eomu pugauku ini. <sup>15</sup>Mie andoa ini miina dalolanuwa peda fekihimiitu, kapa'amo oleo kane'o hambisiua mata. <sup>16</sup>Tamaka aini'aemo nekobhoasa'aono Lahata'ala nefosampeno anabii Yoel,

<sup>17</sup> Peda aini bhoasaono Lahata'ala,  
 ‘Nahumato pandano dhamani  
 amosampu Rohiku ne kosasawindo manusia;  
 ana'imiu namo'ane nahobhine damandemo  
 dakosuaha nada anabii,  
 ana mo'anemiu ama'anda powoha,  
 kamungkula'imiu ama'anda monifi.

- 18 Ne oleo ana'a mahingga ne bhatuaku namo'ane  
 nahobhine  
 amosampu dua Rohiku,  
 sampe dakosuaha nada anabii.
- 19 Aefokonandoo giu timente'aono te wawo, te lani tatu,  
 bhe tanda tapa mentela we panda, we dhunia ini:  
 o hea, o efi bhe gawu mokapa.
- 20 Oleo naembali doloma mposo,  
 o wula nameda hea.  
 Aini nakumadhadhia pae'o nahumato oleono Ompu,  
 oleo bhalano, oleo kumalabhia'ano.
- 21 Ne oleo ana'a kosasawindo metondalano ne Ompu  
 tetewei dasumalamati.'<sup>a</sup>

22 Miendo Israel, fetingkee'omu pugauku ini. Nepulao'aoku na'a Yesus miendo Nasaret, seemie nesangkeno Lahata'ala. Nosangkee Lahata'ala ini notiwoha ne kuasa, giu timente'aono bhe tanda tapa mentela nehabuno Lahata'ala ne wunta-wuntamiu noangka ne limano Yesus ini. Kosasawi'ae ini ingka pande'aanemoomu. 23 Noposahataa bhe patudhuno bhe kalentuno Wutono, Lahata'ala nobhotusiemo nofolapasaangko'e'omu. Tamaka hintimiu katahoe'omu ne bansando mie modai dokantai'e te sau salipu bhe dopongko'e. 24 Tamaka Lahata'ala nofodadie, nofolapae nomai'ao ne kakadee-deeno mate, hampano pae bhe kapoolia nasumadaa-daa naku-muasai'e mate. 25 Kapa'amo Daud nopugau nopulao'ao Anoa peda aini,

'O idi sadhia awoha Ompu Lahata'ala te wiseku;  
 hampano Anoa neehe-ehe ne suanaku,  
 idi miina akakenda-kendaa.

- 26 Dadi'anomo laloku no'ia sepali'a,  
 alusuku nokei nosambo;  
 aeate-ate weo posahuna'ao ne Lahata'ala.
- 27 Kapa'amo alusuku pae humunsae weo dhuniando mie  
 mate,  
 mbadhano bhatuamu mongkilono pae  
 nahumansurua.
- 28 Hintu fosusu kanau kaangka'a so adumadi'ao;  
 ne wisemu nopontalabhi-labhi ka'iaku.'<sup>b</sup>

<sup>a</sup> 2:17-21 Yoel 2:28-32

<sup>b</sup> 2:25-28 Mzm 16:8-11

<sup>29</sup>Bhahitie'iku! Naetaa aetula-tulaangkoomu awuantoomu Daud mentalea-mentalea. Daud nomatemo, padamo dokobuhue. Kobuhuno nandoo'e ampa aini ne liwuntoomu ini. <sup>30</sup>Lahata'ala pada-mo nodhandie bhe nofemata putae namai'ao ne sampu'ano nandumandoo naseemie so nesangkeno Lahata'ala naembali Omputo.<sup>a</sup> Daud ini nopande'aane dhandino Lahata'ala na'a. Anoa seemie dua anabii, <sup>31</sup>dadi'anomo o ae so kumadhadhia'ano te wise nowohaemo. Nopugauane wawo putae Mesias Omputo Fosalamatino namanu namai'ao ne mate. Ambano Daud, 'Pae dahumunsae weo dhuniando mie mate, mbadhano pae nahumansuraa.' <sup>32</sup>Nepulao'aono Daud na'a o Yesus, nefowanuno Lahata'ala nomai'ao ne mate. Kosasawi'a mani ini moha'aono wuntano mata mani kadhadhia ana'a. <sup>33</sup>Pada nosangkee Lahata'ala te melangke'ano bhe nowa'ane kuasa, notahimamo Rohino Lahata'ala nedhandi'aono maitu. Rohi aitu nofosampuemo dua ne insaodi ini, peda newoha bhe nefetengkiemiu aitu. <sup>34</sup>Kapa'amo suano wutono Daud monino te surugaa, tamaka Daud nopugau ambano,

'Ompu Lahata'ala nokowambamo ne Ompuku,  
<sup>35</sup>Mengkohamo ne suanaku ini,  
 ampa kosasawindo kaewamu ahumabuda so  
 kafinda'amu.'<sup>b</sup>

<sup>36</sup>Dadi'anomo kosasawindo miendo Israel tabeano mande'aane-omu kotu-kotu'u putae Yesus nosangkeemo Lahata'ala nembali Ompu bhe Mesias, Omputo Fosalamatino. Yesus ini padamo kantai'eomu te sau salipu."

<sup>37</sup>Dofetingke peda na'a nosabhamo handado maka dofeenamo Petrus bhe rasulu sigao'ano ambado, "Bhahitie'i, kaowua taeafa'imo bhahaa insaodi ini?" <sup>38</sup>Ambano Petrus, "Fetompaaneomu dhosamiu maka mefekadiu'omu seemie-seemie weo neano Yesus Kristus, so nati'amponi'ao dhosamiu. Mada aitu dama'angkoomu kawa'aono Rohino Lahata'ala. <sup>39</sup>Kapa'amo dhandi aini so hintimiu bhe sampu'amiu bhe kosasawindo mie sigao'ano we liwu mokodo'o'ano dua, ampa kabhahino so nesali'ino Ompu Lahata'alantoomu." <sup>40</sup>Nandoo dua nobhahi nepugau'aono Petrus. Nompuu-mpuunie notangahida bhe nefe'ulaianda ambano, "Fekakodo'o wutomiu ne mie modaino ini, so sumalamatia'ao'omu."

---

<sup>a</sup> 2:30 Mzm 132:11

<sup>b</sup> 2:34-35 Mzm 110:1

### Koeatendo umati kabhao-bhaono

2:41-47

<sup>41</sup>Dobhahi mie marasaeano ne pugauno Petrus, maka dokadiuda. Oleo itu umati dotitubhahi, kabhahindo dapetolu hewu. <sup>42</sup>Andoa sadhia dokampuu-mpuu dofintahaki kafoina'undo rasulu, dopohompu-hompu bhe dosekakolalo. Andoa sadhia dua dopoharoa bhe dosambahea.

<sup>43</sup>Nobhahi giu timente'aono bhe tanda tapa mentela nehabundo rasulu, sampe kosasawindo mie dote'i sepali'a. <sup>44</sup>Kosasawindo marasaeano dosekakolalo, fehebua'ano seemie mbalimo dua fehebua'ando kosasawindo. <sup>45</sup>Sadhia nandoo dua masono fehebua'ano maka olino dopodawu-dawue ampa kafaraluuno seemie-seemie. <sup>46</sup>Andoa dokampuu-mpuu dosekakolalo, se'o-se'oleo dopohompu-hompu weo Lambuno Lahata'ala. Andoa do'ia bhe nohelasi lalondo dopoharoa ne lambudo seemie-seemie dopali-pali'aane. <sup>47</sup>Sadhia dua dopudhi Lahata'ala bhe doasianda sabhaha mie. Se'o-se'oleo Ompu nofodhulu kabhahindo mie nefosalamati.

### Petrus nefeka'osa mie mokalu

3:1-10

**3** Se'oleo Petrus bhe Yohanes dokala we Lambuno Lahata'ala. Ne na'a hambi tolu mata kama'oleono, waktuuunomo dosambahea. <sup>2</sup>Ne itu nandoo seemie mo'ane nokalu mpini pakalente-no. Se'o-se'oleo do'owea'e maka dofongkohae ne fointo bhalano kapesua'a weo Lambuno Lahata'ala, konea'ano Fointo Mokesa. Ne itu nesalo-salo ne mie mesuano weo Lambuno Lahata'ala. <sup>3</sup>Nowoha Petrus bhe Yohanes damesua weo Lambuno Lahata'ala, anoa nesalo-salo dua ne andoa ini. <sup>4</sup>Kohoduando dotontoe maka ambano Petrus, "Ondo kainsami." <sup>5</sup>Mie amaitu notontoda, weo fekihino nakoni'awa. <sup>6</sup>Tamaka Petrus nopugau ambano, "Miina akobulawaa, miina akoperaa, ampamo kaowu ndumandoo'ano ne inodi ama'angkoe: weo neano Yesus Kristus, miendo Nasaret maitu, kala'o toha!" <sup>7</sup>Petrus lasao nointaha limano suanano mie amaitu maka nofoehee. A'eno bhe bhiku-bhikuno lasao no'osa. <sup>8</sup>Dadi'ano-mo nopunda ngkaehe-ehe bhe nosuli kumala, maka noangkafida weo Lambuno Lahata'ala. Nekala-kala bhe nopokapunda-punda, nopudhi Lahata'ala. <sup>9</sup>Kosasawindo mie dowohae nekala-kala bhe nopudhi-pudhi Lahata'ala. <sup>10</sup>Andoa lasao dopande'aane ingka anoamo



maitu gaha'a mie mengkoha-ngkohano bhe mesalo-salono we Fointo Mokesa. Andoa domente bhe dotongo dowoha kumadhadhia'ano ne mie amaitu.

### Kapadatono Petrus weo Lambuno Lahata'ala

3:11-26

<sup>11</sup> O mie amaitu noangkafi kansuhu Petrus bhe Yohanes. Dohato we tamba bhalano nekonando Tambino Salomo, mie bhahi dosi-pumpumo dolibuda, ka'osano mentendo. <sup>12</sup> Nowoha mie bhahi maitu Petrus nopugaumo ambano, “Miendo Israel, noafa mente-aneomu kadhadhia aini? Noafa ondo-ondo kainsamiomu, kao-kaomo mie aini kapooli'ano nokala mba'inomo insaodi ini mie kokuasano tawa mie lumebe? <sup>13</sup> Lahata'alano Abraham, Ishak bhe Yakub, Lahata'alando awua'intoomu nofekakalabhiamo Yesus palima-limano. Yesus ini owae'omu ne kolakino liwu, tamaka mahinggamo Pilatus nokopatudhu namolapae, hintimiu mongahe'ie'omu. <sup>14</sup> Anoa mie mongkilo bhe melaano lalo, tamaka hintimiu mongahe'ie'omu maka mesaloomu ne Pilatus namolapaangkoomu mie kapongko-pongkono. <sup>15</sup> Anoamo fowa'aono dadi, gaha'a pongkoemoomu. Tamaka Lahata'ala nofowanue nomai'ao ne mate. Insaodimo ini moha'aono wuntano mata mani kadhadhia ana'a. <sup>16</sup> Aitu wohae'omu kadhadhia ne kalu aini. Anoa no'osamo hampano kaparasaea weo neano Yesus. Kaparasaeano ne neano Yesus meka'osano mie nepande'aomiu ini. Ingka wohae'omu kosasawimiu.

<sup>17</sup> Bhahitie'iku, apande'aane kahabu'amiu peda aitu hampano miina mande'aaneomua, nopototo bhe kosasawindo neangkamiu. <sup>18</sup> Ampamo kaowu pedamo ana'a Lahata'ala nofekako'ula neko-bhoasa'aono endefi'ini. Bhoasaono na'a nofosampeandae ana-anabii, putae Mesias Omputo Fosalamatino maitu tetewei nakumadee-dee. <sup>19</sup> Dadi'anomo dolimoomu ne Lahata'ala, fetompaanemoomu dhosamiu, neanomo dhosamiu namekanggela'iemu. <sup>20</sup> Ane nada na'a, Ompu nama'angkomoomu dua kalalesano lalo, maka natumuduangkoomu Yesus toka nefontaa-ntaa'aono mpini kabhao-bhaono so Omputo Mosalamatikoomu. <sup>21</sup> Anoa maitu tetewei nae-ate te surugaa ampa oleono so katipahabu'ouni'ano bhahi-bhahi'ae, peda nekobhoasa'aono Lahata'ala nefosampendo ana-anabii mongkilono ne dhamani wawono. <sup>22</sup> Ingka anabii Musa nokowambaanemo wawo, 'Ompu Lahata'alamiu naefoheangkoomu seemie

anabii namai'ao ne bhahitiemiu napototo bhe idi. Fetingkee'omu sabhaha so nepugau'aono ne hintimiu. <sup>23</sup> Kotika mie tapa metingkeno anabii aitu, damogampida mai'ao ne umatino Lahata'ala maka damekasunida.'<sup>a</sup> <sup>24</sup> Kosasawindo anabii mosampeno bhoasaono Lahata'ala, notanda ne anabii Samuel ampa ana-anabii mbuhumaino, dokowambaanemo wawo so kumadhadhia'ano dhamani aini. <sup>25</sup> Wambado ana-anabii na'a mbalimo kahunsa'ao so hintimiu. Hintimiumo me'awano dawua weo podhandi'ano Lahata'ala bhe awua'intoomu. Wakutuu ana'a Lahata'ala nokowamba ne Abraham ambano, 'Namai'ao ne sampu'amu, sabhaha bansano liwu te dhunia ini dae'awa kabarakati.'<sup>b</sup> <sup>26</sup> Dadi'anomo Lahata'ala nofoehemo palima-limano, maka notudue wawo ne hintimiu neowaangkoomu kabarakati. Kabarakati ana'a, ma'anano Anoamo so matokoomu metompa'ao'omu sabhaha podiu modaimiu seemie-seemie."

### Petrus bhe Yohanes ne wiseno Sahano Agama

4:1-22

**4** Tangasano Petrus bhe Yohanes dopuga-pugau bhe mie bhahi, gaha'a domai'idamo imamu bhe neangkando dhagano Lambuno Lahata'ala bhe miendo Saduki. <sup>2</sup> Andoa ini nosodo sepali'a lalondo mba'inomo Petrus bhe Yohanes dofoguhu mie bhahi putae Yesus nosuli nodadi. Aini nembalimo tandano kawanu'ando kosasawindo mie mate. <sup>3</sup> Kohoduando dohakoda maka dotohongkuda ampa nomentae, kapa'amo oleo nohondomo. <sup>4</sup> Tamaka metingkeno kafoguhundo dobhahi marasaeano, sampe kosasawindo umati o mo'ane kaowu dapelima hewumo.

<sup>5</sup> Hato nomentae, Sahano Agama, kamungkula'indo Yahudi bhe pande-pande Kitabi dohompumo we Yerusalem. <sup>6</sup> Imamu Bhalano konea'ano Hanas, Kayafas, Yohanes bhe Aleksander bhe mie sigao'ano dua sampu'ando Imamu Bhalano, dohompu bhe kamungkula'i na'a. <sup>7</sup> Pada ana'a Petrus bhe Yohanes doowadamo te wisendo maka dofee-feenada ambado, "Mepakeomu kuasa ae gaha'a, bhaha'i pakeomu nea la'ae feka'osaomu kalu aini?"

<sup>8</sup> Petrus nokabhintie Rohino Lahata'ala maka notobhoosi ambano, "Neangka'indo umati bhe kamu-kamungkula'i! <sup>9</sup> Oleo itu dofee-feena kainsamimo mba'inomo taehabu metaa'ano ne mie mosaki,

<sup>a</sup> 3:22-23 Ul 18:15,18,19

<sup>b</sup> 3:25 Kej 22:18, 26:4

pakade dofee-feena kainsami dua bhaha'i mie amaitu tafeka'osane kuasa la'ae. <sup>10</sup>Dadi'anomo hintimiu bhe kosasawindo miendo Israel tabeano mande'aaneomu putae mie aini no'osamo bhe nehe-ehe ne wisemiu ini, mba'inomo kuasano neano Yesus Kristus, miendo Nasaret maitu. Hintimiu kantai'eomu te sau salipu, tamaka Lahata'ala nofowanue mai'ao ne mate. <sup>11</sup>Yesusmo ini nepulao'aono Kitabi,

‘Kontu ne'ohondo mefelambuno, gaha'a nembalimo sandi bhalano.’<sup>a</sup>

Mefelambuno na'a ingka hintimiumo itu. <sup>12</sup>Ampamo kaowu Yesus fosalamatino, kapa'amo te dhunia ini we simbalino Anoa bhe naseemie miina bhe me'awano kuasa mai'aono ne Lahata'ala so nafofosalamati'ao.”

<sup>13</sup>Dowoha katangkano lalondo Petrus bhe Yohanes, kamungkula'i Sahano Agama maitu tadomente, kapa'amo dopande'aanda andoa maitu mie ndidiki pata kokasikolano. Gaha'a dopande'aomo lalondo ingka andoa mie mangkafino Yesus. <sup>14</sup>Tamaka miina dakodiua, mba'inomo dowoha mie kalu kafeka'osa'ando maitu nehe-ehe ne sohihindo Petrus bhe Yohanes. <sup>15</sup>Pada aitu kohoduando dotududa dalumimba, maka dopugau-gau ambado, <sup>16</sup>“Damafa'iandaomu bhahaa mie andoa inia? Kosasawindo miendo Yerusalem dopande'aanemo giu timenteaono nehabundo, paemo natitagalia. <sup>17</sup>Ampamo kaowu keana sadhulu-dhulu kabhahindo mie metingkeno lele aini, naetaa da'umele'aanda bhe dalumbada keana dofendua dosambili nea amaitu ne la'ae maka dua.”

<sup>18</sup>Kohoduando suli toha dofopesuada maka dopahintangida paemo sepali'a naembalia dasumambili neano Yesus tawa dafofoguhu damake nea ana'a. <sup>19</sup>Tamaka Petrus bhe Yohanes tadotobhoosi ambado, “Tabhotusimoomu wutomiu bhaha'i nada amai metaa'anoa weo pomatano Lahata'ala: tamangkafi pahintamiu bhaha'i tamangkafi pahintano Lahata'ala? <sup>20</sup>Kapa'amo insaodi ini pae bhe kapoolia tatumiehe tafofohato'ao newoha mani bhe nefetingke mani.” <sup>21</sup>Sedhulu'a dua ka'osano dolambada, tamaka panda-pandano dofolapada dua mba'inomo miina daewohaa dhala so katihukumu'andoa. Pakade dote'i dua mie bhahi mudhino neano Ompu hampano dowoha kadhadhia amaitu. <sup>22</sup>Umuhuno mie kalu

---

<sup>a</sup> 4:11 Mzm 118:12

nefeka'osa weo kadhadhia timente'aono na'a, nokolabhimo fato fulu ta'u.

**Mie marasaeano desalo katangkano lalo ne Lahata'ala**  
4:23-31

<sup>23</sup>Dofolapada kaowu, Petrus bhe Yohanes dosulimo se sabhangka'indo maka detula-tula'ao pugaundo neangkando imamu bhe kamungkula'i. <sup>24</sup>Dofetingke peda na'a, dosekakolalomo dofewise ne Lahata'ala maka desalo ambado, "O Ompu, Hintumo mokonandoono lani bhe dhunia, o te'i bhe kosasawi'ae i'indo. <sup>25</sup>Weo kuasano Rohimu, awua mani Daud, bhatuamu, nofosampe wambamu peda aini,

'Noafa mie tapa mande'aono Ompu do'amaha'ao?

Noafa sabhaha bansano liwu dopogau-gau'ao tapa kofahalaa'ano?

<sup>26</sup>Kolakindo dhunia dokanumo dapopahisa, kafeompu'ando dopokanagau

damewangi Ompu bhe Katuduno Fosalamatino.'<sup>a</sup>

<sup>27</sup>Nopokantibhamo bhe ana'a Herodes bhe Pontius Pilatus, mie mai'aono ne sabhaha bansano liwu bhe miendo Israel dohompumo ne kota ini dopugau-gau doewangi Yesus palima-limamu mongkilono, nesangkemu mbali Omputo Fosalamatino. <sup>28</sup>Andoa ini dodhalangimo kosasawi'ae nefotantumumu mpini kabhao-bhao hampano kuasa bhe kapoindalomu Wutomu. <sup>29</sup>Aitu, Ompu, ondo da dolamba kainsami, wa'a kainsami katangkano lalo tamolele bhoasaomu, insaodi bhatuamu ini. <sup>30</sup>Fosampu kainsami kabarakatimu so dao'osa'ao mie mosaki bhe fotiwoha giu timente'aono bhe tanda tapa mentela weo neano Yesus palima-limamu mongkilono." <sup>31</sup>Pada dosambahea, lambu kapohompu-hompu'ando tanomagegomo. Kosasawindo nokabhintidamo Rohino Lahata'ala maka notangkamo lalondo defolele bhoasaono Lahata'ala.

**Koeatendo umati kabhao-bhao**  
4:32-37

<sup>32</sup>Kosasawindo marasaeano dose'ise, dosefekihi bhe dosekalalo. Bhe naseemie miina bhe kumonano fehebua'ano so wutono kaowu, tamaka fehebua'ano seemie mbalimo dua fehebua'ando

---

<sup>a</sup> 4:25-26 Mzm 2:1-2

kosasawindo. <sup>33</sup>O rasulu dosakusii'ao putae Ompu Yesus nowanumo mai'ao ne mate. Pugaundo nopono'ao kuasa. Kosasawindo marasaeano nobarakatida mpuu Lahata'ala. <sup>34</sup>Ne olotando bhe naseemie miina bhe mokaeno. Kowiteno tawa kolambuno noaso witeno tawa lambuno na'a, <sup>35</sup>maka oline nowa'andae rasulu mbali dodawu-dawuandae umati ampa kafaraluuno seemie-seemie.

<sup>36</sup>Pedamo dua aitu Yusuf, seemie sampu'ano Lewi nomai'ao we witeno Siprus; o rasulu dokonae dua Barnabas (ma'anano nea ana'a Folawesino lalo). <sup>37</sup>Anoa ini noaso witeno maka oline nowa'andae rasulu.

### Ananias bhe Safira

5:1-11

**5** Nandoo seemie konea'ano Ananias, neano hobhineno Safira. Anoa neaso witendo sedawu. <sup>2</sup>Oline sedawu nohunsae so wutondo, sedawuno nowa'andae rasulu. Ana'a nopande'aane dua hobhineno. <sup>3</sup>Tamaka Petrus nopugaumo ne Ananias ambano, “Ananias, noafa gaha'a totono lalomu nokuasaiane Kafeompu'ando seetani, sampe gau-gaumo Rohino Lahata'ala? Ingka oline witemu sedawu hunsae so wutomu? <sup>4</sup>Ane pae'o masoe ingka daanumo witemu, hato dua pada asoe ingka dhoino hakumu. Noafa gaha'a kofekihii'ao mehabu peda aitu? Suano manusia negau-gaumua, tamaka wutono Lahata'ala!” <sup>5</sup>Nofetingke pugau ana'a lasao notiwata komate-mateno. O mie metingkeno kadhadhia amaitu dote'i sepali'a. <sup>6</sup>Palusi ana'a domaimo ana mo'ane'i, maeatino lasao dowalue, dotongkue maka dokala dokobuhue.

<sup>7</sup>Napetolu dhamu nohatomo dua hobhineno, tamaka miina'o namande'aane kadhadhia sa'ituini. <sup>8</sup>Ambano Petrus ne anoa, “Soba fohato kanau: pedamo kabhahino dhoi aini oline wite neasomia?” Ambano hobhineno na'a, “Uumbe, pedamo aitu.” <sup>9</sup>Ambano dua Petrus, “Noafa gaha'a hintu bhe mo'anemu pokanagau'ao'omu solo-soloomu Rohino Ompu? Ondoda, mie kane'o mai'aono kumbuhuno mo'anemu, deehe-ehemo ne wobhano fointo. Aitu datu-mongkumo dua hintu.” <sup>10</sup>Hobhine aitu lasao dua notiwata ne wiseno Petrus, komate-mateno. Hato dopesua ana mo'ane'i maitu, dohafotie miinamo nakoineia. Lasao dotongkue maka dokala dokobuhue ne sohihino mo'aneno. <sup>11</sup>Kosasawindo umati marasaeano bhe mie metingkeno kadhadhia amaitu dote'i sepali'a.

### Giu timente'aono bhe tanda-tanda tapa mentela

5:12-16

<sup>12</sup>Nobhahi tanda tapa mentela bhe giu timente'aono nehabundo rasulu ne mie bhahi. Kosasawindo mie marasaeano sadhia dosekakolalo dopohompu-hompu we Tambino Salomo ne Lambuno Lahata'ala. <sup>13</sup>O mie sigao'ano miina bhe mokadonoa dahumompu bhe andoa, tamaka dofosisbhalada sepali'a mie bhahia. <sup>14</sup>Dhulu kaompona dhulu kabhahi mie marasaeano ne Ompu, namo'ane nahobhine. <sup>15</sup>Sampe kanandoo'anomo dua deowa'i mie mosaki ne wiwino kaangka'a, tadofondoledamo ne kaodo'a tawa ne kampasi, bhaha'i kaowu namangka Petrus tadua nakumantibhadamo ondulano. <sup>16</sup>Dopohato-hatomo dua mie bhahi mai'aono ne liwu-liwu moma'o'ano bhe Yerusalem, deowa'i mie mosaki bhe nepesuakino seetani. Kosasawindo dofeka'osada.

### Rasulu dotitohongku

5:17-25

<sup>17</sup>Hato panda-pandano Imamu Bhalano bhe kosasawindo mangkafie – sanea miendo Saduki – doewamo, mba'inomo kakoulano lalo. <sup>18</sup>Rasulu dohakoda maka dofopesuada weo katohongkundo mie ndidiki. <sup>19</sup>Tamaka hato nohondo oleo, seemie mala'ekatino Ompu nolengkasi fointono katohongku na'a maka nowowo'oda we simbali. <sup>20</sup>Ambano mala'ekati na'a, “Kala meehe-eheomu we Lambuno Lahata'ala maka foleleomu bhihitano dadi bu'ou ini ne mie bhahi.”

<sup>21</sup>Andoa doangkafi pahintano mala'ekati na'a. Nandoo sanime-ntae dokalamo we Lambuno Lahata'ala maka dotanda dofoguhu mie ne itu. Wakutuu aitu dua Imamu Bhalano bhe mangkafie defokonandoomo hompu'ando Sahano Agama bhe kamungkula'indo Yahudi. Dohompu kaowu, detudumo mie dakumala da'umulei rasulu'i we katohongku. <sup>22</sup>Tamaka dohato we katohongku, gaha'a o rasulu miina dahumafotida. Dadi'anomo dosulimo dopolele ambado, <sup>23</sup>“Tahato we katohongku, fointo notikunsi metaa, o dhaga daa-daada te wiseno fointo. Tamaka pada talengka fointo, tapesua we lalo, gaha'a miinamo taohaa bhe naseemie.” <sup>24</sup>Dofetingke peda na'a, neangkando dhagano Lambuno Lahata'ala bhe imamu nopowengka dua handado, konanomo bhaha'i doafamo rasulu'i na'a.

<sup>25</sup>Pande'aanea nohatomo seemie neowaanda bhihita ambano, “O mie netohongkumiu, ingka deehe-ehe we Lambuno Lahata'ala, defoina'u mie bhahi!”

**Rasulu'i ne wisendo Sahano Agama. Katangahino Gamaliel**

5:26-42

<sup>26</sup>Pada ana'a neangkando dhagano Lambuno Lahata'ala bhe mieno dokala we Lambuno Lahata'ala do'ulei rasulu hoduanano na'a. Rasulu ini miina damafa-afa'ianda mba'inomo dote'i mie bhahi, bhahaa dobhatumbuanda kontu. <sup>27</sup>Kohoduando doowada ne wiseno Sahano Agama. Imamu Bhalano nofee-feenadamo ambano, <sup>28</sup>“Padammo tafokii-kiikoomu ta'ele'aangkoomu fofoguhumu weo neano mie aitu. Tamaka o ae ko'ula'ano? Kafoguhumu nokabhintiemmo koseka'ewa'ae Yerusalem, pakade patudhumu kamate'ano mie aitu mala'a kainsamie'omu insaodi.”

<sup>29</sup>Petrus bhe rasulu sabhangka'ino dotobhoosimo ambado, “Nofaraluu damangkafi pahintano Ompu Lahata'ala nalumiu'e pahintano manusia. <sup>30</sup>Yesus maitu pongkoe'omu, kantai'eomu te sau salipu, tamaka Ompu Lahata'alando awuantoomu nofowanue nomai'ao ne mate. <sup>31</sup>Anoamo nesangkeno Lahata'ala bhe nowa'ane mo kuasa mbali Neangka bhe Ompu Fosalamatino, neanomo miendo Israel dametompa'ao diundo modaino, so noti'amponi'ao dhosando. <sup>32</sup>Insaodimo ini sumakusii'aono sabhaha kadhadhia na'a, insaodi bhe Rohino Lahata'ala. Rohino Lahata'ala ini nowa'andae Lahata'ala ne kosasawindo mie mangkafino pahintano.” <sup>33</sup>Dofetingke pugau ana'a, nolea sepali'a lalondo Sahano Agama, sampe dokopatudhu damangkoda.

<sup>34</sup>Ne olotando Sahano Agama maitu nandoo seemie Farisi pande Kitabino Musa, neano Gamaliel. Anoa ini dofosibhalae dua mie bhahi. Nesalomo rasulu hoduanano maitu damolimhada sebhantaha. <sup>35</sup>Pada ana'a ambano ne kamungkula'i, “Bhahitie'iku miendo Israel, fekihiomu kadeki fekataa-taa so nehabumiu ne mie andoa ini! <sup>36</sup>Endefi'ini nandoo konea'ano Teudas, noabhi wutono mie bhalaano, sampe mangkafie dapefato mo'ono. Tamaka dopongkoe kaowu, mie mangkafie na'a tadopogasa-gasamo, tanopalusimo peda aitu. <sup>37</sup>Nopalusi anoa na'a, nandoomo dua seemie konea'ano Yudas mieno Galilea, ne wakutuuno dhiwa'a. Dobhahi dua tihelaane lalo sampe doangkafie. Tamaka anoa dopongkoe dua sampe mangkafie

dopuli dua dotigasaa. <sup>38</sup>Dadi'anomo patudhuku idi, andoa ini koe afa-afa'iandaomua! Tahunsa'andomo. Ane patudhundo bhe habundo maitu nomai'ao ne manusia, tetewei naosali. <sup>39</sup>Tamaka ane nomai'ao ne Lahata'ala, pae moolie'omua mekasalidaomua, konanomo nako'ula'ao poewangimoomu bhe Lahata'ala.”

Katangahino na'a dotahimae. <sup>40</sup>Pada ana'a rasulu maitu dofo-pesuadamo toha maka dopepekida bhe do'ele'aanda dafofogu-hu damake neano Yesus. Pada amaitu dofolapadamo. <sup>41</sup>O rasulu maitu do'ia sepali'a dohunsamo hompu'ano Sahano Agama, kapa'amo Laha-ta'ala noabhida dopantasimo dua de'awa kakadee-dee mba'inomo neano Yesus. <sup>42</sup>Andoa miina dametumpua dofofogu-hu weo Lambu-no Lahata'ala bhe ne lambudo mie. Se'o-se'oleo defolele Bhihita Metaa putae Yesus maitu Omputo Fosalamatino.

### Desangke dopipitu so umundofaono mie mokae

6:1-7

**6** Wakutuu ana'a mie mangkafino Yesus sadhulu-dhulu ka-bhahi. Miendo Yahudi mepakeno wamba Yunani, dopahamu-ntu'ao miendo Yahudi mepakeno wamba Ibrani, mba'inomo bhihina-ndado miina nati'ondofao metaa'a. Andoa ini miina dae'awa kafaraluu nedawu-dawundo se'o-se'oleo. <sup>2</sup>Dadi'anomo rasulu ompulu hoduan dofohompumo kosasawindo mie marasaeano. Ambado, “Ingka pae naetaa'a tametumpu taefolele bhoasaono Lahata'ala, mba'inomo ta'e'ondofao nehumaa. <sup>3</sup>Dadi'anomo, bhahitie-bhahitie, mepili kaitaomu dapipitu ne olotando mie marasaeano, maka tasumangkeda so umundofaono kafaraluu aini. Mie so nepilintoomu tabeano mie metaa weo pomatando mie bhahi, tabeano nekabhintino Rohino Lahata'ala bhe dokotimbangi. <sup>4</sup>Neanomo insaodia tamosibhalamo sambahea, bhe taefolele bhoasaono Lahata'ala.”

<sup>5</sup>Patudhundo na'a doangkafie kosasawindo mie marasaeano. Dadi'anomo dopilimo Stefanus, seemie motangkano kaparasaea bhe nekabhintino Rohino Lahata'ala. Dopilimo dua Filipus, Prokorus, Nikanor, Timon, Parmenas bhe Nikolaus. Nikolaus ini mieno Antiokia, tamaka nopesuamo agama Yahudi. <sup>6</sup>Mie pipituno ini doowadamo ne wisendo rasulu. Rasulu dosambahea'anda bhe dotei limando te wawondo katandainomo desaloanda kabarakatino Ompu Lahata'ala.



<sup>7</sup>Bhoasaono Ompu Lahata'ala sadhulu-dhulu ka'ewa nolelea. Mie marasaeano we Yerusalem sedhulu'amo dua kabhahindo. Dobhahi dua imamu tumuhuno maka doparasaea ne Yesus.

### Stefanus dohakoe

6:8-15

<sup>8</sup>Stefanus nopono'ao kabarakati bhe kuasano Lahata'ala sampe nobhahi nehabu tanda tapa mentela bhe giu timenteaono ne mie bhahi. <sup>9</sup>Tamaka nandoo dua mewangie. Andoa ini umatino Yahudi nekonando umati Libertini (ma'anano bhatua nefobebasi), domai'ao we kotano Kirene bhe kotano Aleksandria. Dose'ise bhe miendo Yahudi mai'aono we kadieno Kilikia bhe Asia maka domai dopotagali bhe Stefanus hampano miina damarasaea putae Yesus Omputo Fosalamatino. <sup>10</sup>Tamaka andoa ini miina datumanggoa doewangi pugauno Stefanus, hampano Rohino Lahata'ala ma'ane kapande. <sup>11</sup>Dadi'anomo deponambomo mie so dapugau'ao, "Tafetingke mie aini no'umbu Musa bhe Ompu Lahata'ala!" <sup>12</sup>Pedamo na'a andoa dewudhu mie bhahi, kamungkula'i, bhe pande-pande Kitabi, maka dohako Stefanus. Lasao dobulue ne wisendo Sahano Agama. <sup>13</sup>Andoa deowa'i dua sakusii megau-gauno. Ambado sakusii na'a, "Mie aini miina bhe fetumpua nofekandidiki Lambu mongkilono ini bhe Kitabino Musa. <sup>14</sup>Insaodi tafetingkee dua ambano, 'Yesus mai'aono we Nasaret maitu namohansuru Lambuno Lahata'ala ini, tubhono adhati kahunsa'aontoomu ne Musa nabhalii'e!' " <sup>15</sup>Kosasawindo mie mengkohano weo hompu'a maitu dotonto Stefanus, gaha'a dowoha ulano pasae ulano mala'ekati.

### Katobhoosino Stefanus

7:1-53

**7** Ambano Imamu Bhalano, "Nokotu'u peda na'a?" <sup>2</sup>Notobhoosimo Stefanus ambano, "Bhahitie'iku bhe kamungkula'iku, fetingke kanau'omu! Ompu Lahata'ala kumalabhiano nofotiwoha Wutono ne awuantoomu Abraham. Wakutuu ana'a Abraham nandoo'e we Mesopotamia, miina'o naeate we Haran. <sup>3</sup>Ambano Lahata'ala ne Abraham, 'Hunsamo liwumu bhe bhahitie'imu, maka kala we liwu so nefosusu'aoku.' <sup>4</sup>Dadi'anomo Abraham nohunsamo liwuno Kasdim maka neate we Haran. Nomate kaowu amano, Lahata'ala notuduemo toha nagumampi ne ini, kaeate'antoomu ampa aini." <sup>5</sup>Ne

<sup>a</sup> 7:2-4 Kej 11:31 - 12:9

na'a Lahata'ala miina nama'anea wite mahingga nasekulepe kaowu mbali kahunsa'aono. Ampamo kaowu, Lahata'ala nopodhandi nama'ane wite aini so fehebua'ano bhe so kahunsa'aono ne sampu'ano, mahinggamo wakutuu ana'a miina'o nakoanaa.<sup>a</sup> <sup>6</sup>Bhoasaono Lahata'ala na'a peda aini, 'Sampu'amu daeate peda mie humampe we koliwuno, andoa dahumabuda so bhatua, damodee-deeda ampa nafato mo'ono ta'u. <sup>7</sup>Maka mieno liwu mobhatuada, amekanarakaada dua. Namada ana'a, ambano Lahata'ala, sampu'amu dahumunsamo dua liwu aitu maka dasumambahea ne Idi ne wite aini.<sup>b</sup> <sup>8</sup>Palusi ana'a Lahata'ala nofokonandooanemo tutuhano kasuna, peda tandano kafekatangano podhandino bhe Abraham. Pedamo na'a Abraham nokoana'ao Ishak, sakapono alu oleo umuhuno nosunaemo. Ishak nokoana'ao Yakub, maka Yakub nokoana'ao doompulu hodua, andoa maitu awua'intoomu miendo Yahudi ini.<sup>c</sup>

<sup>9</sup>Awua'intoomu na'a doaso aindo konea'ano Yusuf mbali bhatua we witen Mesir mba'inomo kakoulano lalondo, tamaka Lahata'ala sadhia nopobhaiane.<sup>d</sup> <sup>10</sup>Lahata'ala nofolapae mai'ao ne sabhaha kasabha sampe nowa'ane kabarakati bhe kapande wakutuuno nowiseki Firaun, omputo we Mesir. Hato pandano Firaun nosangkee mbali kafeompu'a we Mesir, mbalimo dua mande'aono kamalino.<sup>e</sup>

<sup>11</sup>Pada ana'a nonandoomo gaba bhalano we witen Mesir bhe witen Kanaan. Awua'intoomu dosabha sepali'a mba'inomo miinamo dako'otia. <sup>12</sup>Wakutuuno Yakub nofetingke gaha'a we Mesir nandoo bhe gandum, notudumo awua'intoomu dakumala dae'oli oti we Mesir. Ana'amo pakakalando. <sup>13</sup>Hato dofendua dokala, Yusuf nofotipande'aomo wutono ne bhahitie'ino. Kane'omo ne na'a omputo Firaun nopande'aane kamai'ao'ano Yusuf.<sup>f</sup> <sup>14</sup>Pada ana'a Yusuf netudumo mie da'umulei Yakub amano bhe lee walakano. Kosasawindo dofitu fulu lidima. <sup>15</sup>Pedamo aitu Yakub nokalamo we Mesir; ne itumo anoa bhe awua'intoomu domate. <sup>16</sup>Maeatindo dosuliandamo we Sikem maka dokobuhuda ne wite ka'oli'ano Abraham. Wite kafokobuhu'a na'a no'oliane dhoi pera ne ana'ino Hemor we Sikem.<sup>g</sup>

---

<sup>a</sup> 7:5 Kej 12:7, 13:15, 15:18, 17:8

<sup>b</sup> 7:6-7 Kej 15:13-14; Kel 3:12

<sup>c</sup> 7:8 Kej 17:1-27, 21:1-7, 25:19-26, Kej psl 29-35

<sup>d</sup> 7:9 Kej psl 37, 39

<sup>e</sup> 7:10 Kej psl 40-41

<sup>f</sup> 7:11-13 Kej psl 42-45

<sup>g</sup> 7:14-16 Kej psl 45-46; 23:3-16

<sup>17</sup>Wakutuuno dhandino Ompu Lahata'ala ne Abraham noma'omo nako'ula, miendo Israel we Mesir sadhulu-dhulu kabhahi. <sup>18</sup>Panda-pandano noehemo seemie omputo bu'ou we witeno Mesir, tapa mande'aono Yusuf. <sup>19</sup>Omputo na'a no'akalai awua'intoomu bhe no-fodee-deeda. Nofosuhuda da'umohofi ana'i kahobundo domate'ao. Patudhuno keana dolee.<sup>a</sup> <sup>20</sup>Ne na'amo dua kalente'ano Musa. Ana'i aini netaa ne pomatano Lahata'ala. Tolu wula kaomponano do-damba'aane we lambuno kamungkulano. <sup>21</sup>Pada aitu do'oohoemo dua, tamaka no'enee kalambeno Omputo Firaun maka nodamba'aane kabeanga anano wutono. <sup>22</sup>Musa dofoguhuane sabhaha kapandendo miendo Mesir, sampe pugau bhe habuno nokokuasamo.<sup>b</sup>

<sup>23</sup>Nohato umuhuno fato fulu ta'u, Musa nokamba lalono napowoha bhe bhahitie'ino miendo Israel. <sup>24</sup>Wakutuu aitu gaha'a nowohamo seemie Israel tangasano nofekolea-lea'ie mieno Mesir, lasao nopobenteane sampe nopongko mieno Mesir na'a. <sup>25</sup>Weo fekihino Musa, miendo Israel damande'aanemo putae Lahata'ala namake anoa so mobebasida, tamaka gaha'a miina damande'aanea. <sup>26</sup>Hato nomentae nowohamo dua dohodua miendo Israel dopogiha, lasao nokala no'ontada patudhuno napometaa'anda. Ambano, 'Hintimiu ini sibhahitie'omu, noafa gaha'a pogiha'ao'omu?' <sup>27</sup>Tamaka o mie wanduno sabhangkano maitu tanodhudhulao Musa bhe nopugau, <sup>28</sup>'Nosangkeko la'ae gaha'a membali so neangka bhe so bhitahaki kainsami? Bhaha'i kopatudhu dua mongko kanau nada miendo Mesir endewi?' <sup>29</sup>Nofetingke peda maitu Musa lasao nofilei maka neate we liwundo miendo Midian. Ne itu nokoana'ao dua dohodua sanea mo'ane.<sup>c</sup>

<sup>30</sup>Nokapo fato fulu ta'u neate-ate ne itu tanowohamo dua seemie mala'ekati we pandaso bhalano we owano kabhawono Sinai. Nowohae weo hendeno efi ne polompuno kahoku kokihi. <sup>31</sup>Nomente Musa nowoha ana'a, ngko'omoa nokalamo name'ondoe ne owano, gaha'a tanofetingkemo suahano Ompu ambano, <sup>32</sup>'Idimo ini Ompu Lahata'alando awua'imu, Lahata'alano Abraham, Lahata'alano Ishak bhe Lahata'alano Yakub.' Musa nohengku'ao kate'i sampe miinamo naokadoa na'umondoea. <sup>33</sup>Nokowambamo toha Lahata'ala, 'Alie kaampini ne a'emu itu, hampano wite kaeche-ehe'amu itu wite mongkilo. <sup>34</sup>Idi awohaemo kakadee-deendo umatiku we witeno

---

<sup>a</sup> 7:17-19 Kel psl 1

<sup>b</sup> 7:20-22 Kel 2:1-10

<sup>c</sup> 7:23-29 Kel 2:11-15, 18:2-4

Mesir, fedeendo afetingkeemo. Kasampu'aku ini, amobebasida. Dadi'anomo maimo, atumudukomo sumuli we witeno Mesir.'<sup>a</sup>

<sup>35</sup>Musa ini dobansiemu bhe dopugau ambado, 'Nosangkeko la'ae gaha'a membali so neangka bhe so bhitahaki kainsami?''<sup>b</sup> Tamaka ingka Musamo dua ini netuduno Ompu Lahata'ala ne mbali so neangka bhe so fosalamatino, weo katulumino mala'ekati motiwohano wutono ne polompuno kahoku kokihi. <sup>36</sup>Anoamo dua wowo'oda dolimba domai'ao we witeno Mesir, nehabuanda giu timent'e'aono bhe tanda tapa mentela notanda we witeno Mesir, ne Te'i Modea bhe we pandaso bhalano fato fulu ta'u kaomponano.<sup>c</sup> <sup>37</sup>Anoamo dua ini mugauno ne miendo Israel, 'Namada kaowu Lahata'ala naefoeheangkoomu seemie anabii peda idi ini namai'ao ne bhahitie'imiu.'<sup>d</sup> <sup>38</sup>Wakutuuno umatino Israel dohompu we pandaso bhalano, Musamo dua ini membalino potato'aono wambano mala'ekati bhe awua'intoomu. O mala'ekati na'a nokowamba ne Musa te kabhawono Sinai. Ingka anoamo dua tumahimano bhoasao meowano dadi mai'aono ne Ompu Lahata'ala so nefosampe ne hintimiu.'<sup>e</sup> <sup>39</sup>Tamaka awua'intoomu dongahe damangkafi pugauno, bhahaa tadobansimo dua. Gaondo dasumulimo toha we witeno Mesir. <sup>40</sup>Desalomo ne Harun ambado, 'Mehabu kaita se'ulu haa ulu patung so ompu mani, somo ma'indulu kainsami. Kapa'amo Musa na'a, neangka mani tamai'ao we witeno Mesir, miinamo tamande'aanea bhaha'i noafamoa.'<sup>41</sup> Kaowua dehabumo patung, sandahano anano sapi. Pada aitu desumbelemo kadadi mbali dopopanga ne patung ana'a. Kaiando maka bhe dohome-hame dowoha angka'ano limando.'<sup>f</sup> <sup>42</sup>Nowoha amaitu Ompu Lahata'ala nokukundodamo maka tanokatahodamo dototohana bhe dosomba ne kulipopo te lani. Aini noposahataamo bhe tibuhi'ano weo Kitabindo anabii,

'Miendo Israel!

Kaomponano fato fulu ta'u we pandaso bhalano mefoampe kanau'omu bhahaa kadadi nesumbele?

<sup>43</sup> [Ingka miina sepali'a!]

---

<sup>a</sup> 7:30-34 Kel 3:1-10

<sup>b</sup> 7:35 Kel 2:14

<sup>c</sup> 7:36 Kej psl 7-17

<sup>d</sup> 7:37 Ul 18:15

<sup>e</sup> 7:38 Kel psl 19-20; Ul psl 5

<sup>f</sup> 7:39-41 Kel psl 32

Tadua owa-owaomu kalambu-lambu barahala dewa  
 Molok  
 bhe patungno kulipopo Refan;<sup>a</sup>  
 saneamo patung kahabumiu maka sombai'eomu mbali  
 ompumiu.  
 Dadi'anomo a'umohokoomu ampa we simbalino  
 liwuno Babel.'

<sup>44</sup>Nandoo tenda katandaino kaeate'ano Lahata'ala nehabundo awua'intoomu we pandaso bhalano. Tenda ana'a dohabue do-angkafi pahintano Lahata'ala ne Musa, peda katuno tenda nefotiwohano Lahata'ala ne Musa.<sup>b</sup> <sup>45</sup>Tenda ana'a dotahimae awua'intoomu maka doowa-owae wakutuuno dengkohafi wite aini. Ne na'a Yosua neangkando. Dohato awua'intoomu, mie meateno ne wite aini nogihasila Lahata'ala. Tendano Lahata'ala na'a dopomantulu-ntuluane ampa ne dhamanino omputo Daud.<sup>c</sup> <sup>46</sup>Daud nofeka'ia lalono Lahata'ala, nesalo naefoehelambu so kaeate'ano Lahata'ala nesombaino Yakub.<sup>d</sup> <sup>47</sup>Tamaka omputo Salomo mefoeheno Lambuno Lahata'ala.<sup>e</sup> <sup>48</sup>Ampamo Lahata'ala Foliuno Kuasa miina naeate ne lambu kahabundo manusia, peda tibuhi'ano weo Kitabindo anabii,

<sup>49</sup>'O lani kaengkoha'aku,  
 o dhunia kafinda'aku.

Lambu ae gaha'a mefongkoha kanau'omu?' ambano  
 Ompu.

'Ne amai gaha'a so kafewule'aku?

<sup>50</sup>Ingka kosasawi'ae na'a sanea angka'ano limaku.' <sup>f</sup>

<sup>51</sup>[Ambano toha Stefanus,] "Hintimiu katu'a fotu! Lalomiu miina naongkiloa. Tingalamiu nopo'opi. Hintimiu sadhia ewangiomu Rohino Lahata'ala, nopototo bhe awua'imiu! <sup>52</sup>Anabii la'ae bhahaa tapa nefodee-deendo awua'imiu? Bhahaa tadua dpongkomo mie katudu mefoleleno bhihita so kahato'ano Mie Metaano Lalo. Anoa

<sup>a</sup> 7:42-43 Amos 5:25-27. Molok neano dewando miendo Kanaan. Dhalano dosombai'e o kamungkula do'ohofi ana'i kahobundo weo efi mbali kapopangando. Refan neano dewa nesombai dhamani wawono, doabhih nokokuasa bhe nopokai bhe kulipopo Saturnus.

<sup>b</sup> 7:44 Kel psl 25-27

<sup>c</sup> 7:45 Yos 3:14-17

<sup>d</sup> 7:46 2Sam 7:1-16; 1Taw 17:1-14

<sup>e</sup> 7:47 1Raj psl 6; 2Taw psl 3

<sup>f</sup> 7:49-50 Yes 66:1-2

na'a padamo pokanagauaneomu bhe pongkoe'omu. <sup>53</sup>Ingka hintimiu tahimae'omu tubhono agama weo Kitabino Musa nefosampendo mala'ekati, tamaka gaha'a miina mangkafie'omua.”

### Stefanus dopongkoe

7:54-60

<sup>54</sup>Sadofetingke pugauno Stefanus na'a kamungkula'i Sahano Agama pasae dokansu'ue atendo sampe doku'i bhe nau-naundo. <sup>55</sup>Tamaka Stefanus nokabhintie Rohino Lahata'ala, nototohana te lani maka nowoha kakalabhiano Lahata'ala bhe Yesus neeche-ehe ne sohihino Lahata'ala. <sup>56</sup>Nopugaumo Stefanus ambano, “Soba ondoomu, awoha lani notilengka bhe Anano Manusia neeche-ehe ne sohihino Lahata'ala.” <sup>57</sup>Maka kamungkula'i dopokakei-kei bhe do'opi tingalando, lasao dosilumpa-lumpaki'ae. <sup>58</sup>Dobulue we simbalino kota maka dobhatumbuliane kontu. Sakusii andoa ini dolembisi dhubando maka dohunsae ne wiseno seemie ana'i mo'ane konea'ano Saulus. <sup>59</sup>Tangasano dobhatumbulie Stefanus nofedee-mo ambano, “Ompu Yesus, tahimamo inawaku!” <sup>60</sup>Poangka nofongkoha tuuno nokeimo fekabhala-bhala, “Ompu, koise fotongku-andae dhosa aini!” Palusi nopugau peda na'a, nobhotumo inawano. Saulus no'unda dua Stefanus dopongkoe.

### Saulus nofodee-dee umati marasaeano we Yerusalem

8:1-3

**8** Notandamo oleo ana'a umati marasaeano we Yerusalem dofo-dee-deeda sepali'a. Andoa dopuli dotigasa dohope we witeno Yudea bhe Samaria, ampamo kaowu rasulu'i miina. <sup>2</sup>Mie lumebeno dokalamo dokobuhu maeatino Stefanus bhe dekangko'ae. <sup>3</sup>Tamaka Saulus nokopatudhu namohansuru umati marasaeano maitu. Nopesuaki lambudo noala se'onue, namo'ane nahobhine nobuluda nofopesuada weo katohongku.

### Filipus we Samaria

8:4-25

<sup>4</sup>Mie marasaeano tigasano maitu dolili ne amai liwu poowa dofolele Bhihita Metaa. <sup>5</sup>Filipus nokala ne se'onu kota we Samaria maka nefebhihitaianda Mesias, Omputo Fosalamatino. <sup>6</sup>Dofetingke pugauno Filipus bhe dowoha dua tanda-tanda tapa mentela nehabuno, kosasawindo miendo kota dosekakolalo dotahimae bhe

dotei'e weo namu-namundo. <sup>7</sup>Kapa'amo dobhahi seetani lumimbanano mai'ao ne mie nepesuakindo, dokei ampa kabhalano wobhando. Dobhahi dua kalu bhe kakempa nefeka'osano. <sup>8</sup>Dadi'anomo ka'iando maka miendo kota aitu.

<sup>9</sup>Weo kota aitu nandoo dua seemie konea'ano Simon, nomponamo nehabu pasingara sampe domenteane sepali'a ra'eatino Samaria. Mie aini noabhi wutono tapedamo mie kokuasa. <sup>10</sup>Kosasawindo mie, namie bhalano namie ndidiki dofetingke sepali'a pugauno. Ambado, "Mie aini sahangkano kuasano Lahata'ala, nekonando Kuasa Bhalano." <sup>11</sup>Andoa dofetingke pugauno hampano nomponamo nofobuagaanda pasingara nehabuno maitu. <sup>12</sup>Tamaka aitu mie doparasaeamo ne Filipus. Anoa nefoleleanda bhihitano Kafo-pahinta'ano Lahata'ala bhe bhihitano Yesus Kristus. Namo'ane nahobhine dokadiuda. <sup>13</sup>Mahingga wutono Simon noparasaea dua. Pada dokadiu'e sadhia nopoangkafi bhe Filipus. Nopuli dua menteno nowoha tanda-tanda tapa mentela bhe giu timente'aono nehabuno Filipus.

<sup>14</sup>Miina naomponaa rasulu we Yerusalem dofetingkemo gaha'a miendo Samaria dotahimamo bhoasaono Lahata'ala. Dadi'anomo dotudumo Petrus bhe Yohanes dakumala we na'a. <sup>15</sup>Sahatondo, kohoduando rasulu maitu dosambaheamo, desaloanda daetahima Rohino Lahata'ala. <sup>16</sup>Kapa'amo Rohino Lahata'ala miina'o nakumabhintidaa, kane'o dokadiuda weo neano Ompu Yesus. <sup>17</sup>Kohoduando dotei limando te wawondo miendo Samaria maitu maka detahima Rohino Lahata'ala.

<sup>18</sup>Simon nowoha gaha'a kaetahima'ando Rohino Lahata'ala mba'inomo rasulu dotei limando te wawondo mie. <sup>19</sup>Nowoha peda amaitu, nofodhuluandamo dhoi bhe nopugau ambano, "Wa'a kanau'omu bhe idi kuasa medando itu, neanomo ane atumei dua limaku te wawondo mie bhaiku daetahima dua Rohino Lahata'ala." <sup>20</sup>Tamaka ambano Petrus, "Pesuamo narakaa bhe dhoimu itu! Saomua kadawuno Lahata'ala do'oliane dhoi?" <sup>21</sup>Miina bhe hakumua weo kahadhaa mani ini, hampano totono lalomu miina naelaa'a ne pomatano Lahata'ala. <sup>22</sup>Dadi'anomo fetompa'aomo podiu modaimu inia, maka sambahea ne Ompu so nati'amponi'ao dukuno lalomu modaino ini. <sup>23</sup>Kapa'amo awohako itu, totono lalomu itu notolaumo kakoulano pedamo kapa'ino ufei, nogogantue-mo isikadhi modai." <sup>24</sup>Ambano Simon, "Mesalo kanau'omu ka'asi ne Ompu keana noko'ula pugaumu itu."

<sup>25</sup>Pada detula-tula dosakusii'ao Yesus bhe defolele bhoasaono Lahata'ala, Petrus bhe Yohanes dosulimo we Yerusalem. Wakutuu-no dosuli, nobhahi dua liwu ne kadieno Samaria kaefolele'ando Bhihita Metaa.

**Filipus nokadiu kabhala mai'aono we Etiopia**

**8:26-40**

<sup>26</sup>Seemie mala'ekatino Ompu nopugaumo ne Filipus ambano, “Kalamo humanda we salata, we kaangka'a mai'aono we Yerusalem humope'ano we Gasa.” Kaangka'a ana'a nolino. <sup>27</sup>Dadi'anomo Filipus nokalamo. Ne na'a nandoo seemie mo'ane, o kabhala mai'aono we Etiopia. Anoa ini mintahano kahangkaeano Kandake. Kandake ini omputo hobhine mahintangino witeno Etiopia. Mo'ane aini nokala nosombai Lahata'ala we Yerusalem. <sup>28</sup>Wakutuu ana'a nohatomo we sala nasumulimo. Tangasano nengkoha-ngkoha weo kareta kasawi'ano, nobasa-basa Kitabino anabii Yesaya. <sup>29</sup>Ambano Rohino Lahata'ala ne Filipus, “Kala ma'oti kareta atatu!” <sup>30</sup>Filipus lasao nokala noma'otie maka nofetingke kabhala amaitu nandoo nobasa Kitabino anabii Yesaya. Filipus nofeenaemo, “Pande'aane bhahaa ma'anano nebasamu itu?” <sup>31</sup>Notobhoosimo ambano, “Nada amai amande'aane gaha'a ma'anano ane pae bhe so tumalesa kanau'e?” Maka nosali'i Filipus namoni te wawono karetano naengkoha ne sohihino. <sup>32</sup>Aeatino Kitabi nebasano na'a peda aini,

“Pedamo se'ulu dhumba doowae se kaesumbele'a kadadi;

kabeanga anano dhumba miina nakodiu ne wisendo mie kumuhuno wuluno, pedamo ana'a anoa miina nakosuaha'a.

<sup>33</sup>Anoa dofompina-mpinae, kabhotusindo miina na'umadhilia sampe doalae bhe inawano.

Dadi'anomo miinamo bhe sumambiliea sampu'ano.”<sup>a</sup>

<sup>34</sup>Maka ambano kabhala ana'a ne Filipus, “Ameenako, la'ae bhahaa nepulao'aono anabii ini? Nopulao'ao wutono bhaha'i o mie sigao'ano?” <sup>35</sup>Dadi'anomo Filipus nopugaumo. Notanda ne aeati sa'ituini nofohatoanemo Bhihita Metaa, bhihitano Yesus. <sup>36</sup>Andoa dokala kansuhu, gaha'a dehatomo ko'oe'ano. Ambano kabhala

<sup>a</sup> 8:32-33 Yes 53:7-8





*Filipus bhe kabhala mai'aono we Etiopia*

maitu, “Ingka inia o oe, nandoo bhahaa nekaemiku ane daku-madiu kanaumo?” <sup>37</sup> [Notobhoosimo Filipus, “Ane nokampuumpuumo lalomua weo kaparasaeamu, naembalimo dakumadiuko.” Ambano toha, “Aparasaeamo Yesus Kristus Anano Lahata'ala.”] <sup>38</sup> Mieno Etiopia maitu notududamo damofetumpu kareta kasawi'ando. Kohoduando, Filipus bhe mieno Etiopia maitu, lasao dosampu weo oe maka Filipus nokadiu'e. <sup>39</sup> Dofoni domai'ao weo oe, Filipus tamba'omo nosangkee Rohino Ompu sampe miinamo naohaea kabhala mai'aono we Etiopia maitu, tamaka weo kawulano lalono nofopansuhumo kala-kalano. <sup>40</sup> Gaha'a nofengkana'ao lalono Filipus nohatomo we Asdod. Anoa nokala kansuhu poowa nefolele Bhihita Metaa ne sabhaha liwu ampa nohato we kotano Kaisarea.

**Saulus nodolimo ne Lahata'ala, noparasaeamo ne Yesus  
9:1-19a**

**9** Wakutuu ana'a Saulus nandoo noka'ende-ende lalono na'umamba bhe namongko mangkafino Yesus. Anoa nopo'awa'ao Imamu Bhalano <sup>2</sup> nesalo suha kuasa. Suha ana'a namowae ne kamungkula'i mande'aono lambu kasambahea'ando miendo Yahudi we kotano Damsyik. Patudhuno ane napo'awa'ao mie mangkafino Kaangka'ano Ompu Yesus namo'ane nahobhine, naembali nahu-makofida maka namosulida we Yerusalem.

<sup>3</sup>Gaha'a we laano sala, noma'omo we Damsyik tamba'omo nokalibue tilanga nomai'ao te lani. <sup>4</sup>Saulus lasao notihambitao we wite, maka nofetingke suaha ambano, "Saulus, Saulus, noafa gaha'a fodee-dee kanau?" <sup>5</sup>Ambano Saulus, "La'ae gaha'a hintu itu waompu?" Notobhoosimo suaha ana'a, "Idi ini Yesus nefodee-deemu itu. <sup>6</sup>Aitu wanu'o toha, pesuamo weo kota, ne itu damohatoangkomo so nehabumu."

<sup>7</sup>Sabhangka'ino weo kala-kalano na'a tadotongo, hampano dofetingke suaha, tamaka miina dakoniwohaa. <sup>8</sup>Saulus noehemo maka nofowula matano, tamaka miina nafowohaa. Dadi'anomo dotondaemo dopesua'ane we Damsyik. <sup>9</sup>Tolu oleo miina nafowohaa, miina naomaa'a bhe miina dua naoho'ua.

<sup>10</sup>We Damsyik na'a nandoo seemie mangkafino Yesus, neano Ananias. Nofohatoe Ompu weo powoha, ambano, "Ananias!" Notobhoosimo, "Uumbe Ompu!" <sup>11</sup>Nokowambamo dua Ompu, "Kalamo we kaangka'a konea'ano Sala Melaa. Ondofi we lambuno Yudas seemie mai'aono we Tarsus, neano Saulus. Ampa aitu tangasano nosambahea. <sup>12</sup>Weo powohano nowoha seemie konea'ano Ananias nopesua weo lambu maka notei limano te wawono so nafowoha'ao toha." <sup>13</sup>Ambano Ananias, "Ompu, nobhahimo kafetingke'aku mie ana'a, notolau kadaino podiuno ne umatimu mongkilono we Yerusalem. <sup>14</sup>Kahato'ano dua ne ini newowo'o suha kuasa mai'aono ne meangka'indo imamumu nahumakofi mie sumambilino neamu." <sup>15</sup>Tamaka Ompu nokobhoosaomo toha, "Kalamo, kapa'amo anoamo ini nepiliku so palima-limaku, naefebhilitai'ao neaku ne sabhaha bansano liwu suano Yahudi, ne sabhaha omputo bhe ne miendo Israel dua. <sup>16</sup>Idi amotiwohaane kabhahino kakadee-dee so nenamisino mba'inomo neaku."

<sup>17</sup>Pada aitu Ananias nokalamo maka nopesua weo lambu ana'a. Noteimo limano te wawono Saulus bhe nopugau ambano, "Saulus, bhahitieu, Ompu notudu kanau amai ne ini, Anoamo Ompu Yesus motiwohano Wutono we sala kaangka'amu. Kahato'aku neanomo sumuli toha fowoha bhe nakumabhintiko Rohino Lahata'ala." <sup>18</sup>Gaha'a tamba'omo kabeanga'ida anano kenta nosimotanta'a mai'ao ne matano Saulus, lasao nofowoha toha. Pada aitu noehemo maka dokadiu'e. <sup>19a</sup>Pada nohumaa sulimo toha no'osa.

**Saulus nefolele Bhihita Metaa we Damsyik**  
9:19b-25

<sup>19b</sup>Ampa se'oleo haa oleo, Saulus nandoo neate-ate bhe mangkafino Yesus we Damsyik. <sup>20</sup>Lasao dua nopesua weo lambu-lambu kasambahea'a nefebhihitai'ao putae Yesus Anano Lahata'ala. <sup>21</sup>Kosasawindo metingkeno domente ambado, “Ingka miemo anoa ini mobinasano mie sumambilino neano Yesus we Yerusalem endefi'ini! Pakade kahato'ano ne ini patudhuno nahumakofi mangkafino Yesus naowa'ida ne meangka'indo imamu.” <sup>22</sup>Tamaka Saulus sadhulu-dhulu kabhala kuasano, kapa'amo nobhahimo nofotiwoha bukutii putae Yesus maitu kotu-kotu'u Mesias, Omputo Fosalamatino, sampe miendo Yahudi we Damsyik nomate akalando.

<sup>23</sup>Nopalusi se'oleo haa oleo miendo Yahudi dopugau-gaumo damongkoe. <sup>24</sup>Tamaka isikadhindo modai'ano na'a nohato dua ne Saulus. Mentae mohondo Saulus dokantaa'e ne amai fointono kota, patudhundo damongkoe. <sup>25</sup>Tamaka sealo mie mangkafie dofopesua Saulus weo kalangka maka dofosibulue we sewetano benteno kota.

**Saulus we Yerusalem**  
9:26-31

<sup>26</sup>Sahatono we Yerusalem Saulus nofesoba nokapotimo mangkafino Yesus, tamaka kosasawindo dote'ie, mba'inomo miina damarasaea anoa ini nembalimo dua mangkafino Yesus. <sup>27</sup>Mpahinomo Barnabas kumala'ie maka noowae ne rasulu'i. Barnabas netulataandamo Saulus nowoha Ompu we laano sala maka Ompu nopugau bhe anoa. Netula-tulaanda dua kakadono Saulus nofebhihitai'ao neano Yesus we Damsyik. <sup>28</sup>Dadi'anomo Saulus nopohompu-hompumo bhe andoa we Yerusalem. Nokado sepali'a nofebhihitai'ao neano Ompu Yesus. <sup>29</sup>Anoa nopuga-pugau dua bhe doposalama'ana bhe miendo Yahudi mepakeno wamba Yunani, hampano andoa miina damarasaea putae Yesus Omputo Fosalamatino, Tamaka andoa ini de'ondofi katolala damongkoe. <sup>30</sup>Sadopande'aane, bhahitie marasaeano lasao dowowo'oe we Kaisarea maka dofopansuhue we Tarsus.

<sup>31</sup>Nomampona-mpona dua umati marasaeano we kadieno Yudea, Galilea bhe Samaria deate-ate weo katohopo. Umati andoa ini

dhulu katangka kaparasaeando bhe dodadi weo kate'i ne Ompu. Weo katulumi bhe kalawesino Rohino Lahata'ala andoa sadhulu-dhulu kabhahi.

**Petrus nofeka'osa Eneas bhe nofodadi Dorkas**

9:32-43

<sup>32</sup>Wakutuu ana'a Petrus nolili ne amai liwu. Weo kala-kalano maitu noangkai dua umati mongkilo we liwuno Lida. <sup>33</sup>Ne itu popo'awa'ao seemie kalu, neano Eneas. Alu ta'umo sandole ne kaodo'ano. <sup>34</sup>Ambano Petrus, “Eneas, aitu Yesus Kristus nofeka'osako, wanu'o toha maka fosintuwu kaodo'amu!” Eneas lasao nowanu. <sup>35</sup>Kosasawindo miendo Lida bhe kadieno Saron dowoha Eneas, maka dodolimo bhe doparasaea ne Ompu.

<sup>36</sup>We kotano Yope nandoo seemie hobhine mangkafino Yesus, neano Tabita; weo wamba Yunani neano Dorkas.<sup>a</sup> Hobhine ana'a nobhahi sepali'a nehabu metaa'ano, sadhia netulumi mie mokae. <sup>37</sup>Wakutuu aitu nosaki maka nomate. Pada dokadiu'e maeatino dofondolee weo boloku te wawo. <sup>38</sup>Liwuno Lida nopoma'oti bhe Yope na'a. Dofetingke Petrus nohato we Lida, mangkafino Yesus detudumo dohodua daesalo ne Petrus ambado, “Maimo fekahimba we liwu mani.” <sup>39</sup>Petrus lasao nokanu maka noangkafida. Sahatono, Petrus dofofonie te wawo. Kosasawindo bhihinanda dolibu-libue bhe do'ae, poowa dofotiwohaane bhadhu bhe pakea kasapu'ano Dorkas nandoo no'uhi itu. <sup>40</sup>Tamaka Petrus notududa dalumimba kosasawindo maka nofongkoha tuuno nosambahea. Pada ana'a nodolimo ne maeati maitu maka nopugau, “Tabita, wanu'o toha!” Tabita nofowulamo matano. Sanowoha Petrus, lasao nowanu nengkoha. <sup>41</sup>Petrus nointahamo limano maka nofoehee. Pada ana'a nolo'oimo umati mongkilo bhe bhihinanda'i maka nofosusuanda hobhine sumuli mo'uhino maitu. <sup>42</sup>Bhihitano kadhadhia aini nokolele ne koseka'ewa'ae kotano Yope maka do-bhahi sepali'a mie marasaeano ne Ompu Yesus. <sup>43</sup>Ampa se'oleo haa oleo Petrus nandoo neate-ate we Yope na'a, we lambuno seemie pande bhalula, konea'ano Simon.

---

<sup>a</sup> 9:36 Dorkas ma'anano bhangkele.

**Petrus bhe Kornelius**  
10:1-48

**10** We Kaisarea nandoo seemie suano Yahudi konea'ano Kornelius, anoa ini neangkando tantara. Kase'isendo tantara nepande'aono dokonae “Taguano Italia”.<sup>2</sup> Anoa ini mie lumebeno, kose'onu lambudo dote'i ne Lahata'ala. Anoa nobhahi pakuno netulumi miendo Yahudi mokaeno bhe sadhia dua nosambahea ne Lahata'ala.<sup>3</sup> Se'oleo, nahambi-hambi tolu matamo ma'oleo, nokopowohamo. Weo powohano na'a nentalea sepali'a nowoha mala'ekatino Lahata'ala nopesua weo lambuno maka nolo'oi neano, “Kornelius!”<sup>4</sup> Kornelius no'ondo mala'ekati aitu maka nofeena'ao kate'i, “O ae bhahaa Ompu?” Ambano mala'ekati na'a, “Kosasawi'ae sambaheamu bhe katulumimu ne mie mokaeno notahimaemo Lahata'ala maka Lahata'ala nofe'ulaikomo dua.<sup>5</sup> Aitu metudumo naseemie hodua so kumalano we Yope da'umulei Simon nekonando dua Petrus.<sup>6</sup> Anoa nobutu we lambuno Simon pande bhalula, meateno we wiwino te'i.”<sup>7</sup> Nokundo kaowu mala'ekati pugauno ne anoa na'a, Kornelius nosali'imo palima-limano dohodua bhe seemie tantara lumebeno, dhagano lambuno.<sup>8</sup> Pada nofohatoanda bhahi-bhahi'ae, notududamo dakumala we Yope.

<sup>9</sup>Nomentae, nahambi-hambi ompulu haa matamo pana oleo Petrus nofonimo te ato maka nosambahea.<sup>a</sup> Wakutuu ana'a mie totoluno sa'itu nandooda we sala tamaka doma'omo we Yope.<sup>10</sup> Petrus no'aho gaono naomaamo, tamaka tangasano detagana oti maitu tamba'omo nokopowoha.<sup>11</sup> Nowohamo lani notilengka maka bhe sibuluno, kabeanga o bhandu notikantai kofatosikua'ae nosampu we wite.<sup>12</sup> I'ino sabhaha kadadi fato mbali'ano a'e, kadadi sumola bhe ka'uhi lumola.<sup>b</sup> <sup>13</sup>Tanofetingkemo dua suaha ambano, “Petrus ehe, sumbeleda maka humaada!”<sup>14</sup> Tamaka Petrus notobhoosimo, “Paise Ompu, aongahe hampano miina'o aomaa'a giu moharamu bhe tapa mongkilo'ano.”<sup>15</sup> Ambano toha suaha ana'a, “Nefohalalano Lahata'ala, pae naembali moharamue hintu.”<sup>16</sup> Kadhadhia aitu sampe tolu paku, pada ana'a o bhandu sa'ituini notisangkemo toha te lani.

<sup>a</sup> 10:9 Atono lambu nopotate mbali kafewule'a.

<sup>b</sup> 10:12 Weo agama Yahudi nandoo kadadi tifoharamu'ano dohumaa'e, nandoo dua tihumaa'ano. Weo bhandu na'a tadopokunsa-kunsalomo.



*Powohano Petrus*

<sup>17</sup>Dukuno lalono Petrus, “O ae bhahaa ma'anano powohaku maitua?” Tangasano nofeki-fekihie, katuduno Kornelius umondo-fino kabutu'ano Petrus dohatomo te wiseno lambu. <sup>18</sup>Delo'oimo mie maka dofeena'ao bhaha'i lambumo aitu kabutu'ano Simon konea'ano dua Petrus.

<sup>19</sup>Tangasano Petrus nofesuhui ma'anano powohano sa'ituini, nofohatoemo Rohino Lahata'ala, “Bhe mie umondofiko dohodua. <sup>20</sup>Ehemo, sampu po'awaanda maka angkafida. Koe kamihi-mihia hampano Idi tumududa we inia.” <sup>21</sup>Petrus lasao nosampu no-po'awaanda maka ambano, “Ingka idimo ini ne'ondofimiua. Mai'ao'omu ae bhahaa?” <sup>22</sup>Ambado, “Notudu kainsami Kornelius. Kornelius ini seemie neangkando tantara, lalono nelaa bhe note'i ne Lahata'ala. Kosasawindo miendo Yahudi dopande'aanemo dua kataano lalono. Anoa ne'awa kafohato mai'aono ne Lahata'ala nefosampeno seemie mala'ekati mongkilono. Weo powohano na'a Lahata'ala nofohato Kornelius da'umuleiko kumala we lambuno nametingke'ao pugaumu.” <sup>23</sup>Dadi'anomo Petrus nopugauanda daodo kadeki ne itu.

Hato nomentae Petrus nowanumo maka dokala dopoowa-owa. Nandoo dua dohodua totolu bhahitie we Yope mangkafida. <sup>24</sup>Pooli nomentae dohatomo we Kaisarea. Kornelius nontaa-ntaadamo

pakade padamo nofohompuda bhahitie bhe sabhangka'ino. <sup>25</sup>No-hato Petrus maitu Kornelius lasao nopo'awaane, nolongko te wise-no bhe notaohao sombano. <sup>26</sup>Tamaka Petrus nofoehee ambano, “Ehe, idi ini ingka o manusia dua.” <sup>27</sup>Poowa detula-tula, Petrus no-pesuamo weo lambu, gaha'a dobhahi mie humompuno. <sup>28</sup>Ambano Petrus ne andoa, “Ingka pande'aaneomu o falia bhalano weo agama mani ane miendo Yahudi dopoana'ibhai bhe mie suano miendo Yahudi tawamoa dopesua weo lambudo. Tamaka Lahata'ala pada-mo nofotiwoha kana'e, pae naembalia akumona mie bhaiku do-haku tawa miina daongkiloa. <sup>29</sup>Kanandoo'anomo miina naobhie lalokua dosali'i kanau amai ne ini. Aitu gaokua amande'aane bhaha'i o ae patudhumiu sali'i kanau'omu.”

<sup>30</sup>Ambano Kornelius, “Netolumo hambu tolu mata, pedamo dua aitu oleoa, tangasano asambahea weo lambu tamba'omo awoha mie neehe-ehe ne wiseku, pakeano nokosilo. <sup>31</sup>Ambano mie ana'a, ‘Kornelius, sambaheamu bhe katulumimu ne mie mokaeno nota-himaemo Lahata'ala maka Lahata'ala nofe'ulaikomo dua. <sup>32</sup>Aitu metudu mie dakumala we Yope da'umulei Simon nekonando dua Petrus, anoa nobutu we lambuno Simon pande bhalula, meateno we wiwino te'i.’ <sup>33</sup>Dadi'anomo lasao aetudu mie da'umuleiko, hampano kataano lalomu ingka hatomo itua. Aitu tapohompu-hompumo ne wiseno Lahata'ala tametingke'ao kaowilino Laha-ta'ala so nefosampemu itu.”

<sup>34</sup>Pada aitu nopugaumo Petrus ambano, “Kotu-kotu'u kane'omo alosangie gaha'a Lahata'ala miina napo'ala-alaanda manusia. <sup>35</sup>Mie-no liwu ae maka, mahingga Yahudi mahingga suano Yahudi, sumanomo note'i ne Lahata'ala bhe nehabu metaa'ano, tetewei natumahimae Lahata'ala. <sup>36</sup>Ingka pande'aanemoomu bhihita nefo-sampeno Lahata'ala ne miendo Israel. Bhihita metaa na'a nofo-fohato'ao pometaa'ano manusia bhe Lahata'ala neowano Yesus Kristus, Ompundo kosasawindo manusia. <sup>37</sup>Ingka pande'aanemoo-mu dua sabhaha kumadhadhia'ano we witenyo Yudea, notanda we Galilea nopalusi kakadiu nehato'aono Yohanes. <sup>38</sup>Pande'aanemoo-mu dua Lahata'ala nopili Yesus miendo Nasaret maitu maka no-wa'ane Rohino bhe kuasa. Anoa nolili nehabu metaa'ano, ne-feka'osa sabhaha mie nekuasaino Kafeompu'ando seetani, mba'inomo Lahata'ala nopobhaiane. <sup>39</sup>Insaodimo ini sakusiino sabhaha nehabuno we witenyo Yudea bhe we Yerusalem, tamaka dopongkoe, dokantai'e te sau salipu. <sup>40</sup>Tamaka ne katolu oleono

nofowanuemo Lahata'ala nomai'ao ne mate, maka nofotiwoha-andae manusia. <sup>41</sup>Ampamo kaowu mohae suano sabhaha miea, tamaka sakusii nepilino wawo Lahata'ala, insaodimo ini. Insaodi tahumaa tafoho'u tapombali-mbali bhe Anoa palusi kawanu'ano mai'ao ne mate. <sup>42</sup>Yesus notudu kainsami tamolele Bhihita Metaa aini ne sabhaha liwu bhe tafofohato'ao putae Anoamo nepilino Lahata'ala so bhithakino mie dumadino bhe mateno. <sup>43</sup>Anoamo ini nepulao'aondo kosasawindo anabii putae ane damarasaea ne Anoa nati'amponi dhosando hampano kuasano neano.”

### O mie suano Yahudi detahima dua Rohino Lahata'ala

10:44-48

<sup>44</sup>Tangasano Petrus nopugau, nosampumo Rohino Lahata'ala nokabhinti kosasawindo mie metingkeno pugauno. <sup>45</sup>Miendo Yahudi marasaeano ne Yesus mangkafino Petrus maitu, kosasawindo tadomente mba'inomo dowoha Lahata'ala nowa'ao dua Rohino ne mie suano Yahudi. <sup>46</sup>Kapa'amo dofetingkeda dopugau depake wambano Rohi bhe dopudhi kakalabhiano Lahata'ala. Maka ambano Petrus, <sup>47</sup>“Naembali hampano datumagalidaa dakumadiuanda oe? Ingka andoa ini detahimamo dua Rohino Lahata'ala peda intaodiomu?” <sup>48</sup>Dadi'anomo Petrus notududamo dakumadiuda weo neano Yesus Kristus. Pada aitu desalomo ne Petrus naeate kadeki bhe andoa ampa nase'oleo haa oleo.

### Petrus nofokantibha wutono ne wisendo umati

we Yerusalem

11:1-18

**11** Rasulu bhe bhahitie marasaeano we Yudea dofetingkemo mie suano Yahudi detahimamo dua bhoasaono Lahata'ala. <sup>2</sup>Nohato Petrus we Yerusalem miendo Yahudi marasaeano doposalama'anaanemo. <sup>3</sup>Ambado, “Hintu ini pesua weo lambudo mie suano Yahudi tapa nesuna, pakade humaa pombali-mbali bhe andoa.”

<sup>4</sup>Tamaka Petrus notalesaandaemo sabhaha kumadhadhia'ano nomai'ao ne tulu-tulungano, ambano, <sup>5</sup>“Tangasano asambahea we Yope tamba'omo akopowoha. Nandoo kabeanga o bhandu notikantai kofatosikua'ae nosibulu nomai'ao te lani nosampu ne wiseku. <sup>6</sup>Afe'ondoe, gaha'a awohamo sabhaha kadadi fato mbali'ano a'e, kadadi mogila, kadadi sumola bhe ka'uhi lumola. <sup>7</sup>Maka



afetingke suaha nopugau kanau, 'Petrus ehe, sumbeleda maka humaada!' <sup>8</sup>Tamaka atobhoosi, 'Paise Ompu, aongahe hampano miina'o sepali'a aomaa'a giu moharamu bhaha'i tapa mongkilono.' <sup>9</sup>Tamaka nofendua toha suaha na'a nopugau kanau, 'Nefohalalano Lahata'ala, pae naembalia moharamue hintu!' <sup>10</sup>Ana'a noka-dhadhia sampe tolu paku maka kosasawi'ae na'a notisangke toha te lani.

<sup>11</sup>Nopobutu dua katudu totoluno mai'aono we Kaisarea umon-dofino idi dohatomo te wiseno lambu kabutu'a mani. <sup>12</sup>Ambano Rohino Lahata'ala ne idi, 'Kalamo angkafida, koemo kamihi-mihia!' Bhahitie nonono ini dopobhai kanau sampe tapesua weo lambuno Kornelius. <sup>13</sup>Anoa netula-tula kainsami nokopowoha'ao seemie mala'ekati neehe-ehe weo lambuno bhe nopugauane ambano, 'Metudu mie dakumala we Yope da'umulei Simon nekonando dua Petrus. <sup>14</sup>Anoa na'a namosampeangko bhihita so sumalamati'ao wutomu bhe kosasawindo meateno weo lambumu.' <sup>15</sup>Maka hatu apuga-pugau tamba'omo Rohino Lahata'ala nosampu nokabhinti andoa, pasae ne intaodiomu endefi'ini. <sup>16</sup>Tanokofe'ulaimo dua laloku ne bhoasaono Ompu, 'Yohanes nofokadiu'ao oe, tamaka hintimiu dakumadiuangkoomu Rohino Lahata'ala.' <sup>17</sup>Nentaleamo Lahata'ala nowa'anda kadawu peda dua ne intaodiomu pakatandano doparasaea'omu ne Yesus Kristus. Dadi'anomo ingka pae naembalia atumagali Lahata'ala!"

<sup>18</sup>Dofetingke peda maitu miinamo dakodiua, tadopudhimo kalabhiano Lahata'ala. Ambado, "Ingka gaha'a mie suano Yahudi nowa'anda dua kadawu Lahata'ala dametompa'ao dhosando so dadumadi'ao suhue dhamani!"

### Umati marasaeano we Antiokia

11:19-30

<sup>19</sup>Nopalusi dopongko Stefanus dobhahimo mie marasaeano dotigasa mba'inomo dofodee-deeda. Andoa dohato we kadieno Fenisia, we witeno Siprus bhe we kotano Antiokia. Tamaka defolele Bhihita Metaa ne miendo Yahudi kaowu. <sup>20</sup>Ne olotando andoa maitu nandoo dua miendo Siprus bhe miendo Kirene humatono we Antiokia. Andoa ini dopuga-pugau dua ne mie suano Yahudi dofohatoanda Bhihita Metaa putae Yesus maitu o Ompu. <sup>21</sup>Kuasano Ompu nopobhaianda maka dobhahi sepali'a marasaeano, dodolimo ne Ompu.

<sup>22</sup>Bhitha aini dofetingkee dua umati marasaeano we Yerusalem maka dotudu Barnabas nakumala we Antiokia. <sup>23</sup>Nohato we na'a Barnabas no'ia sepali'a nowoha kabarakatino Lahata'ala ne andoa maitu. Anoa notangahida kosasawindo nakumampuu-mpuu lalondo damasande ne Ompu. <sup>24</sup>Barnabas ini mie metaano lalo, notangka kaparasaeano bhe nokabhintie Rohino Lahata'ala. Dadi'anomo dhulumo kabhahi mie marasaeano ne Ompu Yesus.

<sup>25</sup>Pada ana'a Barnabas nokalamo we Tarsus no'ondofi Saulus. Hato nopo'awaane nowowo'oemo we Antiokia. <sup>26</sup>Seta'u kaomponanoa deate bhe umati marasaeano ne itu, dobhahi dua mie nefoguhundo. We Antiokia na'a kabhao-bhaonomo mie marasaeano ne Yesus dokonada miendo sarani.

<sup>27</sup>Wakutuu ana'a nandoo dua seemie hodua anabii mai'aono we Yerusalem dohato we Antiokia. <sup>28</sup>Seemie, konea'ano Agabus, nofohatoanda so kumadhadhia'ano we oleo mbuhumai. Weo kuasano Rohino Lahata'ala nofohatoanda kosedhunia'ae nakumantibhae gaba. Kafohatono na'a kotu-kotu'u nokadhadhia ne dhamani pahintano Omputo Kaisar Klaudius. <sup>29</sup>Dadi'anomo mie mangkafino Yesus dohotusiemo daetawunao dhoi ampa so nepoo-poolindo seemie-seemiea maka damakatuandae bhahitie marasaeano we Yudea. <sup>30</sup>Kamafakando na'a dodhalangie maka dotudu Barnabas bhe Saulus damowa dhoi na'a we kamungkula'indo umati marasaeano we Yudea.

**Yakobus dofekamatee –  
Petrus nolapa mai'ao weo katohongku  
12:1-19**

**12** Wakutuumo dua ana'a kolaki Herodes notandamo nofo-dee-dee seemie hodua umati marasaeano. <sup>2</sup>Anoa netudu mie dopongko Yakobus kakuta'ano Yohanes, dopongkoane kampue. <sup>3</sup>Nopande'aane kaowu habuno maitu do'ia'ane miendo Yahudi, Herodes tanoangka-angkamo sampe netudu mie datumaami dua Petrus. Wakutuu aitu hohaea'ano Roti Tapa Koragino. <sup>4</sup>Notihako kaowu Petrus, Herodes notududamo dotohongkue maka dodhagane tantara fato tagua, dopopaa-popaa. Patudhuno namalusi hohaea'ano Paska nabhitahakie te wisendo mie bhahi. <sup>5</sup>Pedamo na'a Petrus dotaamie weo katohongku, tamaka umati marasaeano no-kampuu-mpuu lalondo dosambahea'ane kansuhu ne Lahata'ala.

<sup>6</sup>Nengke naewine Herodes nabhitahakie te wisendo mie bhahi, alo aitu Petrus noodo dopo'olotaane dohodua tantara. Anoa dotapuane hante haa honda. Nandoo dua tantara sigao'ano dodhaga ne wiseno fointo. <sup>7</sup>Tamba'omo seemie mala'ekatino Ompu neeheehe ne owano Petrus, tilangano tanohehamo weo boloku aitu. Mala'ekati na'a notofa-tofa oweano Petrus bhe nofowanue. Ambano, "Wanumo fekahimba!" Gaha'a hante ne limano Petrus tanosihundumo. <sup>8</sup>Ambano dua mala'ekati na'a, "Mekawawe maka fokana kaampini ne a'emu!" Petrus noangkafi pugauno na'a. Pada aitu nopugaumo toha mala'ekati na'a, "Fokanamo dhubamu maka angkafi kanau!" <sup>9</sup>Palusi amaitu Petrus noangkafimo mala'ekati maitu dolimba. Tamaka miina namande'aane bhaha'i nehabuno mala'ekati na'a kotu-kotu'u nokadhadhia, kuna'enomo nokopowoha kaowu. <sup>10</sup>Doangkai dhaga setaguanu tadolaloida, doangkai toha dhaga setaguanu, tadolaloida dua sampe dohatomo we kaguali uti humope'ano we kota. Kaguali ana'a tanotilengka'aomo wutono. Dohato we simbali, dokalamo ampa we kasiku maka mala'ekati na'a tamba'omo noila. <sup>11</sup>Hato nopande'ao lalono, Petrus nopugaumo, "Kane'omo apande'aane gaha'a nokotu-kotu'u o Ompu notudu mala'ekatino namolapa kanau mai'ao ne kuasano Herodes bhe patudhu modaindo miendo Yahudi."

<sup>12</sup>Pada nofekihi sebantaha nokalamo se lambuno Maria, inano Yohanes nekonando dua Markus. Ne itu dobhahi mie dopohompuhompu dosambahea. <sup>13</sup>Nohato notengki-tengkimo fointo bhalano maka nomai seemie bhatua hobhine konea'ano Rode, name'ondoe bhaha'i la'ae metengkinu fointo na'a. <sup>14</sup>Hobhine maitu lasao notandai suahano Petrus, ka'osano ka'iano sampe fointo miina lasao nalumengkaea. Tanotende nosuli weo lambu maka nofohatoanda, bhe Petrus te wiseno fointo bhalano. <sup>15</sup>Ambado ne hobhine na'a, "Bhaha'i mobheemo?" Tamaka daa-daa'e nofintahaki pugauno. Ambado dua, "Bhaha'i o mala'ekatino."

<sup>16</sup>Tamaka Petrus nokatengki kansuhu fointo. Hato dolengkae, dowohaemo, nopuli mentendo. <sup>17</sup>Tamaka Petrus noaleda keana dohobho, pada aitu netula-tulaandamo notondae Ompu nomai'ao weo katohongku. Ambano dua Petrus, "Kala metula-tula'ao'omu kadhadhia aini ne Yakobus bhe bhahitientoomu sigao'ano." Pada ana'a nolimbamo maka nokala we liwu sigao'ano.

<sup>18</sup>Nomentae o tantara tadohialelemo. Andoa dopofee-feena bhaha'i noafamo Petrus. <sup>19</sup>Herodes netudu mie da'umondofi Petrus,

tamaka miina dapo'awaanea. Dadi'anomo, Herodes nofotudumo damee-meena tantara dhumaganie maitu maka damongkoda. Pada kadhadhia ana'a Herodes nokalamo nomai'ao we kadieno Yudea nohope we kotano Kaisarea maka neate ne itu.

### Kamate'ano Herodes

12:20-23

<sup>20</sup>Kolaki Herodes no'amaha sepali'a ne miendo Tirus bhe Sidon. Dadi'anomo andoa maitu dopugau-gau dakumala dapo'awaane. Andoa dowudhu kadeki Blastus, neangkando kumahadhaano weo kamalino Herodes, nopotundu'aanda. Andoa desalo dapometaa hampano miendo Tirus bhe Sidon sadhia de'awa nehumaando nomai'ao we liwu neowano kolaki Herodes.

<sup>21</sup>Maka Herodes netempomo se'oleo so kapo'awa-awa'ando. Ne oleo ana'a Herodes nopakemo pakea kakolaki'ano, nengkoaha te kurusi melangke'ano maka nepedato. <sup>22</sup>O ra'eatino debhidha bhe dokei, "Aitu'ae beano suahano ompu, suano suahano manusia!" <sup>23</sup>Wakutuumo dua ana'a Herodes lasao nopepee mala'ekatino Ompu, hampano miina namosibhala Lahata'ala. Uluno nohumaa'e ka'ule-ule, komate-mateno.

### Barnabas bhe Saulus nopilida Rohino Lahata'ala

12:24-13:3

<sup>24</sup>Bhoasaono Lahata'ala sadhulu ka'ewa nolele; sadhulu dua kabhahi mie marasaeano ne Yesus. <sup>25</sup>Palusi dodhalangi takando do'ondofao umati we Yerusalem, Barnabas bhe Saulus dosulimo we Antiokia. Dowowo'o dua bhe Yohanes, nekonando Markus.

**13** Wakutuu ana'a ne olotando umati marasaeano we Antioquia nandoo seemie hodua anabii bhe guru. Andoa na'a dokonada Barnabas, Simeon nekonando dua Niger,<sup>a</sup> Lukius miendo Kirene, Menahem bhe Saulus. Menahem ini nandoo kahobuno dodamba'aane poowa-owa bhe kolaki Herodes.

<sup>2</sup>Se'oleo tangasano dosambaheha ne Ompu bhe dopoasa, noko-bhoasaomo Rohino Lahata'ala, "Fekakopuuni kanau'omu Barnabas bhe Saulus so dadhumalangi'ao taka nefotantuku so andoa."

<sup>3</sup>Palusi dopoasa bhe dosambaheha'anda doteimo limando te wawo-ndo maka dopugauanda dakumalamo.

<sup>a</sup> 13:1 Niger ma'anano kuli ngka'ito.

### Saulus bhe Barnabas we witeno Siprus

13:4-12

<sup>4</sup>Barnabas bhe Saulus dokala we kotano Seleukia doangkafi katuduno Rohino Lahata'ala. Domai'ao ne na'a dosawi ne bhangka dohope we witeno Siprus. <sup>5</sup>Sahatondo we kotano Salamis, defolelemo bhoasaono Lahata'ala ne lambu kasambahea'ando miendo Yahudi. Yohanes nosabhangkada mbali kahambado.

<sup>6</sup>Andoa doliligi koseka'ewa'ae wite aitu ampa we kotano Pafos. Ne itu dopo'awa'ao seemie Yahudi, neano Bar Yesus, seemie pande sihiri bhe mpahaana-anabiino. <sup>7</sup>Anoa ini sabhangkano Sergius Paulus, gubernur ne wite aitu. Gubernur na'a o mie mande bhe nokotimbang; nosali'i Barnabas bhe Saulus hampano nopindalo nametingke bhoasaono Lahata'ala. <sup>8</sup>Tamaka Barnabas bhe Saulus notagalida pande sihiri sa'itu (weo wamba Yunani dokonae Elimas), neanomo gubernur pae namarasaea'a ne Yesus. <sup>9</sup>Tamaka Saulus (dokonae dua Paulus) nokabhintie Rohino Lahata'ala lasao notonto pande sihiri maitu bhe nopugau. <sup>10</sup>Ambano, "Hintu anano seetani, totono lalomu nopono'ao kabhohe-bhohe'i bhe isikadhi modai! Hintu ini sadhia poewangi bhe kabanara. Pae tumie-tiehea gaha'a modo-modoli kaangka'ano Lahata'ala? <sup>11</sup>Woha itu, kuasano Ompu namepeko! Mobunto nase'oleo ha'oleo ini, pae mohaea tilangano oleoa." Wakutuu aitu dua kansuhu nokaputie pakahawu bhe kahohondo, habituno nokala kadampa-dampa ne'ondofi so tumonda. <sup>12</sup>Nowoha kadhadhia aitu, o gubernur lasao noparasaea bhe namente'ao kafoguhu mai'aono ne Ompu.

### Paulus te Antiokia te kadieno Pisidia

13:13-52

<sup>13</sup>Paulus bhe sabhangka'ino dohela domai'ao we Pafos dohope we Perga kadieno Pamfilia. Tamaka Yohanes nohunsadamo nosuli we Yerusalem. <sup>14</sup>Domai'ao we Perga, dopansuhu te Antiokia te kadieno Pisidia. Ne oleono Sabat dokala se lambu kasambahea'a maka dengkoha ne itu. <sup>15</sup>Pada dobasa Kitabino Musa bhe Kitabindo ana-anabii, mie mande'aono lambu kasambahea'a dotudumo mie dameena ne Paulus bhe sabhangka'ino. Ambado, "Bhahitie'i, ane bhe kafoina'u so kalawesino lalondo umati naembalimo damosampea." <sup>16</sup>Pada aitu Paulus nohemo poowa noaleda keana dohobho maka nopugau,

“Bhahitie'iku miendo Israel bhe bhahitie'iku sigao'ano mote'ino ne Lahata'ala, fetingke kanau'omu! <sup>17</sup> Lahata'alando miendo Israel, intaodimoomu ini, nopilimo awuantoomu bhe nofoleedamo dembali bansano liwu bhahi, wakutuuno dembali mie humato we witeno Mesir. Weo handano limano foliuno kuasa, Lahata'ala nofolapada domai'ao we witeno Mesir.<sup>a</sup> <sup>18</sup> Fato fulu ta'u kaomponano we pandaso bhalano, Lahata'ala tanotuhupimo podiundo.<sup>b</sup> <sup>19</sup> Fitu bansano liwu ne witeno Kanaan nofosuniandae maka wite-ndo nodawu-dawuandae miendo Israel mbali kahunsa'aondo.<sup>c</sup> <sup>20</sup> Kosasawi'ae ini napefato mo'ono lima fulu ta'u kaomponano.

Palusi ana'a Lahata'ala nefoeheandamo pande-pande bhitaha ampa ne dhamanino anabii Samuel.<sup>d</sup> <sup>21</sup> Pada ana'a desalomo dua seemie omputo maka Lahata'ala nofoheanda Saul anano Kis sampu'ano Benyamin, fato fulu ta'u kaomponano noowadaa.<sup>e</sup> <sup>22</sup> Pada nofosabu Saul, Lahata'ala nofoheandamo Daud mbali omputo. Lahata'ala nopulao'ao Daud ambano, 'Apo'awa'aomo Daud anano Isai, noposahasi bhe laloku. Anoamo ini so dhumalangino ka-  
poindaloku.<sup>f</sup> <sup>23</sup> Nomai'aomo ne sampu'ano Daud ini, Lahata'ala nofohemo Omputo Fosalamatino mbali miendo Israel, noposahataa bhe dhandino. Anoamo na'a konea'ano Yesus. <sup>24</sup> Noma'o kaowu nahumato, Yohanes nofohatomo kosasawindo miendo Israel dametompa'ao dhosando bhe daefekadiu. <sup>25</sup> Noma'o kaowu namooli takano, nopugaumo Yohanes ambano, 'Dukuno lalomiu la'ae bhahaa idi ini? Idi ini suano mie nentaa-ntaamiu itu, tamaka akumundo idi nahumatomo. O idi mahingga alumense katapuno kaampini ne a'eno pae amantasia.'<sup>g</sup>

<sup>26</sup> Bhahitie'iku, naetaa sampu'ano Abraham naetaa sigao'ano mote'ino ne Lahata'ala, bhihita kasalamatia ini padamo dofofohatoane. <sup>27</sup> Miendo Israel bhe neangka'indo miina damande'aane putae Yesus maitu fofosalamatino. Miina dua dalumosangie pugaundo ana-anabii nebasando se'o-se'oleono Sabat, sampe do-bhotusiemo damongkoe. Tamaka habundo na'a nofekako'ulamo pugaundo ana-anabii maitu. <sup>28</sup> Mahinggamo miina dae'awa tingku

<sup>a</sup> 13:17 Kel psl 1-12

<sup>b</sup> 13:18 Bil 14:34; Ul 1:31

<sup>c</sup> 13:19 Ul 7:1; Yos 14:1

<sup>d</sup> 13:20 Hak 2:16; 1Sam 3:20

<sup>e</sup> 13:21 1Sam 8:4-5, 10:21

<sup>f</sup> 13:22 1Sam 13:14, 16:12-13, Mzm 89:20

<sup>g</sup> 13:24-25 Mat 3:11; Mrk 1:4-7

so katipongko'ano sadaa-daa desalo ne Pilatus damongkoe. <sup>29</sup>No-palusi dofekako'ulae sabhaha tibuhi'ano weo Kitabi mulao'aono Yesus na'a, maeatino dofosampuemo mai'ao te sau salipu maka dofondolee weo kobuhu. <sup>30</sup>Tamaka Lahata'ala nofowanue nomai'ao ne mate. <sup>31</sup>Nomampona-mpona dua nofotiwoha Wutono ne mie pobhaiane domai'ao we Galilea ampa we Yerusalem. Andoamo ini membalino sakusii ne miendo Israel ampa aitu. <sup>32</sup>Dadi'anomo insaodi ini tafoleleangkoomu Bhihita Metaa; ma'anano dhandino Lahata'ala ne awua'intoomu, <sup>33</sup>noko'ulamo ne intaodiomu sampu'ando. Kapa'amo Yesus nofowanuemo nomai'ao ne mate peda tibuhi'ano weo Laguno Daud kahaa iseno,

[Ambano Lahata'ala, 'Hintu anaku!

Akoana'aangkomo oleo itu.'<sup>a</sup>

<sup>34</sup>Lahata'ala nofowanuemo mai'ao ne mate maka paemo sumuli dakumobuhue. Nandoo bhoasaono Ompu peda aini,

'Ama'angkoomu kosasawi'ae kabarakati mongkilo  
tiparasaeano nedhandi'aoku ne Daud.'<sup>b</sup>

<sup>35</sup>Pedamo dua ana'a weo aeati sigao'ano Ompu nokowamba peda aini,

'Mbadhano bhatuamu mongkilono pae nahumansuru  
weo kobuhu.'<sup>c</sup>

<sup>36</sup>Daud nodhalangi pahintano Lahata'ala ne dhamanino, maka hato nomate dokobuhue ne sohihino awua'ino, mbadhano nohansurumo. <sup>37</sup>Tamaka Yesus nefowanuno Lahata'ala mai'ao ne mate maitu, miina nahumansuraa. <sup>38</sup>Dadi'anomo bhahitie'iku tabeano mande'aaneomu! Bhihita kati'amponi'ano dhosa ini dofohato-angkoemoomu hampano Yesus ini. <sup>39</sup>Tabeano mande'aaneomu dua weo neano Yesus ini kosasawindo marasaeano ne Anoa nati'amponi dhosando maka natumahimada Lahata'ala peda mie banara. Aini suano nepoolino tubhono agama Yahudi. <sup>40</sup>Dadi'anomo posi'ondoomu keana nokantibhakoomu tibuhi'ano weo Kitabindo ana-anabii peda aini,

<sup>41</sup>'Hintimiu fofompina-mpinanano tandai'eomu,  
menteomu maka mosuniomu,

---

<sup>a</sup> 13:33 Mzm 2:7

<sup>b</sup> 13:34 Yes 55:3

<sup>c</sup> 13:35 Mzm 16:10

kapa'amo ne dhamanimiu aefokonandooangkoomu  
 kadhadhia so tapa neparasaemiu  
 mahingga datumula-tulaangko'e'omu!' ”<sup>a</sup>

<sup>42</sup>Tangasano dolimba domai'ao weo lambu kasambahe'a, o mie desalomo Paulus bhe Barnabas damoguhuda toha nahumato oleono Sabat te wise, peda kafoguhu nefetingkendo sa'ituini. <sup>43</sup>Dopuli kaowu dolimba, dobhahi miendo Yahudi bhe koliwuno mesuano agama Yahudi doangkafimo Paulus bhe Barnabas. Andoa dofoina'uda rasulu hoduanano maitu neanomo sadaa-daa dadumadi damasande ne rahamatino Lahata'ala.

<sup>44</sup>Nohato toha oleono Sabat doma'o daopuli miendo kota domai dohompu dametingke bhoasaono Lahata'ala. <sup>45</sup>Sadowoha kabhahindo mie peda na'a, miendo Yahudi dokoulamo ne Paulus bhe Barnabas sampe dofeka'aebuda bhe doewangi kafoina'undo. <sup>46</sup>Tamaka Paulus bhe Barnabas notangka lalondo. Ambado, “Anoamo, sakotu'uno hintimiumo ma'indulu metingkeno bhoasaono Lahata'ala. Tamaka bansie'omu, pakade abhiomu wutomiu pae mantasiomua metahimaomu dadi suhue dhamani. Dadi'anomo tadolimo ne bansano liwu suano Yahudi. <sup>47</sup>Kapa'amo nandoo pahintano Ompu ne insaodi ambano,

‘Idi afohekomo mbali kantalea so bansano liwu  
 sigao'ano tapa mande'aono Lahata'ala,  
 somo meowano kasalamati ampa we tompano  
 dhunia.’ ”<sup>b</sup>

<sup>48</sup>Dofetingke ana'a kosasawindo mie suano Yahudi do'ia bhe dopudhi bhoasaono Lahata'ala; o mie nepilino Lahata'ala so dumadino suhue dhamani doparasaemo. <sup>49</sup>Maka bhoasaono Ompu dofoleleemo ne koseka'ewa'ae wite aitu. <sup>50</sup>Tamaka seemie hodua kamungkulando miendo Yahudi dowudhu hobhine'i tiangkano mote'ino Lahata'ala bhe kabhala'i weo kota aitu. Dotandamo dofo-dee-dee Paulus bhe Barnabas sampe kohoduando dogihasidamo mai'ao ne kadie aitu. <sup>51</sup>Tamaka Paulus bhe Barnabas tadotanta bungahasino a'endo ne wisendo, peda tandano kafodhagando, maka dokala te kotano Ikonium. <sup>52</sup>Mangkafino Yesus te Antiokia nowula lalondo, nokabhintida Rohino Lahata'ala.

---

<sup>a</sup> 13:41 Hab 1:5

<sup>b</sup> 13:47 Yes 42:6, 49:6



**Paulus bhe Barnabas te kotano Ikonium**  
14:1-7

**14** Dohato te Ikonium tanopototomo dua. O rasulu hoduanu na'a dopesua weo lambu kasambahea'ando miendo Yahudi, ka'osano kakesano kafoguhundo sampe dobhahi sepali'a miendo Yahudi bhe suano Yahudi marasaeano ne Yesus. <sup>2</sup>Tamaka miendo Yahudi mongaheno marasaeano, dofekasodomo lalondo mie suano Yahudi so dabansi'ao bhahitie marasaeano. <sup>3</sup>Nompona dua Paulus bhe Barnabas deate-ate ne itu. Dokado defolele bhihitano Ompu. Wutono Ompu nofekatangka bhihitano rahamatino, nowa'anda kuasa daehabu tanda-tanda tapa mentela bhe giu timente'aono. <sup>4</sup>Tamaka miendo kota maitu dewalamo: nandoo tumaino ne miendo Yahudi bhe nandoo dua tumaino ne rasulu hoduanu maitu. <sup>5</sup>Pada aitu o mie suano Yahudi bhe miendo Yahudi dose'isemo bhe neangka'indo. Andoa dosikoo-koomo damodee-dee rasulu hoduanu maitu bhe dabhatumbulianda kontu ampa damate. <sup>6</sup>Sadopande'aane patudhundo maitu, andoa dogampimo te kotano Listra bhe kotano Derbe bhe liwu-liwu poma'oti'ano, te kadieno Likaonia. <sup>7</sup>Ne itu defolele dua Bhihita Metaa.

**Paulus bhe Barnabas te Listra bhe Derbe**  
14:8-20

<sup>8</sup>Te Listra nandoo seemie mo'ane nokalu mpini pakalenteno. Mie aini sangkoha, miina sepali'a namoolia nokala. <sup>9</sup>Anoa nofetingke dua pugauno Paulus. Gaha'a Paulus notontoe, woha'ano kaparasaeano mie aini naembali nao'osaane. <sup>10</sup>Maka Paulus no-pugaumo nofekahaa-haa'ie ambano, "Ehe fekalaa'i a'emu!" Mie amaitu nopunda ngkaehe-ehe maka nosuli kumala. <sup>11</sup>Mie bhahi dowoha nehabuno Paulus maitu, dokeimo weo wamba Likaonia ambado, "Dewantoomu dosampumo desahangka ne manusia." <sup>12</sup>Barnabas dokonae dewa Zeus, Paulus dokonae dewa Hermes hampano anoamo mugauno.<sup>a</sup> <sup>13</sup>Maka nomaimo imamuno dewa Zeus, nomai'ao we lambu katisombai'ando dewa we simbalino kota. Anoa neowa'i sapi bholo bhe kataheno kamba-kamba se kagualino kota. Patudhuno napoowa-owa bhe mie bhahi dasumu-mbele sapi na'a so kapopanga ne rasulu maitu.

<sup>a</sup> 14:12 Zeus neano dewa Yunani, kafeompu'ando sabhaha dewa. Hermes neano dua dewando miendo Yunani, nembali palima-limando dewa.



*O imamu neowa kapopanga ne Paulus bhe Barnabas*

<sup>14</sup>Dofetingke peda maitu Barnabas bhe Paulus dopobhensi'ao pakeando poangka dotende ne wuntando mie bhahi bhe dokei ambado, <sup>15</sup>“Alee, noafa habu'ao'omu giu aitu? Insaodi ini ingka mie melaa, kabeanga dua hintimiu! Kahato'a mani ne ini tamohatoangkoomu Bhihita Metaa so humunsa'ao'omu giu tapa kofahalaa'ano ini, neanomo dumolimoomu bhe marasaemoomu ne Lahata'ala dumadino. Anoamo mokonandoono o lani, o dhunia, o te'i bhe kosasawi'ae i'ino. <sup>16</sup>Nandoo dhamani wawono Lahata'ala tanokatahodamo sabhaha bansano liwu damangkafi totono lalondo seemie-seemie. <sup>17</sup>Tamaka Anoa sadaa-daa nofotiwohaanda kantandaino Wutono. Aini ma'anano nofo'ondofao, nofosampuangkoomu use bhe pehapino wite seta'u-seta'u. Anoa nofekawe'ikoomu bhe nofeka'ia lalomiu.” <sup>18</sup>Mahinggamo rasulu dopugau peda na'a, mie bhahi nokoma'o pae datitagalia daesumbeleanda kapopanga.

<sup>19</sup>Tamaka domaimo seemie hodua kamungkula'indo Yahudi mai'aono te kotano Antiokia bhe Ikonium dowudhu mie bhahi datumai ne andoa. Paulus dobhatumbuliane kontu maka dobulue we simbalino kota, kuna'endomo nomatemo. <sup>20</sup>Tamaka tangasano o mie marasaeano ne itu deehe-ehe dolibue, gaha'a nowanumo maka nopesua toha weo kota. Hato nomentae nokalamo we kota-  
no Derbe nopoowa bhe Barnabas.

### Paulus bhe Barnabas dosuli we kotano Antiokia

14:21-28

<sup>21</sup> We Derbe, Paulus bhe Barnabas defolele Bhihita Metaa sampe dobhahi mie marasaeano. Pada ana'a dosulimo we kotano Listra, Ikonium bhe Antiokia. <sup>22</sup> Ne itu dofekatangka lalondo mangkafino Yesus, dotangahida nakumampuu-mpuu lalondo weo kaparasaeando ne Yesus. Dofohatoda dua tetewei nabhahi dae'awa kasabha so damesua'ao weo Kafopahinta'ano Lahata'ala. <sup>23</sup> Ne amai tombudo umati neangkaindo, Paulus bhe Barnabas desangkeanda seemie hodua kamungkula so neangkando. Poangka dosambahea bhe do-poasa, kamungkula'i andoa ini dofopulidamo ne Ompu neparasaeandomo.

<sup>24</sup> Andoa doliligi kadieno Pisidia sampe dohato we kadieno Pamfilia. <sup>25</sup> We Pamfilia defolele Bhihita Metaa we kotano Perga maka dosampu we kotano Atalia [we wiwino te'i]. <sup>26</sup> Ne itu dosawimo ne bhangka dohope we Antiokia. Ne kotanomo Antiokia ini endefi'ini andoa dposahuna'aanda umati ne kabarakatino Lahata'ala dotandaki kahadhaando. Ampa aitu kahadhaa aitu dopooliemo. <sup>27</sup> Sahatondo ne itu dofohompumo umati marasaeano maka detula-tulaanda sabhaha nehabuno Lahata'ala noangka ne limando, pakade Lahata'ala nelengkamo kaangka'a mbali mie suano Yahudi so damarasaea'ao ne Yesus. <sup>28</sup> Ne Antiokia na'a Paulus bhe Barnabas nompona dua deate bhe mangkafino Yesus ne itu.

### Hompua we Yerusalem

15:1-21

**15** Nandoo seemie hodua mai'aono we Yudea dokala we Antiokia dofoguhu bhahitie'i ne itu. Ambado, “Ane pae dasumunakoomu peda adhati kahunsa'aono Musa, pae naembalia damosalamatikoomua.” <sup>2</sup> Tamaka Paulus bhe Barnabas doewangi bhe dotagali sepali'a fekihindo maitu. Panda-pandano dohotusiemo peda aini: Paulus bhe Barnabas bhe seemie hodua mie marasaeano ne itu dakumala dap'awa'ao rasulu sigao'ano bhe kamungkula'i we Yerusalem so dapugau-gau'ao kasabha netompaloindo na'a.

<sup>3</sup> Umati marasaeano dopoangka'aanda ampa we simbalino kotano Antiokia. Andoa dokala doangkai kadieno Fenisia bhe Samaria. Ne amai liwu kaangkai'ando detula-tula'aomo bansano liwu suano

Yahudi dodolimo dua ne Lahata'ala. Bhihita ana'a do'ia'ane bhahitie'i ne itu. <sup>4</sup>Sahatondo we Yerusalem dotahimadamo umati marasaeano, rasulu sigao'ano bhe kamungkula'i. Pada ana'a detulataandamo sabhaha nehabuno Lahata'ala noangka ne limando. <sup>5</sup>Tamaka domai dua seemie hodua kamungkula miendo Farisi marasaeano ne Yesus. Ambado, "O mie suano Yahudi toka marasaeano ne Yesus tetewei dasumunada, damosuhuda damangkafi dua tubhono agama Yahudi."

<sup>6</sup>Dadi'anomo rasulu bhe kamungkula'i dohompumo dapugaugau'ao ana'a. <sup>7</sup>Nompona kaowu dopololi-loli'ao fekihindo, no-ehemo Petrus maka nopugau ambano, "Bhahitie'iku, ingka pande'aaneomu mpini kabhao-bhaono Lahata'ala nopili kanau mai'ao ne olotamiu, neanomo bansano liwu suano Yahudi dametingke bhe damarasaea Bhihita Metaa nefoleleku. <sup>8</sup>Lahata'ala mande'aonomo lalondo manusia, nofotiwohamo bukutii notahimamo mie suano Yahudi, kapa'amo nowa'andamo dua Rohino peda intaodiomu miendo Yahudi. <sup>9</sup>Lahata'ala miina napo'ala-alaandaa bhe intaodiomu; totono lalondo padamo nofekangkiloe hampano doparasaea. <sup>10</sup>Dadi'anomo, noafa solo-solo'ao'omu Lahata'ala? Noafa fewowo'oniandaomu wowo'o pata nepoolindo awua'intoomu bhe intaodiomu dua? <sup>11</sup>Koemo! Intaodiomu doparasaea'omu hampano rahamatino Ompu Yesus Kristus, do-salamatimoomu pedamo dua andoa."

<sup>12</sup>Kosasawindo umati humompuno miinamo dakodiuu. Palusi ana'a dofetingkemo Paulus bhe Barnabas detula-tula'ao sabhaha tanda timenteaono nehabuno Lahata'ala mangka'ano ne limando ne wisendo bansano liwu suano Yahudi. <sup>13</sup>Pada detula-tula Paulus bhe Barnabas, nopugaumo Yakobus. Ambano, "Bhahitie'iku, soba fetingke kanau'omu! <sup>14</sup>Simon kane'o pada netula-tula'ao kabhao-bhaono Ompu Lahata'ala no'ondofao mie suano Yahudi, patudhuno naepili ne olotando so membalino umatino. <sup>15</sup>Aitu noposahataa bhe kabuhino anabii peda aini,

<sup>16</sup> [Ambano Lahata'ala,] 'Namada kaowu sumuli toha amowanu lambuno Daud mopula'ano, kapulano na'a amekataa'ie toha maka amotohoe,

<sup>17</sup> neanomo kosasawindo mie sigao'ano da'umondofi Ompu, sabhaha bansano liwu suano Yahudi na'a akonadamo umatiku'.

Nengkemo na'a nekobhoasa'aono Ompu,  
mokonandoono bhahi-bhahi'ae.

<sup>18</sup>Ompu nofofohato'ao bhahi-bhahi'ae ini mpini dhamani  
wawono.<sup>a</sup>

<sup>19</sup>Dadi'anomo fekihiku idi mie suano Yahudi dumolino ne Laha-  
ta'ala pae naembalia daehabuandaomu kasabha. <sup>20</sup>Ampamo kaowu,  
tetewei daebuhianda suha keana dohumaa oti nepopanga ne bara-  
hala, koe domonsulea, koe dua dohumaa kamateno kadadi pata  
nesumbele bhe koe dohumaa hea. <sup>21</sup>Kapa'amo mpini dhamani  
wawono pahintano Musa dofoleleandae ne amai onuno liwu.  
Ta'ampamo aini Kitabino Musa amaitu taenomo oleono Sabat  
sadhia dobasae weo lambu kasambahe'a."

### O suha so umati marasaeano we Antiokia

15:22-34

<sup>22</sup>Rasulu, kamungkula'i bhe kosasawindo umati dohotusie  
dae'ondo seemie hodua ne olotando umati na'a so kumalano we  
Antiokia dasumabhangka Paulus bhe Barnabas. Maka dopilimo  
Silas bhe Yudas nekonando dua Barsabas. Andoa ini sanea po-  
isa'ando umati ne Yerusalem. <sup>23</sup>Andoa dowanda suha. Wambano  
peda aini,

"Bhahitie'i mani suano Yahudi meateno we Antiokia, Siria  
bhe Kilikia. Suha aini nomai'ao ne insaodi rasulu bhe ka-  
mungkula'i [we Yerusalem] so hintimiu. <sup>24</sup>Tafetingke nandoo  
seemie hodua mai'aono we insaodi ini dofohaliakoomu bhe  
dofekasabhaangkoomu kafoguhundo, tamaka suano katudu  
mani. <sup>25</sup>Aitu padamo tamafakaane taepili seemie hodua so  
netudu mani damai we hintimiu itu. Andoa damai dapo-  
owa-owa bhe Barnabas bhe Paulus, bhahitie nemoasi'ao  
mani. <sup>26</sup>Kohoduando ini dohelasimo damate'ao neano Ompu-  
ntoomu Yesus Kristus. <sup>27</sup>Dadi'anomo tatudumo dua Yudas bhe  
Silas, daetula-tulaangkoomu peda tibuhino weo suha aini.  
<sup>28</sup>Rohino Lahata'ala bhe insaodi tasepatudhu tabhotusie  
koemo dofotongkuangkoomu wowo'o mobhie. So nesodamiu  
ampamo kaowu maraluu'ano ini: <sup>29</sup>koemo humaa'omua oti  
nepopanga ne barahala, koe humaa'omu hea, koe humaa'omua  
kamateno kadadi pata nesumbele bhe koemo monsuleomua.

---

<sup>a</sup> 15:16-18 Amos 9:11-12

Dhumaganiomu kaowu wutomiu ne ana'a, ingka habu metaamoomu. Pedamo kaowu ana'a, notumpu lalo mani.”

<sup>30</sup>Pada dofealai, Silas bhe Yudas dokalamo we Antiokia. Dohato dofohompudamo umati maka dowanda suha maitu. <sup>31</sup>Pada do-basae, umati do'ia, notilawesianemo lalondo. <sup>32</sup>Yudas bhe Silas dotilentu dua anabii, dadi'anomo nompona dofoina'u bhe do-fekatangka lalondo bhahitie'i ne itu. <sup>33</sup>Pada deate-ate ne itu, Yudas bhe Silas do'unda'aandamo dasumuli weo kabarakatino Ompu, dasumulimo we tumududa. <sup>34</sup>[Tamaka Silas nokopatudhu naeate-ate deki ne itu.]

### Paulus bhe Barnabas dopogaati

15:35-41

<sup>35</sup>Paulus bhe Barnabas nandoo deate-ate we Antiokia. Dowo-owa bhe mie sigao'ano dofofoguho bhe defolele bhoasaono Ompu. <sup>36</sup>Tamaka miina naomponaa Paulus nopugaumo ne Barnabas ambano, “Maimo dosuliana doangkai toha bhahitie marasaeano ne amai kota kaefolele'anto bhoasaono Ompu endefi'ini; neanomo damande'aanemo peda amai koeatendo.” <sup>37</sup>Barnabas gaonoa dawowo'o bhe Yohanes nekonando dua Markus. <sup>38</sup>Tamaka fekihino Paulus pae naetaa'a nasumabhangkada Markus, kapa'amo Markus nohunsada we Pamfilia, miinamo napoowa-owaanda ampa nopalusi kahadhaando. <sup>39</sup>Po'alatindo Paulus bhe Barnabas no'osa sepali'a sampe panda-pandano dopogaati. Barnabas nowowo'o Markus maka dosawi ne bhangka dohope we Siprus. <sup>40</sup>Tamaka Paulus nopilimo Silas. Andoa dposahuna'aandamo umati we Antiokia ne kabarakatino Ompu, pada ana'a dokalamo. <sup>41</sup>Doliligi kadieno Siria bhe Kilikia; ne itu dofekatangka kaparasaeando umati.

### Timotius noangkafi Paulus bhe Silas

16:1-3

**16** Paulus nopansuhumo we kotano Derbe we Listra. Ne itu nandoo seemie mangkafino Yesus, neano Timotius. Inano miendo Yahudi, noparasaea dua ne Yesus, tamaka amano miendo Yunani. <sup>2</sup>Bhahitie marasaeano meateno we Listra bhe Ikonium dopuli dopande'aane kataano lalono Timotius. <sup>3</sup>Paulus nopoinda-lo nawowo'oe so sabhangkano; dadi'anomo nosunaemo kadeki,

hampano miendo Yahudi ne kota aitu sanea dopande'aane amano miendo Yunani.

### Paulus nolimba se kadieno Makedonia

16:4-12

<sup>4</sup>Ne amai kota kaangkai'ando Paulus bhe Silas, umati ne itu dofohatoanda kabhotusindo rasulu bhe kamungkula'i we Yerusalem. Dofoina'uda damangkafi atorano nebhotusindo na'a. <sup>5</sup>Dadi'anomo kaparasaeando umati dhulu katangka, dhulu oleo dhulu kabhahindo. <sup>6</sup>Andoa doangkai kadieno Frigia bhe kadieno Galatia mba'inomo Rohino Lahata'ala miina na'umunda'aanda daefolele Bihita Metaa we kadieno Asia. <sup>7</sup>Sahatondo we kadieno Misia patudhundo damesua weo kadieno Bitinia, tamaka Rohino Yesus miina na'umunda'aanda. <sup>8</sup>Dadi'anomo domai'ao we Misia, dopansuhumo we kotano Troas. <sup>9</sup>Nohondo oleo Paulus nokopowohamo. Weo powohano nandoo seemie mai'aono we Makedonia neehe-ehe ne itu bhe nesalo ne anoa ambano, "Limbamo we sewetano ini, tulumi kainsami." <sup>10</sup>Pada nokopowoha peda maitu, lasao taokanu tapolimba se kadieno Makedonia.<sup>a</sup> Hampano nopalusi powoha maitu, tasefekihimo ingka wutono Lahata'ala gaha'a mugau kainsami taefolele Bihita Metaa ne itu. <sup>11</sup>Tamai'ao we kotano Troas tasawi ne bhangka talasao we liwutono Samotrake. Nopooli nomentae tahatomo we kotano Neapolis. <sup>12</sup>Tamai'ao ne itu takala se Filipi, kota kabhao-bhaono ne kadieno Makedonia ini. Kota aini kaeate'ando miendo Roma. Se'oleo haa oleo nandoo taete-ate ne itu.

### Paulus we kotano Filipi

16:13-18

<sup>13</sup>Ne oleono Sabat talimbaki fointono kota, takala we wiwino umele. Pada aitu tahatomo ne kasambahea'ando miendo Yahudi, nopobutu peda nefekihi mani. Pada taengkoha sebantaha, tapugaumo ne hobhine'i pohompu-hompuno ne itu. <sup>14</sup>Ne olotando metingkeno nandoo seemie hobhine konea'ano Lidia. Anoa nomai'ao we kotano Tiatira, nopodaga'ao kai wungo. Anoa ini note'i dua ne Lahata'ala. Ompu nolengka totono lalono sampe pugauno Paulus notahimae. <sup>15</sup>Pada takadiu saranie bhe kosasawindo mie weo lambuno, nosali'i kainsamimo ambano, "Ane fekihi kanau'omu idi

<sup>a</sup> 16:10 Notanda ne ini Lukas buhino boku aini nopobhai'ao Paulus bhe sabhangka'ino.

ini aparasaeamo mpuu ne Yesus, mai butuomu se lambuku.” Nofosuhu kainsami sampe taangkafie kamesalono.

<sup>16</sup>Sepaku, nandoo takala se kasambahea'a maitu tapo'awa'ao seemie bhatua hobhine. Kalambe aini nopesuakie seetani sampe nopande nekona-kona so kumadhadhia'ano we oleo mbuhumai. Kapandeno na'a dokodhoianemo kafeompu'ano. <sup>17</sup>Anoa nokaangka Paulus bhe insaodi, bhe nokei ambano, “Andoa ini katudunomo Lahata'ala Foliuno Kuasa. Andoa dofohatoangkoomu nada amai dhalano so sumalamati'ao'omu.” <sup>18</sup>Ampa se'oleo haa oleo sakei peda na'a. Tamaka Paulus miinamo namoolie lalono nofetingke kahunggaino maitu. Lasao nodoliki kalambe aitu maka nopugau ne seetani mesuakie ambano, “Weo neano Yesus Kristus, atuduko limba'o toha mai'ao ne kalambe aini.” Seetani ana'a lasao nolimba nomai'ao ne kalambe amaitu.

### Mande'aono lambuno katohongku we Filipi

16:19-40

<sup>19</sup>Kafeompu'ano bhatua hobhine amaitu dopande'aomo lalondo, ingka gaha'a kae'awa'ando dhoi maitu nomiinaemo. Dadi'anomo dohakomo Paulus bhe Silas maka dobuluda we kadeteno daoa, doowada te wiseno sahano kota. <sup>20</sup>Dohato ne wisendo kabhala'ino kota maitu, dopugaumo ambado, “O miendo Yahudi ini dehabu kahungga weo kotantoomu ini! <sup>21</sup>Adhati nefoguhu'aondo o falia datumahimae tawa damangkafie intaodiomu warga negarano Roma!” <sup>22</sup>Mie bhahi doehemimo dua Paulus bhe Silas. Sahano kota detudumo mie dakumokape pakeando maka damepekida. <sup>23</sup>Pada dolangasaanda kahambi, dofopesuadamo weo katohongku. Mande'aono katohongku dotudue nadhumaganida sepali'a. <sup>24</sup>Nofetingke kakiino pahinta ana'a, mande'aono katohongku nofopesuada ne boloku we wunta-wuntano katohongku maka nolangkeda.

<sup>25</sup>Kafewunta'ino alo Paulus bhe Silas dosambaheamo bhe delagu-lagu dopudhi Lahata'ala. Katohongku bhaindo dofetingkeda dua. <sup>26</sup>Gaha'a tanosinandoo'amo luali mo'osa sampe sandino lambuno katohongku nomaunda. Ne na'a dua kosasawi'ae fointono katohongku notilengka bhe langkendo nopuli notibhosa. <sup>27</sup>Sanoepe mande'aono lambu katohongku bhe nowoha fointo nopuli notilengka, nobunamo kampueno namongko wutono. Weo fekihino katohongku dopulimo dofilei. <sup>28</sup>Tamaka Paulus nokeimo nofe-kabhala-bhala ambano, “Koe pongko wutomua! Kosasawi mani



nandoo kainsami!” <sup>29</sup>Mande'aono lambu katohongku maitu nesalo kantalea maka notende we lalo, tanokahedu-hedumo no-longko notaohao sombano ne Paulus bhe Silas. <sup>30</sup>Kohoduando nofolimbadamu bhe nopugau ambano, “Aehabu ae bhahaa so asumalamati'ao?” <sup>31</sup>Dotobhoosimo ambado, “Parasaeamo ne Ompu Yesus! Tetewei sumalamatimo, wutomu bhe kosasawindo mie weo lambumu!” <sup>32</sup>Lasao dofohatoanda bhoasaono Ompu, ne anoa bhe kosasawindo mie weo lambuno. <sup>33</sup>Kafewunta'inomo dua alo na'a, mande'aono lambuno katohongku na'a nowowo'oda maka nofewaniu lewe-leweno ulundo. Ne na'amo dua anoa bhe kosasawindo mie weo lambuno dokadiu saranida. <sup>34</sup>Pada peda na'a nowowo'odamo se lambuno maka ne'ondofianda dohumaa. Ka'iano maka mba'ino-mo anoa bhe kosasawindo mie weo lambuno doparasaeamo ne Lahata'ala.

<sup>35</sup>Nopooli nomentae, kabhala'ino kota detudumo dhaga'ino kota dakumala se mande'aono lambu katohongku. Andoa doowili ambado, “Folimbadamu mie hoduanu itu!” <sup>36</sup>Mande'aono lambu katohongku lasao nofosampe kaowilindo maitu ne Paulus, ambano, “Kabhala'ino kota doowili kanau amolimbakoomu. Dadi'anomo kalamoomu weo kabarakatino Ompu!” <sup>37</sup>Tamaka Paulus tanopugau ne dhaga'ino kota maitu ambano, “Insaodi ini warga negarano Roma! Miina'o dabhitahaki kainsamia, tadopa'indulumo dopepeki kainsami ne wisendo mie bhahi, pakade dotohongku kainsami. Aitu gaha'a tadamolimba kainsamimo dua patudhundo pae daefemata-mataa. Pae naembali nada inia! Tabeano damai damolimba kainsami wutondo!”

<sup>38</sup>Dhaga'ino kota na'a dopolele'aomo pugauno Paulus ne kabhala'ino kota. Sadofetingke Paulus bhe Silas maitu warga negarano Roma, dote'imo. <sup>39</sup>Dadi'anomo domai desalo ma'afu ne Paulus bhe Silas maka doowada we simbalino katohongku bhe desaloida mpuu dahumunsamo kota aitu. <sup>40</sup>Domai'ao we katohongku na'a dekansuhu se lambuno Lidia. Pada dopo'awa-awa bhe bhahitie'i ne itu bhe dolawesi lalondo, Paulus bhe Silas dokalamo.

### Paulus bhe Silas we kotano Tesalonika 17:1-9

**17** Paulus bhe Silas dokala doangkai kotano Amfipolis bhe Apolonia ampa dohato we kotano Tesalonika. Ne itu nandoo bhe lambu kasambahea'ando miendo Yahudi. <sup>2</sup>Peda kaneano Paulus

nopesuamo weo lambu kasambahea'a na'a. Nopotulu-tulu tolu oleono Sabat, Paulus nopololi fekihi bhe andoa, dopuga-pugau'ao aeatino Kitabi. <sup>3</sup>Nomai'ao ne aeatino Kitabi na'a notalesaandae bhe nofotiwohaandae putae Mesias tetewei nakadee-dee bhe namanu namai'ao ne mate. Ambano, "Yesus nefohato'aoku ini, Anoa-mo Mesias, Omputo Fosalamatino na'a." <sup>4</sup>Nandoo marasaeano maka doangkafi Paulus bhe Silas. Dobhahi miendo Yunani mote'ino ne Lahata'ala marasaeano, bhe dobhahi dua hobhine'i tiangkano marasaeano.

<sup>5</sup>Tamaka miendo Yahudi nokoula lalondo. Desali'imo mie modai lumampuno we daoa maka dosikoo-koo dehabu kahunggano liwu. Andoa dobuuti lambuno Yason, patudhundo dahumako Paulus bhe Silas maka dapowiseanda bhe mie bhahi. <sup>6</sup>Tamaka miina doahadaa. Miina kaowu doahada dobulu-bulumo Yason bhe bhahitie marasaeano doowada ne kabhala'ino kota. Dopokakei-kei ambado, "O mie mehabuno kahunggano liwu ne kosedhuniae gaha'a dohatomo dua ne ini!" <sup>7</sup>Yason notahimada weo lambuno. Andoa ini dopuli doewangi adhati netubhono Omputo Kaisar kapa'amo ambado nandoo omputo sigao'ano nekonando Yesus." <sup>8</sup>Dofetingke peda na'a mie bhahi bhe kabhala'ino kota nohaliamo lalondo. <sup>9</sup>Tamaka pada dotanduo dhoi, Yason bhe bhahitie marasaeano dofolapadamo.

### Paulus bhe Silas we kotano Berea

17:10-15

<sup>10</sup>Alo aitu dua bhahitie marasaeano ne kotano Tesalonika maitu lasao dotudu Paulus bhe Silas dakumala we kotano Berea. Sahatondo we na'a dokala we lambu kasambahea'ando miendo Yahudi. <sup>11</sup>Mie ne itu nolalesa fekihindo, nopo'ala bhe miendo Tesalonika. Nohelasi lalondo detahima bhoasaono Lahata'ala. Se'o-se'oleo dopoguhu'ao wambano Kitabi do'ondofi kantoono pugauno Paulus maitu. <sup>12</sup>Dobhahi marasaeano ne Yesus, pakade dobhahi dua miendo Yunani tiangkano marasaeano, nahobhine namo'ane. <sup>13</sup>Gaha'a hato dofetingke miendo Yahudi we Tesalonika putae Paulus nefolele dua bhoasaono Lahata'ala we Berea, dokalamo we kotano Berea dohodha mie damewangi Paulus bhe Silas, sampe dofekahalia bhe totono lalondo mie bhahi. <sup>14</sup>Bhahitie marasaeano ne kota aitu lasao dotudu Paulus nakumala we wiwino te'i. Tamaka Silas bhe Timotius daa-daada we Berea. <sup>15</sup>Mie poangka'aono Paulus

doatoe ampa we kotano Atena maka dosuli dewowo'o kaowili so Silas bhe Timotius neanomo dapikiangkafie.

### Paulus we Atena

17:16-34

<sup>16</sup>Tangasano Paulus nontaa-ntaa Silas bhe Timotius we Atena, lalono nokompeaha sepali'a nowoha kota ana'a nopono'ao patungno dewa nesombaindo. <sup>17</sup>Dadi'anomo Paulus nopesua weo lambu kasambaheha'a nopuga-pugau bhe miendo Yahudi bhe mie mote'ino ne Lahata'ala. Peda dua aitu se'o-se'oleo nokala we daoa nopuga-pugau bhe mie nepo'awa'aono. <sup>18</sup>Nandoo seemie hodua mie mo'osano fekihi mai'aono ne walakando Epikuros bhe Stoa<sup>a</sup> dopuga-pugau dua bhe anoa. Nandoo mugauno ambado, "Napugau'ao ae bhahaa mie pande gau maitu, kabhahino wambano!"



*Paulus we Atena*

<sup>a</sup> 17:18 Epikuros seemie mande fofoina Paulus we Atena'u'aono putae dodadi ne dhunia ini, so nefosibhala o kataano namisi. Walakando Stoa doangkafi kafoina'uno seemie mande konea'ano Zeno. Anoa ini nofoina'u putae totono lalondo manusia tabeano samotoho, miina natiangkoa ne sabhaha waweno dadi, naetaa ka'ia naetaa kasabha.

Tamaka ambado dua sigao'ano, “Kao-kaomo nehato'ao kafoguhuno dewando koliwuno.” Kapugau'ando peda maitu mba'inomo netulata'ao Yesus bhe kawanu'ando mie mate. <sup>19</sup> Pada ana'a doowaemo ne hompu'a te kabhawono Areopagus. Ambado, “Naembali bhahaa mohato kainsami kafoguhu bu'ou nehato'aomu itu? <sup>20</sup> Kapa'amo mehato'a kainsami tapa'o nefeti-fetingke mani. Dadi'anomo gao mani tamande'aane dua o ae ma'anano.” <sup>21</sup> (O miendo Atena na'a bhe mie sigao'ano meateno ne itu tadopada wakutuundo dofetingke tawa dopuga-pugau'ao bhihita bu'ou'ano.)

<sup>22</sup> Paulus noehemo ne wisendo humompuno te Areopagus maka nopugau ambano, “Miendo Atena, a'ondo-ondokoomu itu weo ehe ngkohamiu no'osa sepali'a kosomba'amiu ne dewa. <sup>23</sup> Kapa'amo kaomponano aliligi kotamiu ini bhe afoti-fotinda nesombaimiu, ta'awohamo dua medha kontu kaetunu'a kapopanga bhe kabuhino. Kabuhino peda aini, ‘So ompu tapa tipande'aono.’ Nesombaimiu ini mahingga miina'o mande'aaneomua, Anoamo itu so nefohato'ao-ku inia. <sup>24</sup> Lahata'ala mokonandoono dhunia bhe kosasawi'ae i'ino, Anoamo ompuno lani bhe dhunia. Anoa miina naeatea ne lambu kaesombai'a kahabu'ando manusia. <sup>25</sup> Lahata'ala miina dua namaralua da'umondofaane manusia kao-kaomo bhe nekae'aono dua. Ingka wutono Lahata'ala fowa'aonomo dadi, o inawa bhe kosasawi'ae nefaraluundo manusia. <sup>26</sup> Nomai'ao ne seemie manusia nofokonandoo sabhaha bansano liwu meatefino koseka'ewa'ae dhunia ini. Mpini kabhao-bhaono Anoamo motantuno liwu so kaeate'ando bansano liwu na'a bhe tempono dadindo manusia. <sup>27</sup> Kanandoo'ano peda na'a neanomo manusia da'umondofi Lahata'ala, kanggetu dolili'ao feda-fedampa bhaha'i kaowu dapo'awane. Gaha'aitu Anoa sakotu'u'anoa miina nakodo'o bhe intaodiomu inia. <sup>28</sup> Kapa'amo intaodiomu ini dodadi, dokodiu bhe donandoo'omu ne dhunia ini hampano kuasano Lahata'ala. Aini nopoulosahataa dua bhe nekosuaha'aondo pande buhimiu, ambado, ‘Intaodiomu ini saneamo dua sampu'ano Lahata'ala.’

<sup>29</sup> Dadi'anomo hampano intaodiomu ini sampu'ano Lahata'ala, pae naembalia dakofekihi putae Lahata'ala maitu nopototo bhe patung bulawa tawa o pera bhaha'i o kontu angka'ano limando pande.

<sup>30</sup> Ampa aitu Lahata'ala miinamo napolentua bhe dhamanino kakabhohe-bhohendo manusia, sampe nofohatodamo kosasawindo manusia kosedhuniah'ae ini dametompa'aomo podiu modaindo.

<sup>31</sup> Kapa'amo padamo nofotantue tempono so dabhitahaki'ao manusia

kosedhunia'ae ini, naposahataa bhe podiundo seemie-seemiea. O mie so fobhitahakino na'a padamo dua nofotantue, maka mbali tandano so doparasaesa'ao sabhaha mie, Lahata'ala nofowanue mai'ao ne mate.”

<sup>32</sup>Dofetingke kawanu'ando mie mate, nandoo tadebheu bhe dofuta-futaa'ie. Tamaka nandoo dua mugauno ambado, “Gao mani tametingke toha tana sepaku metula-tula'ao medano aitu.” <sup>33</sup>Pedamo aitu Paulus nohunsamo hompu'a ana'a. <sup>34</sup>Tamaka nandoo dua seemie hodua mo'ane doangkafie bhe doparasaesa ne Yesus. Ne olotando andoa na'a nandoo konea'ano Dionisius seemie kamungkula Sahano Areopagus. Nandoo dua seemie hobhine konea'ano Damaris bhe mie sigao'ano.

### Paulus we kotano Korintus

18:1-17

**18** Pada aitu Paulus nohunsamo Atena maka nokala we kotano Korintus. <sup>2</sup>We Korintus nopo'awa bhe seemie Yahudi konea'ano Akwila nomai'ao we kadieno Pontus. Anoa kane'o nohato nomai'ao we witeni Italia bhe hobhineno, neano Priskila. Kahato'ando ne itu mba'inomo Omputo Kaisar Klaudius nefondawu pahinta putae kosasawindo miendo Yahudi dahumunsa kotano Roma. Paulus noangka we lambudo, <sup>3</sup>maka neate bhe andoa hampano kadadi'ando nopototo. Andoa dokahadhaa doposabha-sabhangka dehabu-habu kulino kadadi mbali tenda. <sup>4</sup>Se'oleono Sabat Paulus nokala nopuga-pugau bhe miendo Yahudi bhe Yunani we lambu kasambahea'a, patudhuno namoparasaesa dua ne Yesus.

<sup>5</sup>Dohato Silas bhe Timotius domai'ao we kadieno Makedonia, Paulus nofosibhalamo nopuga-pugau bhe miendo Yahudi. Andoa nofohatoanda putae Yesus maitu kotu-kotu'u Mesias, Omputo Fosalamatino. <sup>6</sup>Tamaka mie andoa maitu doewangie bhe dofe-ka'aebue, sampe Paulus tanotanta bungahasino pakeano mbali kafodhagando. Ambano, “Hunsa'anomo mengkuluomu heamiu, ma'anano ane me'awaomu balaa, ka'alano wutomiu, o idi miina a'umalaa. Notanda aitu akumalamo we bansano liwu suano Yahudi.” <sup>7</sup>Dadi'anomo Paulus nohunsadamo maka nokala se lambuno seemie konea'ano Titius Yustus. Anoa ini note'i dua ne Lahata'ala; lambuno noposohihi bhe lambu kasambahea'a. <sup>8</sup>Krispus mande'ano lambu kasambahea'a na'a bhe kosasawindo mie weo lambuno

doparasaeamo ne Ompu Yesus. Dobhahi dua miendo Korintus metingkeno kafoguhuno Paulus doparasaea maka dokadiuda.

<sup>9</sup>Sealo Paulus nokopowoha, nofetingke Ompu nokowamba ne anoa, “Koe mote'ia, fokansuhumo folele Bhihita Metaa, tapugau-mo. <sup>10</sup>O idi apobhaiangko kansuhu, pae bhe so dumingkukoa tawa modee-deekoa hampano dobhahi umatiku weo kota aini.” <sup>11</sup>Paulus neate ne itu seta'u nomo wula bhe nofoguhandu kansuhu bhoasaono Lahata'ala.

<sup>12</sup>Tamaka saeheno Galio mbali gubernur we Akaya, miendo Yahudi downusaomo doewangi Paulus maka doowae ne wiseno pande bhitaha. <sup>13</sup>Ambado, “Mie aini nowudhu mie bhahi dasumbai Lahata'ala, tamaka kafoguhuno na'a nopoewangi bhe tubhono agama Yahudi weo Kitabino Musa.”

<sup>14</sup>Paulus kane'o namugau, gaha'a nogolotiemu Galio ambano, “Miendo Yahudi! Ane sumungku'ao'omu mie mekangkala'ino atora tawa mehabuno modaino, nopantasi atumahimakoomu. <sup>15</sup>Tamaka nepo'ala-alati'aomiu ini, ingka po'alati kaowu wamba, o nea bhe tubhono agama sapada-pada hintimiu. Dadi'anomo fosintuwu'ao wutomiu, o idi aongahe aebhotusi giu medano aitu.” <sup>16</sup>Pada ana'a nogihasidamo. <sup>17</sup>Tamaka kosasawindo mie na'a dobuutimo Sostenes mande'aono lambu kasambahea'a, maka dowangkulie ne wisendo pande bhitaha, tamaka Galio miina napokiha'iandaa.

### Paulus nosuli we Antiokia

18:18-23

<sup>18</sup>Nomampona-mpona dua Paulus neate we kotano Korintus. Pada ana'a nofealaimo bhahitie marasaeano ne itu maka nosawi ne bhangka nohope we kadieno Siria. We kotano Kengkrea noguntimo wuluno fotuno, katandaino kafolapasino wea wambano ne Lahata'ala.<sup>a</sup> Priskila bhe Akwila dopobhaiane dua. <sup>19</sup>Dohato we kotano Efesus Priskila bhe Akwila nohunsadamo ne itu. Paulus nopesua weo lambu kasambahea'a maka nopuga-pugau bhe miendo Yahudi. <sup>20</sup>Miendo Yahudi desaloe naeate namekampona ne itu tamaka miina na'umundaa. <sup>21</sup>Paulus nofealaimo ambano, “Se'inawono toha asumulikikoomu ane namolalesa kanau Lahata'ala.” Pada ana'a nohunsamo Efesus.

<sup>22</sup>Nosedede kaowu we kotano Kaisarea, nofonimo te Yerusalem noangkai umati marasaeano ne itu maka nopansuhu we Antiokia.

<sup>a</sup> 18:18 Weano wamba Bil 6:13-21

<sup>23</sup>Se'oleo haa oleo kaowu dua neate we Antiokia, nokalamo toha noangkai kadieno Galatia bhe Frigia, namekatangka lalondo kosa-sawindo mangkafino Yesus ne itu.

### Apolos we Efesus

18:24-28

<sup>24</sup>Wakutuu ana'a tanohatomo dua seemie Yahudi we kotano Efesus, neano Apolos, nomai'ao we kotano Aleksandria. Anoa ini pande wamba bhe nopoolie i'ino Kitabi. <sup>25</sup>Anoa ini padamo nopoguhu'ao kafoina'uno Yesus. Nokamai-mai sepali'a lalono nofofogu bhe notinda lalono netula-tula'ao Yesus, tamaka kapande'aono ampamo kaowu kakadiuno Yohanes. <sup>26</sup>Weo katangkano lalono nemandakimo nofofogu weo lambu kasambahea'a. Sadofetingkee Priskila bhe Akwila, lasao dowowo'oe se lambudo, maka do-talesaane dofotinda-tindaane kaangka'ano Ompu.<sup>a</sup>

<sup>27</sup>Pada ana'a Apolos nopoindalo nalumimba we kadieno Akaya maka bhahitie'i we Efesus depakatu suha ne bhahitie marasaeano we Akaya neanomo datumahimae. Sahatono we Akaya, hampano kabarakatino Lahata'ala Apolos nokofahalaa sepali'a mbali mie marasaeano ne Yesus ne kadie aitu. <sup>28</sup>Miina namanda-mandaa, miendo Yahudi notaloanda wamba ne wisendo mie bhahi, bhe nofotiwohaandae ne aeatino Kitabi putae Yesus maitu Mesias, Omputo Fosalamatino.

### Paulus we Efesus

19:1-12

**19** Tangasano Apolos nandoo'e we Korintus, Paulus nopalintangimo tombuno kabhawo weo kadie aitu maka nohato we kotano Efesus. Ne itu nopo'awa'ao seemie hodua mie mangkafino Yesus. <sup>2</sup>Nofeenadamo ambano, "Tahimaemoomu bhahaa Rohino Lahata'ala pakaparasaeamiu?" Tamaka ambado, "Miina'o, bhahamoa miina'o tametingke nandoo Rohino Lahata'ala." <sup>3</sup>Ambano dua Paulus, "Ane peda na'a, weo nea la'ae gaha'a dokadiukoomu?" Ambado, "Taetahima kakadiu peda nefoguhu'aono Yohanes." <sup>4</sup>Ambano toha Paulus, "Kakadiuno Yohanes katandaino o mie dofetompa'ao podiu modaindo, tamaka ambano Yohanes ne mie bhahi, tabeano damarasaea ne mie so maino namalusi anoa,

<sup>a</sup> 18:26 Kaangka'ano Ompu, ma'anano putae Yesus maitu meowano kasalamati so manusia noposahataa bhe patudhuno Lahata'ala.

nopulao'ao Yesus.”<sup>5</sup> Dofetingke peda maitu lasao dokadiuda weo neano Ompu Yesus.<sup>6</sup> Tangasano Paulus notei limano te wawondo, Rohino Lahata'ala nokabhintidamo sampe dopugau depake wambano Rohi bhe dokosuaha peda anabii.<sup>7</sup> Kabhahindo dapeompulu hodua.

<sup>8</sup>Ampa tolu wula Paulus sadhia nopesua weo lambu kasambahea'a ne itu bhe nokado nofofogu. Nopuga-pugau bhe andoa patudhuno mpuu namoparasaeada ne kahato'ano Kafopahinta'ano Lahata'ala.<sup>9</sup> Tamaka nandoo dua seemie hodua katu'a fotu. Andoa ini dongahe damarasaea, bhahaa tadofekandidiki kaangka'ano Ompu maitu ne wisendo mie bhahi. Kanandoo'anomo Paulus nohunsadamo. O mie mangkafino Yesus nogaatida maka se'oleo nofoina'uda weo boloku kapoguhu'ano Tiranus.<sup>10</sup> Aini nodhalangie haa ta'u kaomponano sampe kosasawindo meateno ne kadieno Asia maitu dofetingkemo bhoasaono Ompu, namiendo Yahudi namiendo Yunani.<sup>11</sup> Noangka ne limano Paulus, Lahata'ala nefokonandoo sabhaha giu timenteaono.<sup>12</sup> Mahinggamo tadowowo'o kakamasi tawa kabhini nepakeno Paulus maka dotei'e te wawondo mie mosaki, do'osaanemo. Sakindo tanosimiinae'amo, o seetani dopuli dolimba.

### Ana'ino Skewa

19:13-20

<sup>13</sup>Nandoo dua seemie hodua bhisa miendo Yahudi dolili weo kota aitu. Andoa desoba-soba dua dosambili neano Yesus ne mie nepesuakino seetani. Ambado, “Abhatata'iangko weo neano Yesus nefoguhu'aono Paulus, limba'o toha.”<sup>14</sup> Humabuno peda amaitu ana'ino seemie Imamu Bhalano miendo Yahudi konea'ano Skewa. Kabhahindo dopipitu.<sup>15</sup> Tamaka seetani tanotobhoosida ambano, “Yesus apande'aane, Paulus afengkana'ane dua, tamaka la'ae gaha'a hintimiu ini?”<sup>16</sup> O mie nepesuakino seetani maitu lasao nolumpakida noala-alada, pakeando padae nogogawiea. Kopipitundo notaloda sampe dofilei kalembi-lembi mai'ao ne lambu aitu bhe dokobhela-bhela.<sup>17</sup> Kadhadhia amaitu dofetingkee kosasawindo mieno kota Efesus, namiendo Yahudi namiendo Yunani. Dadi'ano mo kosasawindo dote'i sepali'a maka dhulu katiende-ende neano Ompu Yesus.

<sup>18</sup>Dobhahi dua marasaeano domai domangaku'ao dhosando ne wisendo mie bhahi, detula-tula'ao habu modaindo.<sup>19</sup> Dobhahi dua



mie pande sihiri lasao dotawunao boku-bokuno dhoando maka dohampunie ne wisendo mie bhahi. O bhaseno boku ana'a doseree napelima fulu hewu dhoi pera. <sup>20</sup>Pedamo ana'a bhoasaono Laha-ta'ala dhulu ka'ewa leleno bhe dhulu kamatangka kuasano.

### Demetrius nehabu kahungga we Efesus

19:21-41

<sup>21</sup>Nopalusi sabhaha kadhadhia amaitu, Paulus nokopatudhu nakumala we Yerusalem namangka we kadieno Makedonia bhe Akaya. Ambano, “Namada ana'a tetewei akumala dua we kotano Roma.” <sup>22</sup>Notudumo palima-limano dohodua, Timotius bhe Erastus, dama'indulu we Makedonia. Tamaka anoa se'oleo haa oleo nandoo neate we kadieno Asia.

<sup>23</sup>Kiha-kiha wakutuumo ana'a nonandoo kahungga bhalano mba'inomo kaangka'ano Ompu. <sup>24</sup>Nandoo seemie pandeno salaka konea'ano Demetrius, nehabu-habu kalambu-lambu salaka, sandahano lambu katisombai'ano dewa hobhine nekonando Artemis. Kagiuno ini nobhahi labano mbali mie kumahadhaano. <sup>25</sup>Wakutuu ana'a Demetrius nofohompumu mieno bhe pande-pande salaka sigao'ano maka nofohatoda ambano, “Bhahitie'iku! Ingka pande'aanemoomu kaetaa'ano namisintoomu ini hampano hasilino kagiuni aini!” <sup>26</sup>Aitu ingka woha'ao wuntano matamiu bhe fetingkeemoomu dua habuno Paulus. Nobhahi newudhu bhe nefekakolilino lalondo mie, suano kaowu ne Efesus ini tamaka noma'omo nokabhintie kosekadieno Asia ini. Ambano Paulus, ‘Nehabundo limando manusia suano ompua!’ <sup>27</sup>Dadi'anomumu kagiunoomu ini newisekimo balaa bhe natisambili modai, pakade suano kaowu ana'a tamaka lambu katisombai'ano dewa Artemis paemo nakoma'anaa. Pada dua ana'a wutono dewa Artemis nesombaintoomu miendo Asia bhe nesombaindo kosedhunia'ae ini namiinaemo kakalabhiano!”

<sup>28</sup>Dofetingke peda na'a mie bhahi nohehemo bhakendo, ka'osano amahando, maka dopokakei-kei ambado, “Nokalabhia Artemis, dewando miendo Efesus!” <sup>29</sup>Kose'onu kota'ae tadohialelemo, dosi-hope-hope'a we stadion.<sup>a</sup> Dobulumo dua Gayus bhe Aristarkus, miendo Makedonia posabhangka'aono Paulus we sala. <sup>30</sup>Paulus

<sup>a</sup> 19:29 O stadion katihompumu'ando mie, miina nako'atoa. Kaneando dopakee mbali kapokalalambu'a bhe hompu'a bhalano.

gaono namesuakida, tamaka do'ele'aane mie marasaeano. <sup>31</sup> See-mie hodua kabhala'i ne kadieno Asia posabhangka'ano bhe Paulus dofodhagae dua keana nopesua weo stadion na'a. <sup>32</sup> O mie ti-hompuno weo stadion netaa mpuu dopokakei-keia. Nandoo kumeino peda aini, nandoo kumeino peda aitu, tadopokakei-keimo, kapa'amo dobhahi pata mande'aane noafa kahompu'ando ne itu. <sup>33</sup> Nandoo seemie konea'ano Aleksander dodhudhulaane miendo Yahudi te wise, kuna'endomo anoamo mehabuno kahungga. Lasao noaleda keana dohobho patudhuno natumundu'ao wutono te wisendo mie bhahi maitu. <sup>34</sup> Tamaka sadopande'aane anoa maitu miendo Yahudi, kosasawindo dosikei-kei'amo napehaa dhamu kaomponano. Ambado, "Nokalabhia Artemis, dewando miendo Efesus!"

<sup>35</sup> Panda-pandano dhurutulusino kota aitu nopooli dua nofo-hempo mie bhahi maitu. Ambano, "Miendo Efesus! Ingka kosasawindo mie ne dhunia ini dopande'aane putae kotanomo Efesus ini mohilalono lambu katisombai'ano dewa Artemis fofoliuno kakalabhia. Intaodiomu dua mohilalono kontu mongkilono sandahano, sumampu'ano mai'aono te lani. <sup>36</sup> Aini miina natigagaia. Dadi'anomo fotoho lalomiu, koe tapa'indulu kodiu'omua. <sup>37</sup> Kapa'amo mie neowamiu ne ini, ingka miina dapombuhusi lambuno dewantoomu, pakade miina dua damekandidiki neano. <sup>38</sup> Dadi'anomo ane Demetrius bhe mieno nandoo bhe so nesungku'aondo, ingka nandoo oleo hompu'ando pande bhitaha, nandoo dua pamarinta. Tadakumalamo daobhieanda ne andoa maitu. <sup>39</sup> Ane nandoo dua patudhumiu sigao'ano, tabeano damohempoe weo hompu'ando ra'eati. <sup>40</sup> Bhahi tadofosangkati dehabuomu kahungano liwu oleo itu, kapa'amo miina bhe tingku katangka'aontoomu ne kahialele aini."

<sup>41</sup> Pada nopugau peda maitu, ra'eati notududamo dasumuli.

### Paulus nokala we Makedonia bhe Troas 20:1-12

**20** Nopalusi kahungga ana'a Paulus nosali'imo mie marasaeano maka nofekatangka lalondo. Pada aitu nofealaimo maka nokala we kadieno Makedonia. <sup>2</sup> Anoa noliligi kadieno Makedonia maitu bhe nobhahi katangahino nofekatangka lalondo mie marasaeano. Pada ana'a nopansuhu we kadieno Yunani. <sup>3</sup> Nokapo tolu wula neate ne itu, patudhuno nahumope we kadieno

Siria. Nobhingke nakumala, gaha'a tanonandoomo bhihita putae miendo Yahudi dopugau-gau damongkoe. Dadi'anomo nobhotusie mo nasumuli kundono namangka we kadieno Makedonia. <sup>4</sup>Dopobhaiane Sopater anano Pirus mieno Berea, Aristarkus bhe Sekundus, kohoduando miendo Tesalonika, Gayus mieno Derbe, Timotius, Tikikus bhe Trofimus miendo Asia. <sup>5</sup>Andoa na'a dopa'indulu maka dontaa-ntaa kainsami we kotano Troas. <sup>6</sup>Nopalusi hohaea'ano Roti Tapa Koragino tahelamo tamai'ao we kotano Filipi maka nopooli neelima tahatomo we Troas bhe tapo'awa-awamo toha. Ne itu taeate fitu oleo kaomponano.

<sup>7</sup>Ne alono Ahadhi tapohompu-hompumo tapoharora. Paulus nopuga-pugaumo bhe bhahitie'i ne itu hampano patudhuno namentae nakumalamo toha. Puga-pugauno maitu tanofewunta'i alo. <sup>8</sup>Weo boloku te wawo, ne kapohompu-hompu'a mani na'a, nobhahi kantalea nesulaa. <sup>9</sup>Nandoo seemie ana'i mo'ane neano Eutikus nengkoaha-ngkoaha ne kaonga. Paulus nompona sepali'a nopuga-pugau sampe ana'i mo'ane aitu miinamo natumahamiea kampauno. Gaha'a nosimoodo'amo sampe nondawu nomai'ao te katolu sunsuno. Hato dosangkee nomatemo. <sup>10</sup>Tamaka Paulus lasao nosampu nolongkowi ana'i mo'ane aitu, nokakopue bhe nopugau ambano, "Koe mohobhoomua, nandoo nodadi." <sup>11</sup>Hato nosuli te wawo, Paulus nebhebheha roti maka dosihuma-humaa'a. Pada dohumaa, nandoo nompona toha nopuga-pugau; tanohaha kamentae maka nokala. <sup>12</sup>Ana'i mo'ane sa'ituini doatote se lambuno, nodadimo. Kosasawindo notilawesi sepali'a lalondo.

### Nomai'ao we Troas Paulus nokala we Miletus

20:13-16

<sup>13</sup>Insaodi tapa'indulu we bhangka maka tahela tahope we kotano Asos. Patudhu mani tasumumpui Paulus ne na'a peda kaowilino, hampano anoa noangka wite. <sup>14</sup>Hato tapo'awa-awa we Asos, Paulus nosawimo ne bhangka mani maka tapansuhu we kotano Metilene. <sup>15</sup>Tamai'ao ne itu tahelamo kansuhu, hato nomentae tahatomo we potala'ano liwutono Kios. Pooli neefua tahopemo we liwutono Samos, maka nopooli neetolu tahatomo we kotano Miletus. <sup>16</sup>Paulus padamo nobhotusie pae namangkaa we kotano Efesus, keana nopuli wakutuuno we kadieno Asia. Anoa nombago-ago, ane naembali pae'o nahumatoa hohaea'ano Pentakosta nahumatomo we Yerusalem.

**Pedato kafealaino Paulus ne kamu-kamungkula'i we Efesus  
20:17-38**

<sup>17</sup>Paulus netudu seemie namai'ao we Miletus nakumala we Efesus. Anoa noowili kamungkula'indo umati marasaeano we kotano Efesus damai we Miletus. <sup>18</sup>Sahatondo, Paulus nopugaumo ambano, "Bhahitie'iku, ingka pande'aaneomu peda amai aeate bhe hintimiua notanda oleo pakahatoku ne Asia ini. <sup>19</sup>Weo ka'ondo-faoku adhalangi kahadhaano Ompu, miina amosibhala wutoku, pakade nentuhu nondawu luuku bhe nobhahi ae'awa kasoba mai'ao ne miendo Yahudi so mongko kanau. <sup>20</sup>Ingka pande'aaneomu dua ampuu-mpuunie sepali'a afohatoangkoomu kofahalaa'ano so hintimiu. Kosasawi'ae apadae afebhihitaiangkoe'omu bhe afoina'uangkoe'omu, naetaa ne wisendo mie bhahi naetaa weo pohompu-hompu'a ne lambumiu. <sup>21</sup>Namiendo Yahudi namiendo liwu sigao'ano sadhia afodhagada, bhaha'i kaowu dametompa'ao dhosando, dadumoli ne Lahata'ala bhe damarasaea ne Ompu Yesus Kristus.

<sup>22</sup>Tamaka ampa aitu ta'aangka-angkamo pahintano Rohino Lahata'ala akumala we Yerusalem, maka ne watu miina amande'aane bhaha'i damafa'i kanau. <sup>23</sup>Ampamo kaowu nofohato kanau Rohino Lahata'ala ne amai liwu kaangka'aku ta'o katohongku bhe kafo-dee-dee so ne'awaku. <sup>24</sup>Tamaka miina sepali'a aoheruanea inawaku sumanomo ahumato ne hato'ano amotoka taka ne'awaku mai'ao ne Ompu Yesus, ma'anano aefolele Bihita Metaano rahamatino Lahata'ala.

<sup>25</sup>Kosasawimiu padamo aangkaikoomu afebhihitai'ao Kafo-pahinta'ano Lahata'ala. Aitu apande'aanemo, paemo moha kanau'omua. <sup>26</sup>Dadi'anomo se'oleo itu amohatokoomu sakotukotu'uno, aonggela aongkilo, suanomo ka'alakua ane ne olotamiu bhe so binasano mada kaowu. <sup>27</sup>Kapa'amo ampuu-mpuunie afohatoangkoomu kosasawi'ae patudhuno Lahata'ala. <sup>28</sup>Dadi'anomo dhagani wutomiu, dhaganie'omu umati marasaeano, peda dhagano dhumba no'ondofao kadadi kakaneano. Kapa'amo hintimiumo nesangkeno Rohino Lahata'ala membaliomu neangka so dhumanino umatino Lahata'ala. Umati andoa ini fehebua'ano Lahata'ala, notolosianda heano Anano. <sup>29</sup>Apande'aane dua, akumundo kaowu, o da'u ngkahoku fohumaano namesuakikoomu maka pae naegana-ganaa nadumai-dai kase'iseno umati. <sup>30</sup>Bhahamoa

mai'ao ne kase'isemiu nandumandoo dua so fofoguhu'aono tapa kumotu'u'ano, patudhundo dahumela lalondo mie marasaeano damangkafi andoa. <sup>31</sup>Dadi'anomo kodhagaomu! Tandai'eomu tolu ta'umo kaomponanoa, ole-oleono, koho-kohondo'ano miina ameontoa atangahikoomu seemie-seemie, nopotuhu bhe luuku.

<sup>32</sup>Aitu afopuliemo ne Ompu somo dumamba'aangkoomu, neanomo sadaa-daa mintahakie'omu bhihitano rahamatino. Lahata'ala nokokuasa namekatangka kaparasaeamiu bhe nadumawu-angkoomu sabhaha kadawu nefotantuno so mie nefekangkilono.

<sup>33</sup>Miina'o sepali'a akonimesalao ne la'ae-la'aemoa, nasalaka, nabulawa, tawa o pakea. <sup>34</sup>Ingka pande'aaneomu dua o limakumo ini kumahadhaano mbali kadadi'aku wutoku bhe kadadi'ando sabhangka'iku pobhai kanau. <sup>35</sup>Ne sabhaha nehabuku ini afotiwohaangkomoomu sandaha putae tabeano dokahadhaa mo'osa peda aini so datumulumi'ao mie kumadee-deeno. Ingka nofaraluu datumandai nepugau'aono Ompu Yesus, kapa'amo padamo nopugau ambano, 'Nobahakati dofowa'ao bhe detahimaa.' ”

<sup>36</sup>Pada nopugau peda maitu Paulus bhe kosasawindo dosefongko-fongkoha'amo tuundo maka dosambahea. <sup>37</sup>Kosasawindo do'ae tadokansodu-nsodumo poowa dokakopu Paulus bhe downoe. <sup>38</sup>Nokompeaha sepali'a lalondo, sedhulu'a dua mba'inomo padamo nopugau paemo daohaea. Pada ana'a doatoemo we bhangka.

### Paulus nokala we Yerusalem

21:1-14

**21** Pada tapofea-fealai lasao tahela tahope we liwutono Kos. Nomentae tahatomo we liwutono Rodos, tamai'ao ne itu tapansuhu we kotano Patara. <sup>2</sup>We Patara tae'awa bhangka so humope'ano we kadieno Fenisia. Lasao tasawi ne bhangka na'a maka takala. <sup>3</sup>Tawoha witeno Siprus humanda we kema, tamaka tatalaloi tahope we Siria. Panda-pandano tasedemo we kotano Tirus, hampano uleano bhangka na'a damosampue ne kota aitu. <sup>4</sup>Ne itu taangkaimo bhahitie'i marasaeano maka taeate bhe andoa fitu oleo kaomponano. Bhe kafohatono Rohino Lahata'ala, mie marasaeano ne itu dotangahimo Paulus keana nopansuhu we Yerusalem.

<sup>5</sup>Tamaka nohato kaowu tempono, tapansuhumo. Mie marasaeano ne itu mahingga hobhine'i bhe ana'indo doato kainsami ampa we simbalino kota. Tahato we wiwino te'i tafongkohamo tuu

mani maka tasambahea. <sup>6</sup>Pada tapofea-fealai tasawimo ne bhangka, andoa dosulimo dua we lambudo.

<sup>7</sup>Tamai'ao we Tirus tasedemo we kotano Ptolemais, ampa kaowu ne itu tasawi ne bhangka. Ne itu taangkai dua bhahitie marasaeano, se'oleo taeate bhe andoa. <sup>8</sup>Nomentae takalamo we kotano Kaisarea. Ne itu tabutu we lambuno Filipus. Anoa ini mefoleleno dua Bhihita Metaa, seemie ne olotando pipituno nesangkendo we Yerusalem endefi'itu.<sup>a</sup> <sup>9</sup>Filipus ini bhe kalambeno dopopaa sanea me'awano kapooli dokosuaha peda anabii. <sup>10</sup>Nopooli haa oleo tolu oleo taeate ne itu nohatomo seemie anabii mai'aono we kadieno Yudea, neano Agabus. <sup>11</sup>Anoa nomai'i kainsami maka noala kawaweno Paulus. Pada ana'a nokatapumo limano bhe a'eno wutono bhe nopugau ambano, "Ambano Rohino Lahata'ala: Kokawaweno ini dakumatapue miendo Yahudi we Yerusalem nada aini, maka daowae ne limando mie suano Yahudi."

<sup>12</sup>Tafetingke peda maitu insaodi bhe bhahitie marasaeano ne itu taesalomo mpuu ne Paulus koemo nokala we Yerusalem. <sup>13</sup>Tamaka Paulus tanotobhoosi ambano, "Noafa gaha'a mo'ae'ao'omu sampe fekasompodaomu bhe laloku? Ingka ahelasimo, suano kaowu takumatapu kanau, tamaka mahinggamo amate we Yerusalem hampano neano Ompu Yesus, ahelasimo dua." <sup>14</sup>Miina kaowu nametingke kamesalo mani na'a, miinamo takodiua. Amba mani, "Hunsa'anomo kapoindalono Ompu so kumadhadhia'ano!"

### Paulus dopo'awa bhe Yakobus we Yerusalem

21:15-26

<sup>15</sup>Nopalusi haa oleo tolu oleo taeate-ate we kotano Kaisarea taokanumo maka takala we Yerusalem. <sup>16</sup>Nandoo dua seemie hodua mie marasaeano we Kaisarea mangkafi kainsami. Andoa ini doowa kainsami we lambuno Manason, kabutu'a manimo. Mie aini nomai'ao we witenos Siprus, nomponamo noparasaea'a.

<sup>17</sup>Sahato mani we Yerusalem kosasawindo bhahitie ne itu do'ia sepali'a dosumpui kainsami. <sup>18</sup>Hato nomentae, Paulus nopooowamo bhe insaodi takalamo tapo'awa'ao Yakobus. Kosasawindo kamungkula'i dohatomo dua ne itu. <sup>19</sup>Pada nofeabhada, Paulus notula-tulaandamo nomai'ao ne siu kosasawi'ae nekahadhaano Lahata'ala ne mie suano Yahudi mangkano ne limano anoa. <sup>20</sup>Dofetingke peda na'a dopudhimo Lahata'ala maka dopugau ne Paulus

<sup>a</sup> 21:8 Tul 6:1-7

ambado, “Paulus bhahitie mani, naetaa mande'aane nehewundo-mo miendo Yahudi marasaeano ne Yesus, bhe sanea mintahakino mpuu tubhono agama Yahudi. <sup>21</sup>Tamaka andoa ini dofetingkemo dua ambado hintu ini mefoina'u miendo Yahudi meateno we koliwuno dahumunsa tubhono agama Yahudi. Ambado pugau putae o anando koemo dosunada bhe koemo dua damangkafi adhati Yahudi. <sup>22</sup>Kaowu nadamo amai itua? Ingka tetewei dametingke hatomo we ini. <sup>23</sup>Dadi'anomo angkafie nepugau'ao mani ini: Nandoo dopopaa inia wea wambano. <sup>24</sup>Wowo'o andoa ini maka fekanggela wutomu ampa mongkilo poowa-owa bhe andoa so katandaino kafolapasino weano wamba.<sup>a</sup> O dhoino tumanggoe hintu neanomo naembalimo dakumuhu fotundo. Ane mehabu nada ana'a, sabhaha mie damande'aanemo ingka o bhihita nefetingkendo itu gaha'a miina nakumotu'ua. Ingka gaha'a hintumoa daa-daa'e dhalangie tubhono agama Yahudi. <sup>25</sup>Tamaka mbali mie suano Yahudi toka marasaeano, padamo tabuhiandae tubhontubhonoa: koe dohumaa oti nepopanga ne barahala, koe dohumaa hea, koe dohumaa kamateno kadadi pata nesumbele bhe koe dua domonsulea.”

<sup>26</sup>Nomentae Paulus nowowo'omo mie popaano sa'ituini, dofekangkilo wutondo dotandaki kafolapasino weano wambado. Pada ana'a nopesuamo weo Lambuno Lahata'ala. Patudhundo naeowa kafohato bhaha'i naefie maka namalusi kafolapasino weano wambado bhe naefie daowa kapopangando seemie-seemie ne Lahata'ala.

### **Paulus dohakoe weo Lambuno Lahata'ala**

**21:27-36**

<sup>27</sup>Tempo fitu oleo noma'omo namalusi. Gaha'a seemie hodua miendo Yahudi mai'aono we kadieno Asia dowoha Paulus weo Lambuno Lahata'ala, lasao dowudhu mie bhahi sampe dohakoe, <sup>28</sup>bhe dokei ambado, “Miendo Israel, hamba kainsami! Aini'aemo ini mie mefoghuno sabhaha mie ne amai onuno liwu so damewangi'ao intaodiomu miendo Yahudi, dahumunsa tubhono agama Yahudi bhe damekandidiki Lambuno Lahata'ala ini! Pakade aitu newowo'omo dua miendo Yunani dopesua weo Lambuno Lahata'ala dofekaharamu lambu mongkilono ini!” <sup>29</sup>Kapugau'ando peda maitu hampano dowoha Trofimus mai'aono we Efesus nekala-kala

<sup>a</sup> 21:23-24 Weano wamba Bil 6:13-21

bhe Paulus weo kota, kuna'endomo Paulus nowowo'o dua mie ana'a weo Lambuno Lahata'ala.

<sup>30</sup>Mieno kota tadohialelemo, ra'eati tadosipumpumo. Pada dohakoe, Paulus dobulue we simbali maka lasao dosongko kosa-sawi'ae fointono Lambuno Lahata'ala. <sup>31</sup>Tangasano dosoba-soba damongkoe, gaha'a panglimano tantara Roma nofetingkemo bhihita kosekota'ae Yerusalem tadohialelemo. <sup>32</sup>Lasao nowowo'o seemie hodua neangkando tantara bhe tantara sigao'ano dua maka dosampu dotendeheki mie bhahi maitu. Sadowoha panglima maitu bhe tantara'ino, mie bhahi dofetumpumo dopepeki Paulus. <sup>33</sup>Panglima na'a noma'oti Paulus, lasao nohakoe maka notududa datumapuane hante haa honda poowa nofeena bhaha'i la'ae mie amaitu bhe nehabu ae. <sup>34</sup>Tamaka mie bhahi maitu tanofegiu kato-bhoosindoa. Mba'inomo tadohobhomo, anoa miina namande'aanea bhaha'i o ae sakotu'u'anoa kumadhadhia'ano maitu. Dadi'anomo nopahintangimo tantarano dawowo'o Paulus te benteno tantara. <sup>35</sup>Dohato we pulangkuno bente, mie bhahi tadopodhumpu-dhumpuhaomo sampe Paulus dosodaemo tantara'i maitu. <sup>36</sup>Mie bhahi netaa dobhatompa doangkafie bhe dokei, "Pongkoemoomu!"

### Paulus nofealai namugau

21:37-40

<sup>37</sup>Damesua kaowu weo bente, Paulus nopugaumo ne panglima maitu ambano, "Naembali bhahaa amugau ne hintu?" Ambano panglima na'a, "Pande gaha'a wamba Yunani?" <sup>38</sup>Kuna'ekumo hintu ini miendo Mesir mehabuno kahungga ha'oleo ini, mefilei'aono fato hewu gurumbola koewangano we pandaso bhalano. Gaha'a suano?" <sup>39</sup>Ambano Paulus, "Idi ini miendo Yahudi amai'ao we Tarsus, se'onu kota tiende-endeno we kadieno Kilikia. Aesalo ane naembali da'umunda kanau amugau ne mie bhahi maitu." <sup>40</sup>No'unda'aane kaowu panglima maitu, Paulus neehe-ehemo te fotuno pulangku maka noale ra'eati keana dohobho. Miina kaowu dakodiu, Paulus nopugaumo ne andoa nepake wamba Ibrani.

### Paulus nopugau ne miendo Yahudi

22:1-29

**22** Ambano Paulus, "Bhahitie bhe kamungkula'iku, soba fetingkee'omu nepugau'aoku ini atumundu'ao wutoku." <sup>2</sup>Dofetingkee gaha'a nepake wamba Ibrani, mie bhahi maitu sedhulu'a



dua miinamo dakodiua. Ambano toha Paulus, <sup>3</sup>“O idi ini miendo Yahudi, alente we kotano Tarsus we kadieno Kilikia, tamaka aobhala ne Yerusalem ini. Nofoguhu kanau Gamaliel nompuu-mpuunee sepali'a, apoguhu'ao tubhono agama nefosampu ne awua'intoomu. Kanandoo'anomo nokamai-mai sepali'a laloku akahadhaa so Lahata'ala, peda dua hintimiu itu ampa aini. <sup>4</sup>O idi padamo aefodee-dee mangkafino kaangka'ano Ompu Yesus sampe domate. Nam'oane nahobhine ahakofida maka aowada we katohongku. <sup>5</sup>Kabanarano pugauku ini naembali dasumakusii'ane Imamu Bhalano bhe Sahano kamungkula'i. Andoa ini dow'a kanau suha so miendo Yahudi we kotano Damsyik. Padamo dua akala we na'a patudhuku ahumakofi mie mangkafino Yesus ne kota aitu maka aowada we Yerusalem damodee-deeda.

<sup>6</sup>Gaha'a ahato we laano sala noma'omo bhe kotano Damsyik, toho indotu oleo tamba'omo nokalibu kanau tilanga mai'aono te lani nomahasai bhe a'ondo. <sup>7</sup>Lasao atihambitao we wite maka afetingkemo suaha ambano, 'Saulus, Saulus, noafa fodee-dee kanau?' <sup>8</sup>Ambaku, 'La'ae gaha'a hintu itu waompu?' Ambano, 'Idi ini Yesus miendo Nasaret nefodee-deemu itu.' <sup>9</sup>Mie poowa'aku dowohae dua tilanga na'a tamaka suaha miina dametingkeea. <sup>10</sup>Ambaku toha, 'Aeafa bhahaa Ompu?' Ambano dua Ompu, 'Ehe, maka kala we Damsyik, ne watu damohatoangoemo sabhaha taka nefontantuno Lahata'ala so nekahadhaamu.' <sup>11</sup>Idi miinamo afowohaa hampano kasombano matakun ne tilanga sa'ituini, habutuno tadotonda kanau sabhangka'iku, maka tapansuhu we Damsyik.

<sup>12</sup>Ne kota aitu nandoo seemie konea'ano Ananias. Anoa ini mie lumebeno, nofintahaki tubhono agama bhe dofosibhalae sepali'a kosasawindo miendo Yahudi ne kota aitu. <sup>13</sup>Anoa nomaimo nee-ehe ne sohihiku, maka ambano, 'Saulus bhahitieu, fowoha'otoha!' Gaha'a lasao afowoha maka atontoe. <sup>14</sup>Ambano, 'Lahata'alando awua'intoomu nopilikomo mande'ao patudhuno, pakade moha Mie Melaano Lalo [wutono Yesus] bhe metingke suaha mai'aono ne wiwino. <sup>15</sup>Kapa'amo hintu ini membalino sakusii, newohamu bhe nefetingkemu na'a mosampeandae sabhaha mie. <sup>16</sup>Dadi'anomo noafa gaha'a nopoibhaha'ao lalomu? Ehe, owa wutumu dokadiukoana. Metondala ne Ompu, fekangkilo totono lalomu noti'amponi'ao dhosa-dhosamu!'

<sup>17</sup>Hato asuli we Yerusalem, tangasano asambahea weo Lambuno Lahata'ala, akopowohamo. <sup>18</sup>Ta'awohamo dua Ompu nopugau

ne idi ambano, 'Mbaago-ago! Fekahimbamo hunsa Yerusalem ini, kapa'amo andoa itu pae datumahimae ane sumakusii'ao Inodi.'<sup>19</sup> Ambaku, 'Ompu, ingka andoa maitu dopande'aane idimo ini pontaalala-ala'aono lambuno kasambahe'a, ahakofi mie marasaeano ne Hintu maka afopesuada weo katohongku bhe afodee-deeda.<sup>20</sup> Pedamo dua ne oleo katipongko'ano sakusiimu Stefanus, ingka bhe idi, pakade aangkafi dua habundo maitu. Pakeando fopongkono na'a adhaganiandae idi.'<sup>21</sup> Tamaka ambano Ompu, 'Kalamo, kapa'amo atumuduko we kodo'o'ano, we liwundo mie suano Yahudi.' "

<sup>22</sup>Mie bhahi dofetingke pugauno Paulus ampa kaowu ne na'a, lasao dokei ambado, "Pongkoemoomu mie anoa itu! Miinamo namantasia nadumadi te wawono dhunia ini!"<sup>23</sup> O mie bhahi dokei kansuhu poowa do'ohofi dhubando bhe dekambuhi bungahasi, [ka'osano amahando].<sup>24</sup> Nowoha peda maitu o panglima nofondawumo pahintano damopesua Paulus weo bente maka damee-meena bhe dahumambisiane habuta. Patudhuno so dopande'aane'ao noafa Paulus dokei-keisie mie bhahi peda maitu.<sup>25</sup> Tamaka hatu dokatapue maka dahumambisiane habuta, Paulus nopugaumo ne tantara meehe-eheno ne itu, "Gaha'a nembali mepepekiomu warga negarano Roma? Pakade miina'o dabhitahakiea."

<sup>26</sup>Nofetingke peda amaitu tantara ana'a nekapunamo ne panglima ambano, "O ae gaha'a so nehabumu inia? Ingka mie amaitu warga negarano Roma."<sup>27</sup> Panglima na'a lasao nokala'i Paulus maka nofeena ambano, "Soba fohato kanau, nokotu'u bhahaa hintu ini warga negarano Roma?" Ambano Paulus, "Uumbe."<sup>28</sup> Nopugaumo dua panglima na'a ambano, "Kapesua'aku warga negarano Roma ini no'ali a'oliea." Ambano Paulus, "Tamaka idi aembali warga negarano Roma mpini pakalenteuku."<sup>29</sup> Tantara so humambisiane habuta lasao dosowo. Sadopande'aane kaowu Paulus netapundo maitu warga negarano Roma, panglima maitu no'te'imo dua.

### Paulus te wiseno Sahano Agama

22:30-23:11

<sup>30</sup>Mahinggamo peda maitu, panglima na'a gaonoa namande'aane mpuu o ae ka'alano Paulus nesungku'aondo miendo Yahudi. Dadi'anomo hatu nomentae notududamo damolimba Paulus mai'ao we katitaangi'ano maka nopahintangi neangka'indo imam bhe

kosasawindo Sahano Agama dahumompu. Paulus noowaemo te wisendo andoa maitu.

**23** Paulus notonto Sahano Agama maitu maka nopugau ambano, “Bhahitie'iku, weo dadiku ampa se'oleo itu totono laloku nandoo nongkilo ne wiseno Lahata'ala.” <sup>2</sup>Tamaka Imamu Bhalano konea'ano Ananias notudu meehe-eheno ne owano Paulus dabhantofa wobhano. <sup>3</sup>Paulus tanotobhoosi ambano, “Lahata'ala so bhantofakoa, hintu itu mie mehaa'ulano, woha-woha'amu mie mongkilo, tapedamo kahondomi dobuhaane efi! Hintu itu mengkoha-ngkoha ne ini kopatudhu bhithaki kanau mangkafi tubhono agama, gaha'aitu kangkala'imo tubhono agama mba'inomo fotudu dabhantofa kanau.”

<sup>4</sup>O mie humatono ne itu dopugaumo ambado, “Ingka hintu ini fe'awuti Imamu Bhalano, nesangkeno Lahata'ala!” <sup>5</sup>Ambano Paulus, “Tabea, miina amande'aanea anoa itu Imamu Bhalano. Ingka notibuhi, ‘Koise pugau molea ne mie neangkando liwu!’ ”<sup>a</sup>

<sup>6</sup>Paulus nopande'aane mie humatono maitu siga'a miendo Saduki, siga'a miendo Farisi. Dadi'anomo nopugaumo nofekabhala-bhala'ie ne wisendo Sahano Agama ambano, “Bhahitie'iku, idi ini o Farisi, sampu'ando miendo Farisi, katibhitahaki'aku ne ini, mba'inomo aposahuna'ao mie mate sumuli dadumadi.” <sup>7</sup>Dofetingke nopugau peda maitu dopotaga-tagalimo miendo Farisi bhe miendo Saduki, sampe mie bhahi maitu dopo'ea, dewalamo. <sup>8</sup>Kapa'amo ambado miendo Saduki, miina bhe kawanu'ando mie mate, miina dua bhe mala'ekati tawa o rohi, tamaka miendo Farisi doparasaea kosasawi'ae na'a sanea nonandoo. <sup>9</sup>Hompu'a ana'a sadhulu-dhulu kahobho. Pande-pande Kitabi mai'aono ne miendo Farisi doehemo maka dopotagali ambado, “Mie anoa ini miina sepali'a nako-ka'alaa! Kao-kaomo nandoo bhe rohi tawa mala'ekati mugauno ne anoa.”

<sup>10</sup>Nodhulu ka'osa kapowengkendo sampe panglima note'imo bhahasaa dogogawi Paulus. Dadi'anomo netudumo tantara dasumampu da'umulei'e maka dasumuliane te bente.

<sup>11</sup>Nohondo oleo Ompu neehe-ehemo ne sohihino Paulus ambano, “Fekatangka lalomu, ingka padamo sakusii kanau ne Yerusalem ini. Mada kaowu sumakusii kanau dua nada aitu we kotano Roma.”

---

<sup>a</sup> 23:5 Kel 22:28

### Miendo Yahudi dopokanagau damongko Paulus

23:12-22

<sup>12</sup>Nomentae miendo Yahudi dopokanagau bhe dofemata paise daomaa daoho'ua ane pae'o damongko Paulus. <sup>13</sup>Kabhahindo pokanagauno na'a dokolabhi dofato fulu. <sup>14</sup>Andoa dokala'i neangka'indo imamu bhe kamungkula'indo Yahudi bhe dopugau ambado, "Insaodi padamo tafemata paise taomaa taoho'ua ane pae'o tamongko Paulus. <sup>15</sup>Dadi'anomo hintimiu bhe Sahano Agama mesalo kaitaomu ne panglima namowaangkoomu toha Paulus, woha-wohaemo sumuli toha mee-meena'omu mekatinda-tindae'omu. Insaodi notokamo kakanu mani, pae nahumatoa we ini, tamongkoemo we laano sala."

<sup>16</sup>Gaha'a fokoana'aono Paulus, anano finihobhineno nofetingkee kakanagaundo na'a. Anoa lasao nokala te benteno tantara maka nopesua nofohato Paulus. <sup>17</sup>Paulus lasao nelo'oi seemie tantara maka nofohatoe ambano, "Owa ana'i mo'ane aini se neangkamiu, nandoo bhe so nepugau'aono." <sup>18</sup>Tantara na'a noowamo ana'i mo'ane aitu se neangkando, maka nopugau ambano, "Paulus, mie netaangi na'a nesaloi kanau amowa ana'i mo'ane aini ne hintu, nandoo bhe so nepugau'aono." <sup>19</sup>Panglima nointahamo limano ana'i na'a, notondae se sohihi maka nofeena' ambano, "Mohato kanau ae bhahaa?" <sup>20</sup>Ambano ana'i mo'ane ana'a, "Miendo Yahudi padamo dopokanagau daesalo ne hintu, naewine mowaanda toha Paulus se wisendo Sahano Agama, woha-wohaemo Paulus damee-meena' toha damekatinda-tindae. <sup>21</sup>Tamaka koise angkafie kamesalondoa, kapa'amo dokolabhi dofato fulu kabhahindo, dantumaa'e we sala. Andoa ini padamo dofemata paise daomaa daoho'ua ane pae'o damongko Paulus. Kakanundo notokamo, tadontaa-ntaamo kabhotusimu." <sup>22</sup>Palusi peda na'a panglima notudumo ana'i mo'ane sa'itu nasumuli bhe nopugauane ambano, "Koise metaatangaa ne la'a-la'aemoa putae padamo fohato kanau."

### Paulus doowae we Kaisarea

23:23-35

<sup>23</sup>Pada aitu panglima nelo'oimo dohodua tantarano maka nofohatoda ambano, "Mefontaa-ntaa kaitaomu dahaa mo'ono tantara so kumalano we Kaisarea, pakade dafitu fulu tantara sumawino ne adhaha bhe dahaa mo'ono tantara meintahano pandanga.

Nahambi-hambi siua mata sealo itu dakumalamo. <sup>24</sup>Mefontaa-ntaa kaitaomu dua bhe adhaha nase'ulu haa ulu so kasawi'ano Paulus, maka owae'omu we gubernur Feliks. Dhaganie'omu tetewe nasumalamati ampa ne watu!" <sup>25</sup>Panglima na'a nebuhi dua bhe suhano, wambano peda aini.

<sup>26</sup>"Gubernur Feliks nefosibhalaku, suha aini nomai'ao ne Klaudius Lisias. <sup>27</sup>Mie aini dohakoe miendo Yahudi, nomai'omo damongkoe, posina'anomo apikihato bhe tantara'iku lasao afosalamatie, hampano afetingke anoa ini warga negarano Roma. <sup>28</sup>Pada ana'a aowaemo ne wisendo Sahano Agamando, patudhuku amande'ao kaowu bhaha'i dosangkatiene ka'ala ae. <sup>29</sup>Hato apande'aane gaha'a dohakoe mba'ino mo dopsala-salama'ana'ao tubhono agamando, tamaka miina bhe mantasi'anoa so natipongko'ao tawa natitohongku'aoa. <sup>30</sup>Aini dofohato kanaumo dua putae miendo Yahudi dopokanagaumo damongkoe. Dadi'anomo lasao atudu tantara'iku daowae ne hintu. Miendo Yahudi humereno padamo dua afohatoda mada'o daobhieane ne hintu."

<sup>31</sup>Pada ana'a tantara'i doalamo Paulus peda pahinta ne'awando maka alo aitu dua doowae ampa we Antipatris. <sup>32</sup>Nomentae Paulus dopansuhanemo, dosabhangkae kaowu tantara'i sumawino ne adhaha, tantara sigao'ano dosulimo we bente. <sup>33</sup>Sahatondo we Kaisarea, tantara'i sumawino ne adhaha maitu lasao doowa suha na'a bhe wutono Paulus se gubernur. <sup>34</sup>Pada nobasa suha maitu, gubernur nofeenamo Paulus bhaha'i nomai'ao ne kadieno ae. Hato nofetingke Paulus nomai'ao we kadieno Kilikia, <sup>35</sup>no-pugaumo ambano, "Netaamo. Dahumato kaowu mobhieangko itu, abhitahakikomo." Maka notududa datumaangi Paulus we kamalino Herodes.

### Paulus dosungkuane miendo Yahudi ne gubernur Feliks

24:1-23

**24** Nopooli neelima Imamu Bhalano konea'ano Ananias bhe kamungkula'indo miendo Yahudi dohatomo we Kaisarea dopoowa-owa bhe seemie pande parakara konea'ano Tertulus. Andoa ini dosungku'ao Paulus ne wiseno gubernur. <sup>2</sup>Paulus dosali'iemu dua. Sahatono, Tertulus lasao nosungkuane. Nopugaumo ambano,

“Gubernur Feliks nefosibhala mani, kaomponano owa kainsami ini notohopo ngkoha-ngkoha mani. Hampano kataano timbangimu nobhahimo sepali'a nefekataa'ia so kaetaa'ano liwu mani ini. <sup>3</sup>Kosasawi'ae maitu, ne amai maka dua sadhia tatahima metaa'e bhe notumpuane lalo mani. <sup>4</sup>Tamaka koemo afekawanta-wantaea, ampamo kaowu weo kataano lalomu tiende-endeno itu aesalo dametingke kainsami sebantaha. <sup>5</sup>Nentaleamo sepali'a ne insaodi, mie aini tapedamo hopu. Ne amai onuno liwu te dhunia ini, nehabu kahunggando miendo Yahudi. Anoa ini seemie neangkando miendo sarani, kase'ise umalano. <sup>6</sup>Pakade nesoba-soba nopokahaku'ao Lambuno Lahata'ala. [Dadi'anomo tahakoe patudhu mani tabhitahakie tamangkafi tubhono agama mani. <sup>7</sup>Gaha'a nohatomo panglima Lisias no'onta kainsami maka noagoi Paulus ne lima mani. <sup>8</sup>Pada ana'a humereno notududa dasumungku ne hintu.] Tafee-feenam mie aini, tetewei mande'aanemo putae nesungku'ao mani ini nokotu'u.”

<sup>9</sup>Miendo Yahudi sabhangka'ino doangkafimo dua dosungku'ao Paulus dofekakotu'u kosasawi'ae nepugau'aono Tertulus.

<sup>10</sup>Palusi aitu, gubernur nowa'ao Paulus se'ise tanda notudue namugau. Nopugaumo Paulus ambano, “Apende'aanemo neta'u-ta'unomo membali bhithakino liwu ainia. Dadi'anomo miina akamihi-mihia, atumundu'ao wutoku ne wisemu. <sup>11</sup>Naembali dameemeena, kane'o we ompulu haa oleono itu ahato we Yerusalem, patudhuku asumambahea. <sup>12</sup>Bhe naseemie miina bhe moha kanau apotagali bhaha'i ahabu kahungga, mahingga weo Lambuno Lahata'ala, mahingga weo lambu-lambu kasambahea'a tawa ne amai maka dua, miina. <sup>13</sup>Pakade kosasawi'ae nesungku'aondo pae damoolie damotiwohaangko bukutiinoa. <sup>14</sup>Daanumo paise agumagai'ea ne wisemu, idi ini aparasaea ne Lahata'alando awua mani aangkafi kaangka'ano Yesus, tamaka ambado andoa ini kafoina'u umala. Tamaka daa-daa'e dua aparasaea ne kosasawi'ae kafoguhu tibuhi'ano weo Kitabino Musa bhe Kitabindo ana-anabii. <sup>15</sup>Pedamo dua andoa ini, o idi aposahuna'ao ne Lahata'ala putae kosasawindo mie mate sumuli dadumadi, namie metaa, namie modai! <sup>16</sup>Dadi'anomo weo dadiku sadhia a'ulei laloku ampuu-mpuuni kangkilono totono laloku ne pomatano Lahata'ala bhe mie bhaiku.

<sup>17</sup>Ntini ta'u-ta'umo akala, maka asuli toha we Yerusalem aewowo'o sadhaka so saliwuku, bhe kapopanga so Lahata'ala.

<sup>18</sup>Tangasano ahabu kosasawi'ae maitu weo Lambuno Lahata'ala,

dohatofi kanaumo miendo Yahudi mai'aono we Asia. Idi kane'o pada afekanggela wutoku, miina bhe mie bhahi pobhai kanau, pakade miina bhe kahobhoa. <sup>19</sup>Ingka tabeano andoa na'a so sumungkuno ne hintu ane nandoo bhe so nehere'aondo. <sup>20</sup>Tamaka hunsa'aonomo andoa humatono ini daobhie kanaumo aitua, bhaha'i habu modai medano ae ne'awando, wakutuuno dobhithahaki kanau Sahano Agama. <sup>21</sup>Ampamo kaowu bheanea pugauku sehondano nefolimbaku te wisendo andoa wakutuu ana'a. Ambaku peda aini, 'Katibhitahaki'aku ne ini, mba'inomo aposahuna'ao mie mate sumuli dadumadi.' ”

<sup>22</sup>Tamaka gubernur Feliks mengkana'aono sepali'a kaangka'ano Ompu Yesus, nofotiehemu pobhita-bhitahakindo maitu. Ambano, “Nahumato kaowu panglima Lisias ne ini, abhotusiemo nesungku'aomiu itu.” <sup>23</sup>Pada ana'a notudumo neangkingando tantara datumaangi kansuhu Paulus, tamaka damolalesaemo seendai, pakade da'umunda'aanda sabhangka'ino ane damai daeowaane kafaraluuno.

#### **Paulus ne wiseno Feliks bhe Drusila** 24:24-27

<sup>24</sup>Nopooli haa oleo tolu oleo Feliks nohatomo bhe hobhineno konea'ano Drusila, anoa ini miendo Yahudi. Anoa nofotudu'aomo Paulus, nametingke'ao bhihitano kaparasaeano ne Yesus Kristus. <sup>25</sup>Tamaka hato Paulus nopugau'ao dadi banara, damewanaki totono lalo bhe kabhotusi nahumato Oleono Kiama, gubernur Feliks note'imo. Nopugaumo ambano, “Netaamo, kalamo kadeki. Ane bhe kasalawa metaa mada'o toha asumali'iko.” <sup>26</sup>Gaonoa Paulus nama'ane dhoi, dadi'anomo nentuhu nosali'ie dapotula-tula. <sup>27</sup>Tamaka nopalusi haa ta'u, gubernur Feliks nobhoosiemo Perkius Festus. Tamaka mba'inomo Feliks namala-ala lalondo miendo Yahudi, Paulus sadaa-daa'e notaangie weo katohongku.

#### **Paulus no'ende ne Omputo Kaisar** 25:1-12

**25** Nopooli tolu oleo nohato ne kadie neowano na'a, gubernur Festus nohunsamo kotano Kaisarea nokala we Yerusalem. <sup>2</sup>Ne itu neangka'indo imamumu bhe kamungkula'indo Yahudi dokalamo dopo'awaane patudhundo dasumungku'ao Paulus. <sup>3</sup>Andoa desalo kataano lalono Festus ane naembali dawowo'o Paulus we

Yerusalem. Andoa padamo dopokanagau damongko Paulus we laano sala. <sup>4</sup>Tamaka Festus notobhoosi ambano, “Paulus sadaadaa dotaangie we kotano Kaisarea, pakade idi apikisuli dua we watu. <sup>5</sup>Dadi'anomo neangkando kamu-kamungkula'i ne olotamiu itu tapoowa-owa takumala we Kaisarea maka mobhie'aneomu ane bhe ka'alanoa.”

<sup>6</sup>Festus neate-ate we Yerusalem alu oleo ampa ompulu'a maka nosuli we Kaisarea. Hato nomentae, nefokonandoomo hompu'a dabhitahaki Paulus. Paulus nofotudu'aanemo. <sup>7</sup>Sahatono kosa-sawindo miendo Yahudi mai'aono we Yerusalem doehemo dolibulibue, maka dosangkatiane sabhaha ka'ala mobhie. Ampamo kaowu miina damooliea dofotiwoha bukutiino. <sup>8</sup>Tamaka Paulus nopotundu'aomo wutono ambano, “Idi bhe naseendai miina akoka'alaa, mahingga ne tubhono agama Yahudi, mahingga ne Lambuno Lahata'ala tawa ne Omputo Kaisar, miina dua.”

<sup>9</sup>Gaha'a Festus nokopatudhu naeala-ala lalo ne miendo Yahudi maka nopugau ne Paulus ambano, “Umunda bhahaa kumala we Yerusalem, dabhitahakiko we watu ne wiseku?” <sup>10</sup>Notobhoosimo Paulus ambano, “Idi aeehe-ehemo ne wiseno kaebhotusi'ano Omputo Kaisar, dadi'anomo tabeano ne ini'aemo so katibhotusi'ano parakaraku ini. O hintu pande'aane sepali'a, bhe naseendai miina akoka'ala ne miendo Yahudi. <sup>11</sup>Ane kotu-kotu'u akoka'ala, aehabu modai'ano so mantasi'ano damongko kanau, ahelasimo amate. Tamaka ane pae nakotu'u nesangkati'aondo na'a, bhe naseemie miina bhe kohakunoa dakumataho kanau ne miendo Yahudi ini. Parakaraku ini a'umendeane ne Omputo Kaisar.”

<sup>12</sup>Pada nopofee-feena bhe kamungkula'i humompuno, Festus nopugaumo ambano, “Hintu padamo mesalo umende ne Omputo Kaisar, dadi'anomo tetewei kumala powise bhe Omputo Kaisar.”

### **Paulus ne wiseno Agripa bhe Bernike 25:13-27**

<sup>13</sup>Miina naomponaa nohatomo dua kolaki Agripa bhe Bernike<sup>a</sup> we Kaisarea dapointaha lima bhe gubernur Festus. <sup>14</sup>Nomampona-mpona kaowu deate ne itu, Festus notalesaanda parakarano Paulus. Ambano, “Ne ini nandoo seemie netaangi, nehunsano gubernur

---

<sup>a</sup> Miina naomponaa nohatomo dua kolaki Agripa bhe Bernike<sup>a</sup> we Kaisarea dapointaha lima bhe gubernur Festus.



Feliks. <sup>15</sup>Nandoo kanau we Yerusalem itu, neangka'indo imamu bhe kamungkula'indo Yahudi domai dosungkuane ne idi, andoa desalo abhotusie damongkoe. <sup>16</sup>Ta'atobhoosida, ingka suano kaneandoa miendo Roma tadaebhotusimo seemie nebhie'ao kabearnga kawa'ao ne mie sumungkuane. O mie nebhie'ao tabeano dopowiseanda bhe mie mobhie'aane, pakade dowane kasalawa natumundu'ao wutono. <sup>17</sup>Dadi'anomo andoa ini doangkafi kanau mo we ini. Hato nomentae lasao aefokonandoo hompu'a tabhita-hakie maka mie ana'a afotudu'aane. <sup>18</sup>Kuna'ekumo nandoo bhe habu modaino, tamaka hato doehe mobhie'ane, ingka gaha'a bhe nasehonda miina bhe nesungku'aondo. <sup>19</sup>Ampamo kaowu doposala-salama'ana'ao agamando. Dopotagali'ao seemie konea'ano Yesus nomatemo, tamaka ambano Paulus mie amaitu suli nodadi. <sup>20</sup>Hampano no'aliane laloku nada amai amotindae parakara aini, afeenaemo bhaha'i na'umunda takumala dabhitahakie we Yerusalem. <sup>21</sup>Tamaka Paulus tano'ende ne Omputo Kaisar. Nesalo hunsa'aonomo datumaangie kansuhu bhe namantagi sampe parakarano nabhotusie Kaisar. Dadi'anomo atududamo datumaangie kansuhu sampe asalawa amakatue we Kaisar." <sup>22</sup>Nopugaumo kolaki Agripa ne Festus, "Gaoku ametingke'ao dua wutoku." Ambano Festus, "Naewine naembali metingkeea."

<sup>23</sup>Hato nomentae domaimo Agripa bhe Bernike dofotiwoha kakalabhiando peda kolaki. Andoa dopesua weo lambu kafo-bhitahaki'a dopoowa-owa bhe neangka'indo tantara bhe kamungkula'ino liwu aitu. Dohato kaowu, Festus nofotudu'aomo Paulus. <sup>24</sup>Ambano Festus, "Kolaki Agripa bhe kosasawintoomu ini! Ondo kaitaomu, miemo aini nesungku'aondo kosasawindo miendo Yahudi, naetaa meateno we Yerusalem naetaa meateno ne ini. Andoa domai'i kanau bhe dopokakei-kei ambado mie aini paemo naembali nadumadi. <sup>25</sup>Tamaka ingka miina ae'awa ka'ala so namantasi'ao damongkoe. Mba'inomo nesalo na'umende ne Omputo Kaisar, abhotusiemo amakatue we Kaisar. <sup>26</sup>Ampamo kaowu miina'o bhe tingku motangka so abuhi weo suhaku so Kaisar. Katiowa'anomo ne wisentoomu ini, patudhuku mpuu ne wiseno kolaki Agripa, neanomo mada damotindae nandumandoomo tingku so nebuhiku. <sup>27</sup>Kapa'amo afekihie pae namantasi daepakatu seemie titaangino ane pae bhe kasangkati nesungku'ao."

**Paulus notundu'ao wutono ne wiseno Agripa**  
26:1-11

**26** Ambano kolaki Agripa ne Paulus, “Dowa'angko kasalawa tumundu'ao wutomu.” Paulus nofoehe limano maka nopugau ambano, <sup>2</sup>“Kolaki Agripa nefosibhalaku, akodawua sepali'a se'oleo itu dofolalesa kanau atumundu'ao wutoku ne wisemu atumagali sabhaha kasangkati nesungku'aondo miendo Yahudi ini. <sup>3</sup>Nekodawua'aoku sepali'a mba'inomo pande'aane mpuu adhati-ndo miendo Yahudi bhe kahengetano agamando. Dadi'anomo aesalo ne wisemu tasabahamo fetingke kanau kadeki aetula-tula.

<sup>4</sup>Kosasawindo miendo Yahudi dopande'aane dadiku mpini nandoo kaana'iku, kapa'amo mpini kabhao-bhaono aeate-ate bhe saliwuku we Yerusalem. <sup>5</sup>Nomponamo dopande'a kanau. Ane damoindalo, naembali daetula-tula putae idi ini aembali seemie Farisi mangkafino tubho foliuno kakii ne agamantoomu ini. <sup>6</sup>Aini dobhithaki kanaumo mba'inomo afintahaki dhandino Lahata'ala ne awua'intoomu. <sup>7</sup>O dhandi ana'a nentaa-ntaandomo dua miendo Israel ompulu haa sampu'ano, kakampuu-mpuu'andomo dosombai Lahata'ala mentae mohondo. Kolaki Agripa nefosibhalaku, kasungku'ando miendo Yahudi ini ingka mba'inomo aposahuna'ao ne dhandi ana'a. <sup>8</sup>Noafa fisikopahaaneomu putae Lahata'ala nefowanu mie mate?

<sup>9</sup>Daanumo, endefi'ini wutoku dua kuna'ekumo tabeano amewangie nekonando Yesus miendo Nasaret maitu ampa ka'osaku. <sup>10</sup>Ana'aemo nehabuku we Yerusalem. Ae'awa kaowu kuasa mai'aono ne meangka'indo imam, dobhahi umati mongkilono nefopesuaku weo katohongku. Suano kaowu ta'o ana'a, bhahamoa aangkafi dua ane dobhatusie dopongkoda. <sup>11</sup>Idi nentela afodee-deeda weo lambu kasambahea'a maka afosuhuda dahumunsa kaparasaeando. Ka'osano kaheheno bhakeku sampe a'ambada maringga we kotando koliwuno.”

**Paulus netula-tula'ao netompaloino**

26:12-32

*Tul 9:1-19, 22:6-16*

<sup>12</sup>“Pedamo ana'a ae'awa kuasa bhe taka mai'aono ne meangka'indo imam maka akala we kotano Damsyik. <sup>13</sup>Gaha'a, kolaki Agripa, tamba'omo toho-toho indotu oleo we laano sala awoha tilanga nekamondawu nomai'ao te lani, nentalea anoa bhe oleo.

Tilanga amaitu nokalibu kanau bhe sabhangka'iku poowa'aku. <sup>14</sup>Kosasawi mani tatihambitao we wite maka afetingke suaha nopugau ne idi weo wamba Ibrani ambano, 'Saulus, Saulus, noafa fodee-dee kanau? Ingka so kaowu modee-dee'ao wutomu, ka-beanga se'ulu sapi nekantada katuko mohoko'ano.' <sup>15</sup>Tamaka ambaku, 'La'ae gaha'a hintu itu waompu?' Ambano, 'Idi ini Yesus nefodee-deemu. <sup>16</sup>Aitu wanu'o toha maka ehe! Afotiwoha wutoku ne hintu hampano asumangkeko membali palima-limaku. Hintumo so sumakusii'aono kosasawi'ae madano newohamu bhe so nefotiwohaku ne hintu mada kaowu. <sup>17</sup>Amosalamatiko mai'ao ne saliwumu miendo Yahudi bhe ne mie suano Yahudi. Hintu atumuduko kumala ne mie suano Yahudi na'a, <sup>18</sup>so molosa'ao matando, neanomo dahumunsamo kahohondo maka damesua we mentalea'ano, damai'ao ne kuasano Kafeompu'ando seetani dadumoli ne Lahata'ala. Neanomo dua dhosando nati'amponi hampano kaparasaeando ne Idi, pakade dae'awa dawua nefotantuno Lahata'ala so mie mongkilo.'

<sup>19</sup>Dadi'anomo, kolaki Agripa, pae bhe kapoolia pae amangkafi powohaku mai'aono te surugaa maitu. <sup>20</sup>Mentalea-mentalea afohatoda, o mie tabeano dametomp'a'ao podiu modaindo maka dadumoli ne Lahata'ala. Pakade daehabu podiu posahataa'ano bhe fetompando maitu. Nepugau'aoku ini kabhao-bhaono afohato miendo Yahudi we kotano Damsyik maka we Yerusalem bhe koseka'ewa'ae kadieno Yudea. Pada ana'a afohatomo dua mie suano Yahudi. <sup>21</sup>Nokotingkumo ne na'a miendo Yahudi dohako kanau weo Lambuno Lahata'ala maka dofesoba damongko kanau. <sup>22</sup>Tamaka notulumi kanau Lahata'ala sampe nandoo adadi ampa se'oleo itu, neanomo naembali asumakusii'ao kosasawi'ae ini, naetaa ne mie ndidiki, naetaa ne mie bhalano. Bhihita nefoleleku ini sakotu'uno nopototomo bhe nekosuaha'aono anabii Musa bhe ana-anabii sigao'ano. <sup>23</sup>Bhihita ana'a peda ini: Mesias, Omputo Fosalamatino maitu, tetewei naenamisi kakadee-dee maka Anoamo so ma'indulu manuno mai'ao ne mate, pakade Anoamo dua so meowano tilanga fosalamatino, naetaa ne miendo Yahudi, naetaa ne bansano liwu sigao'ano."

<sup>24</sup>Tangasano Paulus nopotundu'ao wutono peda amaitu, nopugaumo gubernur Festus bhe nokei ambano, "Ingka mobheemo Paulus! Nofekabheekomo kapandemu itu." <sup>25</sup>Tamaka Paulus tanotobhoosi ambano, "Festus nefosibhalaku, miina aobheea! Pugauku

ini nokotu'u, nomai'ao ne fekihi mentalea. <sup>26</sup>Kosasawi'ae ini nopande'aane mpuu kolaki Agripa, kaokado'akumo aetula-tula mentalea-mentalea ne wiseno. Aposahuna'ao kosasawi'ae ini miina'o bhe pata nefetingkeno, kapa'amo ingka nokadhadhia we mohame'ano, miina natifebunia. <sup>27</sup>Kolaki Agripa, parasaea bhahaa ne ana-anabii? Apende'aane parasaeada.”

<sup>28</sup>Nopugaumo Agripa ambano, “Kuna'emu sebantaha gaha'a mosarani kanau?”<sup>a</sup> <sup>29</sup>Ambano Paulus, “Asumambahea ne Lahata'ala, nasebantaha bhaha'i naompona, suano kaowu ta'o hintu tamaka kosasawindo mie humatono metingkeno tula-tulaku ini, daembali miendo sarani nada idi ini. Tantumo miina natilentua hante katapuku inia.”

<sup>30</sup>Pada ana'a kolaki Agripa, gubernur Festus, Bernike bhe kosasawindo mie mengkohano ne itu doehemo. <sup>31</sup>Dolimba kaowu detula-tulamo sapada-pada andoa ambado, “Mie aini ingka miina nakoka'a-ka'alaa so namantasi'ao damongkoe tawa datumohongkue.” <sup>32</sup>Ambano Agripa ne Festus, “Mie amaitu sakotu'u'ano naembalimo damolapae ane pae no'endemo ne Omputo Kaisar.”

### Paulus nokala we kotano Roma 27:1-13

**27** Pada kaowu dohotusie takumala we witeni Italia, Paulus bhe seemie hodua katohongku sigao'ano doowadamo ne limano seemie neangkando tantara konea'ano Yulius. Kase'iseno tantara nepande'aono dokonae “Taguano Kaisar”. <sup>2</sup>Tasawimo ne kapala mai'aono we kotano Adramitium. Bhangka aini namangkai kota-kota kalabu'ano bhangka ne kadieno Asia. Aristarkus miendo Makedonia mai'aono we kotano Tesalonika nopobhai kainsami dua.

<sup>3</sup>Nomentae taangkamo we kotano Sidon. Yulius nomalu sepali'a lalono ne Paulus, sampe no'unda'aane nakumala namangkai sabhangka'ino neanomo naembali dama'ane nefaraluuno. <sup>4</sup>Tamai'ao ne itu tahela tasohaki witeni Siprus, tafeo-feolu humanda napa, mba'inomo nosumpu kainsami kawea. <sup>5</sup>Pada talimbaki te'i we potala'ano kadieno Kilikia bhe Pamfilia tahatomo we kotano Mira, ne kadieno Likia. <sup>6</sup>Ne itu tantara neangkafi mani maitu ne'awamo kapala mai'aono we kotano Aleksandria nakumala we witeni Italia. Dadi'anomo nofosawi kainsamimo ne kapala ana'a.

<sup>a</sup> 26:28 Nembali dua doma'anakie, *Ingka nokoma'o mopesua kanau sarani!*

<sup>7</sup>Haa oleo tolu oleomo tahelaa, tamaka nokoma'o pae tadhumu-lua, tatakampo-kampoolimo tama'oti kotano Knidus. Mba'inomo sadaa-daa taesumpu kawea, tafodolimo hope mani humanda salata tasohaki ka'oti'ano witeno Kreta, taangkai kaudhuno Salmone. <sup>8</sup>Nopalusi takampo-kampooli kaudhu aitu, tahatomo ne se'onu kalabu'ano bhangka nekonando Kalabu'a Mokesa, ne owano kotano Lasea.

<sup>9</sup>Tataepadamo waktuu we sala, tadua nolalomo oleono poasa'ando Yahudi, maka ane tamansuhu kao-kaomo nakobalaa-mo. Dadi'anomo Paulus nofodhagadamo ambano, <sup>10</sup>“Bhahitie'iku, afesuhui'e kala-kalantoomu inia nakobalaa, dae'awaane kahugi bhala, suano kaowu ta'o bhangka bhe uleano tamaka bhe inawantoomu dua.” <sup>11</sup>Tamaka neangando tantara na'a nandoo noparasaea meintahano uli bhe dhuraga, bhe pugauno Paulus na'a. <sup>12</sup>Mba'inomo kalabu'a aitu miina naetaa'a dolabuane weo wulano bhaha,<sup>a</sup> maka kapoindalo'ando mie bhahi dahumelamo kansuhu dakumampo-kampooli ampa dahumato kotano Feniks, patudhundo weo wulano bhaha dalumabu ne na'a. Feniks na'a se'onu kota kalabu'ano bhangka ne witeno Kreta, nofewise humanda bhaha somba bhe bhaha molanga. <sup>13</sup>Ne na'a kawea mbihi-mbihi nofinda salata, weo fekihindo teteweimo patudhundo maitu nasumampe. Dadi'anomo dohelamo labu maka tahela tasohaki sepali'a ka'oti'ano witeno Kreta.

### **Bhangka kasawi'ano Paulus notokuhu**

27:14-44

<sup>14</sup>Miina'o naomponaa tahelaa, tamba'omo nofinda gahuha no-mai'ao te wite dokonae kaweano Wangkapopo. <sup>15</sup>Bhangka mani netaa nohambi-hambitaane ewo pakade miina namewaa taesumpuane kawea'a. Dadi'anomo tataekatahomo, bhangka mani tanewalo-walolemo, nomaampemo. <sup>16</sup>Tahato ne owano se'onu liwuto konea'ano Kauda, kane'omo tafeolu seendai. Ne itu takampo-kampoolimo tahela katondano bhangka mani. <sup>17</sup>Pada dofofoni katonda na'a te wawono bhangka, o bhangka dogogantue-mo, dowawe'iane habuta, patudhundo keana nobhongka. Mba'inomo dote'i bhahaa dotisohe ne dolangono Sirtis, dofosampumo pangaowa, sampe o bhangka dokatahoe tanelantolantomo. <sup>18</sup>Ka'osano nohambi-hambita kainsami gahuha na'a sampe

<sup>a</sup> 27:12 Sakotu'uno: *wulano kahindi*.

nomentae uleano bhangka ta'ohofiemu weo te'i. <sup>19</sup>Nopooli tolu oleo, katokano bhangka do'ohofie wutondo sawino bhangka. <sup>20</sup>Nomampona-mponamo miina taohaa oleo bhaha'i o kulipopo, o gahuha noansoha'i kainsami kansuhu. Panda-pandano nobhotumo posahuna'ao mani, ingka paemo tasumalamatia.

<sup>21</sup>Nompona kaowu miina daomaa, noehemo Paulus ne wunta-wuntando maka nopugau ambano, "Bhahitie'iku, ane damangkafi katangahiku pae dahumelaomu damai'ao we witenno Kreta endefi'ini, teteweimo pae da'umawae'omua kakadee-dee bhe kahugi aini! <sup>22</sup>Aitu amohatokoomu, fekatangka lalomiu, kapa'amo ne olotantoomu ini pae bhe so binasanoa, ampamo kaowu bhangka ini. <sup>23</sup>Kapugau'aku peda aini, mba'inomo mohondo nomai'i kanau mala'ekatino Lahata'ala nesombaiku, Lahata'alamo ini kohaku kanau. Mala'ekati na'a neehe-ehe ne sohihiku maka nopugau ambano, <sup>24</sup>'Paulus, koe mote'ia, tetewei powise bhe Omputo Kaisar. Hampano rahamatino Lahata'ala kosasawindo mie owa'amu weo bhangka ini dasumalamati, mba'inomo bhe hintu.' <sup>25</sup>Dadi'anomo bhahitie'iku, fekatangka lalomiu. O idi aparasaea ne Lahata'ala kosasawi'ae nakumadhadhia peda nefohato'aono ne idi. <sup>26</sup>Tamaka tetewei datisoheomu ne se'onu liwuto."

<sup>27</sup>Nopoolimo ompulu'a efato nandoo kainsami taelanto-lanto we te'ino Adria. Gaha'a nofewunta'i alo dokiha-kihae sawino bhangka noma'omo ka'oti'a. <sup>28</sup>Dadi'anomo dekatapumo kontu ne habuta maka dosuka kandalono te'i, gaha'a tahaa fulu hofa kandalono. Miina nakodo'o tadhulu dofenduamo toha desuka, gaha'a taompu-lu lima hofa. <sup>29</sup>Mba'inomo dote'i bhahaa tatokuhu ne pasi de'ohomo labu fato mata we wana, maka gao mani napikimentaemo. <sup>30</sup>Tamaka sawino bhangka dokopatudhu damilei. Defosampumo katonda woha-wohaemo dae'oho labu te hope. <sup>31</sup>Gaha'a Paulus nopugaumo ne meangkando tantara bhe tantara sigao'ano ambano, "Ane paemo bhe andoa maitu weo bhangka, pae sumalamatiomua." <sup>32</sup>O tantara'i na'a lasao dotota habutano katonda maka dofomaampee.

<sup>33</sup>Noma'o kamentae kosasawindo mie weo bhangka maitu noli'idamo Paulus daomaa. Ambano, "Ompulu'a efatomo tasantohamo, metaangiomu ka'aho, miina sepali'a momaa'omua. <sup>34</sup>Dadi'anomo aesalo mpuu humaa'omu kadeki, nofaraluu so sumalamati'ao'omu. Kosasawimiu itu bhemo nasetangke wuluno fotumiu pae bhe so miinae'anoa." <sup>35</sup>Pada nopugau peda na'a,

Paulus nealamo roti, nefoampe katumpuno lalo ne Lahata'ala ne wisendo kosasawindo maitu. Roti ana'a nobhebhehaemo maka nohumaa. <sup>36</sup>Kosasawindo notangkamo lalondo lasao dohumaa dua bhe andoa. <sup>37</sup>Kabhahi mani weo bhangka na'a tahaa mo'onoo fitu fulu nonoo. <sup>38</sup>Taowe'i kaowu o gandum uleano bhangka do'ohofiemo weo te'i so nosape'ao.

<sup>39</sup>Hato nomentae sawino bhangka dowohamo wite, tamaka miina damande'aane bhaha'i witenoo ae. Mpahinomo dowoha kolowa nopotate napano. Dadi'anomo patudhundo o bhangka dakumampo-kampoolie damotisoheemo ne na'a. <sup>40</sup>Kosasawi'ae habutano labu dototae maka dofosipulie weo te'i. Pada ana'a dolensemo habuta katapuno uli maka dofosampue. Dofoopemo dua pangawoa kapabelo neanomo nabusoha'iane kawea namohopee te napa. <sup>41</sup>Gaha'a delumpakimo bungino bhone, sampe bhangka mani notisohemo. Hopeno no'onta weo bhone bhe nakodiua miina, wanano nohansuru nohambita'iane ewo. <sup>42</sup>Wakutuu ana'a tantara'i dokopatudhu damongko mie netaangi maitu keana doleni maka dofilei. <sup>43</sup>Tamaka neangkando tantara gaono namosalamati Paulus. Dadi'anomo no'ele'aandamo. Notudumo mandeno lumenino dama'indulumo damunda we te'i maka damoni te wite. <sup>44</sup>Tapa mandeno lumenino notududamo damangka kundo daminta-mintaha ne dopi tawa ne kawengkano bhangka. Pedamo ana'a kosasawi mani tasalamatimo te wite.

### Paulus we liwutono Malta 28:1-10

**28** Tasalamati kaowu te ka'oti'a, tapande'aanemo gaha'a liwuto ana'a dokonae liwutono Malta. <sup>2</sup>Miendo liwuto aitu netaa'i sepali'a lalondo ne insaodi. Andoa detampomo efi maka dosali'i kainsami taehana hampano noko'use bhe nohindi. <sup>3</sup>Paulus netawunaomo dua ha'a'ino sau maka notawue, gaha'a tanosibholamo se'ulu ule kobisa mba'inomo nohatoe kasodo. Ule amaitu lasao nosia limano. <sup>4</sup>Miendo liwu mohano ule nekantai ne limano Paulus, dopugau sapada-pada andoa ambado, "O mie aini tantumo mie kumapongko-pongkono, mahingga nosalamatimo we te'i, tamaka dewa Bhoosi'aono habu modai pae namolapae nadumadia." <sup>5</sup>Tamaka Paulus nokambesi ule maitu weo efi maka anoa miina nakaafa-afaa. <sup>6</sup>Kuna'endomo naoweo, bhaha'i tamba'omo natiwata komate-mateno. Tamaka nompona dofe'o-fe'ondoe, ingka gaha'a

miina naoafaanea, nobhansulemo fekihindo. Ambado Paulus maitu seemie kokalabhiano peda dewa.

<sup>7</sup>Ne owando na'a nandoo wite fehebua'ano mowano liwuto aitu, neano Publius. Anoa notahima metaa kainsami tabutu we lambuno bhe no'ondofa kainsami sampe tolu oleo. <sup>8</sup>Ne na'a amano Publius nendole-ndole'ao saki. Sakino nosodoe bhe nedea'ao hea. Paulus nopesuaki bolokuno, nosambahea'ane poowa notei limano te wawono maka nofeka'osae. <sup>9</sup>Pada kadhadhia ana'a domaimo dua mie mosaki sigao'ano ne liwuto aitu maka andoa nofeka'osada dua. <sup>10</sup>Nobhahi kawa'aondo mba'inomo dofosibhala kainsami, pakade hato tabhose, dowa'a kainsami sabhaha nefaraluu mani we sala.

### Paulus nohatomo we kotano Roma

28:11-16

<sup>11</sup>Nokapo tolu wula tahunsamo liwuto aitu tasawi ne bhangka bhalano mai'aono we kotano Aleksandria. Kosekawanta'ae wulano bhaha bhangka ana'a nolabu ne liwuto aitu. Katandaino bhangka aitu nepake gambarano dewa Lopo (Kastor bhe Poluks).<sup>a</sup> <sup>12</sup>Insaodi taangka kotano Sirakusa, ne itu talabu tolu oleo. <sup>13</sup>Tamai'ao ne itu tasoha-sohakimo ka'oti'a, ampa we kotano Regium. Nomentae nofindamo kaweano salata maka nopooli neefua tahatomo we kotano Putioli. <sup>14</sup>Ne itu tapo'awa-awamo bhe seemie hodua umati marasaeano ne Yesus. Hampano dosali'i kainsami, taeate-ate bhe andoa ampa fitu oleo. Pada ana'a tapansuhumo we kotano Roma. <sup>15</sup>Bhahitie marasaeano we watu dofetingkemo bhihita mani sampe domai dosumpui kainsami we Daoano Apius bhe Kabutu'a Tolu Onuno.<sup>b</sup> Nowoha kaowu andoa, Paulus nefoampe- mo katumpuno lalo ne Lahata'ala bhe notangkamo lalono.

<sup>16</sup>Sahato mani we Roma, Paulus do'unda'aane naeate nomoisa ne lambu kabutu'ano bhe seemie tantara dhumaganie.

### Paulus nopuga-pugau bhe miendo Yahudi we Roma

28:17-31

<sup>17</sup>Nopooli tolu oleo we Roma, Paulus nosali'imo neangka'indo miendo Yahudi ne itu. Dohompu kaowu nopugaumo ambano,

<sup>a</sup> 28:11 Sakotu'uno: *Dioskuri*, gantino dewa Lopo.

<sup>b</sup> 28:15 Neano sakotu'uno: *Forum Apius bhe Tres Tabernae*.



“Bhahitie'iku, idi ini miina akoka'alaa naetaa ne saliwuntoomu naetaa ne adhatindo kamungkula'intoomu, tamaka dohako kanau we Yerusalem, maka doowa kanau ne limando miendo Roma. <sup>18</sup>Pada dofee-feena kanau, patudhundo damolapa kanaumo, hampano miina sepali'a bhe ka'alakua mantasi'ano so katipongko'aku. <sup>19</sup>Tamaka miendo Yahudi doewa kansuhu, dadi'anomo kao-kao-mo dofusuhu kanau a'ende ne Omputo Kaisar. Ampamo kaowu miina akopatudhu asumungku'ao saliwuku. <sup>20</sup>Katisali'i'amiumo apoindalo apo'awa bhe apuga-pugau bhe hintimiu, kapa'amo katihante'aku ini hampano Omputo Fosalamatino nentaa-ntaando miendo Israel.”

<sup>21</sup>Tamaka tadotobhoosi ambado, “Ingka miina tae'awa suha mai'aono we Yudea metula-tula'aono hintu ini, miina dua bhe mie humatono sumambili modaiko. <sup>22</sup>Ampamo kaowu tapoindalo tametingke ne wutomu peda ae fekihimu itu, kapa'amo tapande'aane kafoguhu aini dobansie ne amai onuno liwu.” <sup>23</sup>Pada ana'a detempomo so dapowa-awa'ao.

Nohato tempono dobhahi sepali'a maino we kabutu'ano. Paulus nofohatoanda bhe notalesaandamo peda amai Kafopahinta'ano Lahata'ala notanda ne Kitabino Musa bhe Kitabindo ana-anabii. Anoa no'ule-ulei'e lalono so damarasaea'ao ne Yesus, notanda hangkowine ampa nohondo oleo. <sup>24</sup>Nandoo marasaeano ne pugau-no, tamaka nandoo dua tapa marasaeano. <sup>25</sup>Tadopogaa-gaamo miina nase'ise fekihindoa. Tamaka Paulus nandoo dua nofohatoda peda ini, “Nokotu'umo daanumo bhoasaono Rohino Lahata'ala ne awua'intoomu nefosampeno anabii Yesaya,

<sup>26</sup>[\_Ambano Lahata'ala ne Yesaya,] ‘Kalamo ne liwu aini  
maka fohatoda,  
“Hintimiu safeti-fetingke, tamaka pae  
melosangiomua,  
sawoha-woha tamaka pae konipande'ao'omua.

<sup>27</sup>Kapa'amo totono lalondo mie andoa ini nofekontumo,  
tingalando nopo'opimo, matando nopilomo.  
Kanandoo'ano peda ana'a keana dofowoha'ao  
matando,  
keana dofofetingke'ao tingalando,

keana dua delosangi'ao totono lalondo  
keana dodoli ne Idi ameka'osada.”<sup>a</sup>

<sup>28</sup>Dadi'anomo tabeano mande'aaneomu putae kasalamati mai'ao-  
no ne Lahata'ala ini damohatoandae bansano liwu sigao'ano suano  
Yahudi maka andoamo so metingkee.”<sup>29</sup> [Sapadano nopugau peda  
na'a miendo Yahudi dosulimo bhe dopotaga-tagali sapada-pada  
andoa.]

<sup>30</sup>Paulus neate ne lambu kasewa'ano haa ta'u kaomponanoa.  
Sabhaha mie humatoe notahimada ne itu. <sup>31</sup>Mentalea-mentalea  
nokado nefolele bhihita Kafopahinta'ano Lahata'ala bhe nofo-  
foguhu'ao kafoina'uno Ompu Yesus Kristus, miina bhe umonto-  
ontomiea.

---

<sup>a</sup> 28:26-27 Yes 6:9-10